

ইন্দিরা

বঙ্কিমচন্দ্র চট্টোপাধ্যায়



আদিত্য প্রকাশালয়

২৮/১, আন্টিস মন্থন মুখার্জী রো, কলিকাতা-৯



তৃতীয় প্রকাশ :
ডিসেম্বর—১৯৫৯

প্রকাশক :
শ্রীহরিপদ বিশ্বাস
আদিত্য প্রকাশালয়
২৮/১, জাস্টিস মন্ডথ মদুখাজী' রো
কলিকাতা-৭০০ ০০৯

মুদ্রাকর :
শ্রীঅবনীমোহন রায়
তারকনাথ প্রিন্টিং ওয়ার্ক'স
১২, বিনোদ সাহা লেন
কলিকাতা-৭০০ ০০ ৬

इन्दिरा

ইন্দিরা

প্রথম পরিচ্ছেদ : আমাৰ শ্বশুরবাড়ী যাইব

অনেক দিনের পর আমি শ্বশুরবাড়ী যাইতেছিলাম। আমি উনিশ বৎসবে পড়িয়াছিলাম, তথাপি এ পর্যন্ত শ্বশুরের ঘর করি নাই। তাহার কারণ, আমাৰ পিতা ধনী, শ্বশুর দরিদ্র। বিবাহের কিছু দিন পরেই শ্বশুর আমাকে লইতে লোক পাঠাইয়াছিলেন, কিন্তু পিতা পাঠাইলেন না। বলিলেন, “বিবাহকে বলিও যে, আগে আমার জামাতা উপাৰ্জন করিতে শিখিব—শর পর বধু লইয়া যাইবেন—এখন আমার মেয়ে লইয়া গিয়া খাওয়াইবেন কি?” শুনিয়া আমার স্বামীর মনে বড় ঘৃণা জন্মিল—তাহার বয়স তখন কুড়ি বৎসর, তিনি প্রতিজ্ঞা করিলেন যে, স্বয় অর্থোপাৰ্জন করিয়া পরিবার প্রতিপালন করিবেন। এই ভাবিয়া তিনি পশ্চিমাঞ্চলে যাত্রা করিলেন। তখন রেল হই নাই—পশ্চিমের পথ অতি দুৰ্গম ছিল। তিনি পদব্রজে, বিনা অর্থে, বিনা সহায়ে, সেই পথ অতিবাহিত করিয়া, পাঞ্জাবে গিয়া উপস্থিত হইলেন। যে ইহা পারে, সে অর্থোপাৰ্জন করিতেও পারে স্বামী অর্থোপাৰ্জন করিতে লাগিলেন—বাড়ীতে টাকা পাঠাইতে লাগিলেন—কিন্তু সাত আট বৎসর বাড়ী আসিলেন না, বা আমার কোন সংবাদ লইলেন না। রাগে আমার শরীর গর গর বরিও। কত টাকা চাই? পিতা মাতার উপর বড় রাগ হইত—কেন পোড়া টাকা উপাৰ্জনের কথা তাহারা তুলিয়া-ছিলেন? টাকা কি আমার সুখের চেয়ে বড়! আমার বাপের ঘরে অনেক টাকা—আমি টাকা লইয়া “ছিনিমিনি” খেলিতাম। মনে মনে করিতাম, একদিন টাকা পাতিয়া শুইয়া দেখিব—কি সুখ? একদিন মাকে বলিলাম, “মা, টাকা পাতিয়া শুইব।” মা বলিলেন, “পাগলী কোথাকার!” মা কথাটা বুঝিলেন। কি কল কৌশল করিলেন বলিতে পারি না, কিন্তু যে সময়ের ইতিহাস আরম্ভ করিতেছি, তাহার

কিছু পূর্বে আমার স্বামী বার্ড আসিলেন। রব উঠিল যে, তিনি কমিসেরিয়েটের (কমিসেরিয়েট বটে ত ?) কন্স করিয়া অতুল ঐশ্বর্যের অধিপতি হইয়া আসিয়াছেন। আমার শ্বশুর আমার পিতাকে লিখিয়া পাঠাইলেন, “আপনার আশীর্ব্বাদে উপেন্দ্র (আমার স্বামীর নাম উপেন্দ্র — নাম ধরিলাম, প্রাচীনারা মার্জনা করিবেন. হাল আইনে তাহাকে “আমার উপেন্দ্র” বলিয়া ডাকাই সম্ভব)—বধুমাতাকে প্রতিপালন করিতে সক্ষম পাক্ট বেহারা পাঠাইলাম. বধুমাতাকে এ বাটীতে পাঠাইয়া দিবেন. নচেৎ আচ্ছ করিলে পুত্রের বিবাহেব আবার সহক করিব ”

পিতা দেখিলেন, নৃত. বড় মানুষ বাট পাঙ্কীখানার ভিতরে কিংখাপ মোড়া, উপরে কপার বিট, বাটে কপার হাজরের মুখ। দাসী মাগী যে আসিয়াছিল, সে গরদ পরিয়া আসিয়াছে গলায় বড় মোটা সোনার দান চারি জন কাল দাড়িওয়াল ভোজপুরে পাঙ্কীর সঙ্গে আসিয়াছিল

আমার পিতা হরমোহন দত্ত বনিয়াদি বড়মানুষ হাসিয়া বলিলেন, “মা ইন্দিরে। আর তোমাকে রাখিতে পারি ন এখন যাও, আবার শীঘ্র লইয়া আসিব দেখ, আজুল ফুলে কলাগাছ দেখিয়া হাসিও না

মন মনে বাবার কথা উত্তর দিলাম বলিলাম, আমার প্রাণটা বুঝি আজুল ফুলিয়া কলাগাছ হইল. তুমি যেন বুঝিতে পারিয়া হাসিও না

আমার ছোট বহিন কামিনী বুঝি তা বুঝিতে পারিয়াছিল : বলিল, “দিদি! আবার আসিব কবে ?” আমি তাহার গাল টিপিয়া ধরিলাম

কামিনী বলিল, ‘দিদি, শ্বশুরবার্ড কেমন, তাহা কিছু জানিস না ?’

আমি বলিলাম, “জানি সে নন্দন বন. সেখানে রতিপতি পারিজাত ফুলের বাগ মারিয়া লোকের জন্ম সার্থক করে. সেখানে পা দিলেই

স্বীজাতি অঙ্গরা হয়, পুরুষ ভেড়া হয়। সেখানে নিত্য কোকিল ডাকে, শীতকালে দক্ষিণে বাতাস বয়, অমাবস্যাতেও পূর্ণচন্দ্র উঠে।”

কামিনী হাসিয়া বলিল, “মরণ আর কি !”

দ্বিতীয় পরিচ্ছেদ : শশুরবাড়ী চলিলাম

ভগিনীর এই আশীর্বাদ লইয়া আমি শশুরবাড়ী যাইতেছিলাম। আমার শশুরবাড়ী মনোহরপুর। আমার পিত্রালয় মহেশপুর। উভয় গ্রামের মধ্যে দশ ক্রোশ পথ, সুতরাং প্রাতে আহার করিয়া যাত্রা করিয়াছিলাম, পৌছিতে পাঁচ সাত দণ্ড রাত্রি হইবে জানিতাম।

তাই চক্ষু একটু একটু জ্বল আসিয়াছিল। রাত্রিতে আমি ভাল করিয়া দেখিতে পাইব না, তিনি কেমন। রাত্রিতে ত তিনি ভাল করিয়া দেখিতে পাইবেন না, আমি কেমন। মা বহু যত্নে চুল বাঁধিয়া দিয়াছিলেন—দশ ক্রোশ পথ যাইতে যাইতে খোঁপা খসিয়া যাইবে, চুল সব স্থানচ্যুত হইয়া যাইবে। পাক্কীর ভিতর ঘামিয়া বিক্রী হইয়া যাইব। তৃষ্ণায় মুখের তাম্বলরাগ শুকাইয়া উঠিবে, শ্রান্তিতে শরীর হতক্রী হইয়া যাইবে। তোমরা হাসিতেছ ? আমার মাথার দিব্য, হাসিও না, আমি ভরা ঘোঁবনে প্রথম শশুরবাড়ী যাইতেছিলাম।

পথে কালাদীঘি নামে এক বৃহৎ দীঘিকা আছে। তাহার জল প্রায় অর্দ্ধ ক্রোশ। পাড় পর্বতের স্থায় উচ্চ। তাহার ভিতর দিয়া পথ। চারি পার্শ্বে বটগাছ। তাহার ছায়া শীতল, দীঘির জল নীল মেঘের মত, দৃশ্য অতি মনোহর। তথায় মনুষ্ণের সমাগম বিরল। ঘাটের উপরে একখানি দোকান আছে মাত্র। নিকটে যে গ্রাম আছে, তাহারও নাম কালাদীঘি।

এই দীঘিতে লোকে একা আসিতে ভয় করিত। দস্যুতার ভয়ে এখানে দলবদ্ধ না হইয়া লোক আসিত না। এই জন্ত লোকে “ডাকাতে কালাদীঘি” বলিত। দোকানদারকে লোকে দস্যুদিগের সহায় বলিত। আমার সে সকল ভয় ছিল না। আমার সঙ্গে অনেক লোক—ষোল-

কিছু পূর্বে আমার স্বামী বাড়ী আসিলেন। সব উঠিল যে, তিনি কমিসেরিয়েটের (কমিসেরিয়েট বটে ত ?) কন্স করিয়া অতুল ঐশ্বর্যের অধিপতি হইয়া আসিয়াছেন। আমার শ্বশুর আমার পিতাকে লিখিয়া পাঠাইলেন, “আপনার আশীর্ব্বাদে উপেন্দ্র (আমার স্বামীর নাম উপেন্দ্র — নাম ধরিলাম, প্রাচীনার) মাজ্জনা করিবেন, হাল আইনে তাহাকে “আমার উপেন্দ্র” বলিয়া ডাকাই সম্ভব)—বখমাতাকে প্রতিপালন করিতে সক্ষম পার্কে বেহার পাঠাইলাম, বখমাতাকে এ বাটীতে পাঠাইয়া দিবেন। নচেৎ আশ্রয় করিলে পুত্রের বিনাহেব আবার সহক করিব ”

পিতা দেখিলেন, নূতন বড় মানুষ বটে পার্কেখানার ভিতরে কিংখাপ মোড়া, উপরে কপার বিট, বাঁটে কপার হাজরের মুখ। দাসী মাগী যে আসিয়াছিল, সে গরদ পরিয়া আসিয়াছে, গলায় বড় মোটা সোনার দানা চারি জন কালো লাড়িওয়াল ভোজপুরে পার্কার সঙ্গে আসিয়াছিল

আমার পিতা হরমোহন দত্ত বুনিয়াদি বড়মানুষ হাসিয়া বলিলেন, “মা ইন্দিরে ! আর তোমাকে রাখিতে পারি ন এখন যাও, আবার শীঘ্র লইয়া আসিব দেখ, আঙ্গুল ফুলে কলাগাছ দেখিয়া হাসিও না ”

মনে মনে বাবার কথা উত্তর দিলাম বলিলাম, ‘আমার শ্রাণটা বুঝি আঙ্গুল ফুলিয়া কলাগাছ হইল : তুমি যেন বুঝিতে পারিয়া হাসিও না ’

আমার ছোট বহিন কামিনী বুঝি তা বুঝিতে পারিয়াছিল : বলিল, “দিদি ! আবার আসিবে কবে ?” আমি তাহার গাল টিপিয়া ধরিলাম

কামিনী বলিল, “দিদি, শ্বশুরবাড়ী কেমন, তাহা কিছু জানিস না ?”

আমি বলিলাম, “জানি সে মন্দন বন, সেখানে রতিপতি পারিজাত ফুলের বাণে মারিয়া লোকের জন্ম সার্থক করে। সেখানে পা দিলেই

স্বীজাতি অপসরা হয়, পুরুষ ভেড়া হয়। সেখানে নিত্য কোকিল ডাকে, শীতকালে দক্ষিণে বাতাস বয়, অমাবস্যাতেও পূর্ণচন্দ্র উঠে।”

কামিনী হাসিয়া বলিল, “মরণ আর কি।”

দ্বিতীয় পরিচ্ছেদ : শঙ্করবাড়ী চলিলাম

ভগিনীর এই আশীর্ব্বাদ লইয়া আমি শঙ্করবাড়ী যাইতেছিলাম। আমার শঙ্করবাড়ী মনোহরপুর। আমার পিত্রালয় মহেশপুর। উভয় গ্রামের মধ্যে দশ ক্রোশ পথ, সুতরাং প্রাতে আহার করিয়া যাত্রা করিয়াছিলাম, পৌঁছিতে পাঁচ সাত দণ্ড রাত্রি হইবে জানিতাম।

তাই চক্ষু একটু একটু জল আসিয়াছিল। রাত্রিতে আমি ভাল করিয়া দেখিতে পাইব না, তিনি কেমন। রাত্রিতে ত তিনি ভাল করিয়া দেখিতে পাইবেন না, আমি কেমন। মা বহু যত্নে চুল বাঁধিয়া দিয়াছিলেন—দশ ক্রোশ পথ যাইতে যাইতে খোঁপা খসিয়া যাইবে, চুল সব স্থানচ্যুত হইয়া যাইবে। পাকীর ভিতর ঘামিয়া বিক্রী হইয়া যাইব। তৃষ্ণায় মুখের তাম্বলরাগ শুকাইয়া উঠিবে, শ্রান্তিতে শরীর হতশ্রী হইয়া যাইবে। তোমরা হাসিতেছ? আমার মাথার দিব্য, হাসিও না, আমি ভরা যৌবনে প্রথম শঙ্করবাড়ী যাইতেছিলাম।

পথে কালাদীঘি নামে এক বৃহৎ দীঘিকা আছে। তাহার জল প্রায় অর্দ্ধ ক্রোশ। পাড় পর্ব্বতের গায় উচ্চ। তাহার ভিতর দিয়া পথ। চারি পার্শ্বে বটগাছ। তাহার ছায়া শীতল, দীঘির জল নীল মেঘের মত, দৃশ্য অতি মনোহর। তথায় মনুষ্যের সমাগম বিরল। ঘাটের উপরে একখানি দোকান আছে মাত্র। নিকটে যে গ্রাম আছে, তাহারও নাম কালাদীঘি।

এই দীঘিতে লোকে একা আসিতে ভয় করিত। দস্যুতার ভয়ে এখানে দলবদ্ধ না হইয়া লোক আসিত না। এই জন্ত লোকে “ডাকাতে কালাদীঘি” বলিত। দোকানদারকে লোকে দস্যুদিগের সহায় বলিত। আমার সে সকল ভয় ছিল না। আমার সঙ্গে অনেক লোক—ষোল-

জন বাহক, চারিজন দ্বারবান এবং অশ্রাণ লোক ছিল ।

যখন আমরা এইখানে পৌঁছিলাম, তখন বেলা আড়াই প্রহর বাহকেরা বলিল যে, “আমরা কিছু জল-টল না খাইলে আর যাইতে পারি না ।” দ্বারবানেরা বারণ করিল—বলিল, “এ স্থান ভাল নয় ” বাহকেরা উত্তর করিল, “আমরা এত লোক আছি—আমাদিগের ভয় কি ?” আমার সঙ্গে লোকজন ততক্ষণ কেহই কিছুই খায় নাই শেখের সকলেই বাহকদিগের মতে মত করিল ।

দীর্ঘির ঘাটে—বটতলায় আমার পার্কা নামাইল । আমি হাড়ে জলিয়া গেলাম । কোথায় কেবল ঠাকুর দেবতার কাছে মানিতেছি, শীত্র পৌঁছি—কোথায়, বেহারা পার্কা নামাইয়া হাঁটু উঁচু করিয়া ময়লা গামছা ঘুরাইয়া বাতাস খাইতে লাগিল ! কিন্তু ছি ! স্বীজাতি নড় আপনায় বুকে ! আমি যাইতেছি কাধে, তাহারা কাধে আমাকে বহিতেছে ; আমি যাইতেছি ভরা যৌবনে স্যামিসন্দর্শনে—তারা যাইতেছে খালি পেটে এক মুঠা ভাতের সন্ধানে , তারা একটু ময়লা গামছা ঘুরাইয়া বাতাস খাইতেছে বলিয়া কি আমার রাগ হইল ! ধিক্ ভর যৌবনে !

এই ভাবিতে ভাবিতে আমি ক্ষণেক পরে অনুভবে বুঝিলাল যে, লোকজন তফাৎ গিয়াছে । আমি তখন সাহস পাইয়া অল্প দ্বার খুলিয়া দীর্ঘি দেখিত লাগিলাম । দেখিলাম, বাহকেরা সকলে দোকানের সম্মুখে এক বটবৃক্ষতলে বসিয়া জলপান খাইতেছে । সেই স্থান আমার নিকট হইতে প্রায় দেড় দিঘা । দেখিলাম যে, সম্মুখে অতি নিবিড় মেঘের আয় বিশাল দীর্ঘিকা বিস্তৃত রহিয়াছে, চারি পার্শ্ব পর্বতশ্রেণীবৎ উচ্চ অথচ সুকোমল শ্যামল তৃণাবরণশোভিত “পাহাড়”,—পাহাড় এবং জলের মধ্যে বিস্তৃত ভূমিতে দীর্ঘ বট বৃক্ষশ্রেণী ; পাহাড়ে অনেক গোবৎস চরিতেছে—জলের উপর জলচর পক্ষিগণ ক্রীড়া করিতেছে—মৃচ্ পবনের মৃচ্ মৃচ্ তরঙ্গহিল্লোলে ফাটিক ভঙ্গ হইতেছে—সুদ্রোর্ম্মিপ্রতিঘাতে কদাচিৎ জলজ পুষ্পপত্র এবং শৈবাল ছলিতেছে । দেখিতে পাইলাম যে, আমার দ্বারবানেরা জলে নামিয়া স্নান করিতেছে—তাহাদের অঙ্গ-

চালনে তাড়িত হইয়া শ্যামসলিলে শ্বেত মুক্তাহার বিক্ষিপ্ত হইতেছে।

আকাশ পানে চাহিয়া দেখিলাম, কি সুন্দর নীলিমা! কী সুন্দর শ্বেত মেঘের স্তর পরস্পরের মূর্তিবৈচিত্র্য—কিবা নভস্তলে উড্ডীন ক্ষুদ্র পক্ষী সকলের নীলিমামধ্যে বিকীর্ণ কৃষ্ণবিন্দুনিচয়তুল্য শোভা! মনে হইল, এমন কোন বিছা নাই কি, যাতে মানুষ পাখী হইতে পারে? পাখী হইতে পারিলে আমি এখনই উড়িয়া চিরবাহিতের নিকট পৌছিলাম।

আবার সরোবরপ্রতি চাহিয়া দেখিলাম—এবার একটু ভীত হইলাম, দেখিলাম যে, বাহকেরা ভিন্ন আমার সঙ্গে লোক সকলেই এককালে স্নানে নামিয়াছে। সঙ্গে দুই জন স্ত্রীলোক—একজন গুণ্ডরবাড়ীর, একজন বাপের বাড়ীর, উভয়েই জলে। আমার মনে একটু ভয় হইল—কেহ নিকটে নাই—স্থান মন্দ, ভাল করে নাই। কি করি, আমি কুলবধু, মুখ ফুটিয়া কাহাকে ডাকিতে পারিলাম না।

এমত সময়ে পাঙ্কীর অপর পার্শ্বে কি একটা শব্দ হইল যেন উপরিস্থ বটবৃক্ষের শাখা হইতে কিছু গুরু পদার্থ পড়িল। আমি সে দিকের কপাট অল্প খুলিয়া দেখিলাম। দেখিলাম যে, একজন কৃষ্ণবর্ণ নিকটাকার মনুষ্য! ভয়ে দ্বার বন্ধ করিলাম; কিন্তু তখনই বুঝিলাম যে, এ সময়ে দ্বার খুলিয়া রাখাই ভাল। কিন্তু আমি পুনশ্চ দ্বার লিবার পূর্বেই আর একজন মানুষ গাছের উপর হইতে লাফাইয়া পড়িল। দেখিতে দেখিতে আর একজন, আবার একজন। এইরূপ চারিজন প্রায় এককালেই গাছ হইতে লাফাইয়া পড়িয়া পাঙ্কী কাঁধে করিয়া উঠাইল। উঠাইয়া উর্দ্ধ্বাসে ছুটিল।

দেখিতে পাইয়া আমার দ্বারবানেরা “কোন হায় রে! কোন হায় রে!” রব তুলিয়া জ্বল হইতে দৌড়িল।

তখন বুঝিলাম যে, আমি দস্যুহস্তে পড়িয়াছি। তখন আর লজ্জায় কি করে? পাঙ্কীর উভয় দ্বার মুক্ত করিলাম। আমি লাফাইয়া পড়িয়া পলাইব মনে করিলাম, কিন্তু দেখিলাম যে, আমার সঙ্গে সকল লোক অত্যন্ত কোলাহল করিয়া পাঙ্কীর পিছনে দৌড়াইল। অতএব

ভরসা হইল। কিন্তু শীঘ্রই সে ভরসা দূর হইল। তখন নিকটস্থ অগ্নিশ্র বৃক্ষ হইতে লাফাইয়া পড়িয়া বহুসংখ্যক দস্যু দেখা দিতে লাগিল। আমি বলিয়াছি, জলের ধারে বটবৃক্ষের শ্রেণী। সেই সকল বৃক্ষের নীচ দিয়া দস্যুরা পাকী লইয়া যাইতেছিল। সেই সকল বৃক্ষ হইতে মনুষ্য লাফাইয়া পড়িতে লাগিল। তাহাদের কাহারও হাতে বাঁশের লাঠি, কাহারও হাতে গাছের ডাল।

লোকসংখ্যা অধিক দেখিয়া আমার সঙ্গের লোকেরা পিছাইয়া পড়িতে লাগিল। তখন আমি নিতান্ত হতাশ্বাস হইয়া মনে করিলাম, লাফাইয়া পড়ি। কিন্তু বাহকেরা যেরূপ দ্রুতবেগে যাইতেছিল— তাহাতে পাকী হইতে নামিলে আঘাতপ্রাপ্তির সম্ভাবনা। বিশেষতঃ একজন দস্যু আমাকে লাঠি দেখাইয়া বলিল যে, “নামিবি ত মাথা ভাঙ্গিয়া দিব।” স্মরণ্য আমি নিরস্ত হইলাম।

আমি দেখিতে লাগিলাম যে, একজন দ্বারবান অগ্নসর হইয়া আসিয়া পাকী ধরিল, তখন একজন দস্যু তাহাকে লাঠির আঘাত করিল। সে অচেতন হইয়া মৃত্যুকালে পড়িল। তাহাকে আর উঠিতে দেখিলাম না। বোধ হয়, সে আর উঠিল না।

ইহা দেখিয়া অবশিষ্ট রক্ষিগণ নিরস্ত হইল। বাহকেরা আমাকে নির্বিবরে লইয়া গেল। রাত্রি এক প্রহর পর্য্যন্ত তাহারা এইরূপ বহন করিয়া পরিশেষে পাকী নামাইল। দেখিলাম, যেখানে নামাইল, সে স্থান নিবিড় বন—অন্ধকার। দস্যুরা একটা মশাল জ্বালিল। তখন আমাকে কহিল, “তোমার যাহা কিছু আছে, দাও—নইলে প্রাণে মারিব।” আমার অলঙ্কার বস্ত্রাদি সকল দিলাম—অঙ্গের অলঙ্কারও খুলিয়া দিলাম। কেবল হাতের বালা খুলিয়া দিই নাই—তাহারা কাড়িয়া লইল। তাহারা একখানি মলিন, জীর্ণ বস্ত্র দিল, তাহা পরিয়া পরিধানের বহুমূল্য বস্ত্র ছাড়িয়া দিলাম। দস্যুরা আমার সর্বস্ব লইয়া পাকী ভাঙ্গিয় রূপা খুলিয়া লইল। পরিশেষে অগ্নি জ্বালিয়া ভগ্ন শিবিলা দাহ করিয়া দস্যুতার চিহ্নমাত্র লোপ করিল।

তখন তাহারাও চলিয়া যায়, সেই নিবিড় অরণ্যে অন্ধকার রাত্রিতে

আমাকে বস্তু পশুদিগের মুখে সমর্পণ করিবা যাহ দেখিয়া আমি কাঁদিয়া উঠিলাম। আমি কহিলাম, “তোমাদের পায়ে পড়ি, আমাকে সঙ্গে লইয়া চল।” দস্যুর সংসর্গে আমার স্পৃহণীয় হইল।

এই প্রাচীন দৃশ্য সস্করণভাবে বলিল, “বাছা, অমন রাজা মেঘে আমরা কোথায় লইয়া যাইব ? এ ডাকাতির এখনই সোহরং হইবে— তোমার মত রাজা মেঘে আমাদের সঙ্গে দেখিলেই আমাদের ধরিবে।”

একজন যুবা দস্যু কহিল, “আমি ইহাকে লইয়া ফাটকে যাই, সেও ভাল, তবু ইহাকে ছাড়িতে পারি না।” সে আর যাহা বলিল, তাহা লিখিতে পারি না—এখন মনেও আনিতে পারি না। সেই প্রাচীন দৃশ্যে ঐ দলের সঙ্গীরা সে যুবাকে লাঠি দেখাখায়া বলিল, “এই লাঠির বাড়িতে এইখানেই তোর মাথা ভাঙিয়া রাখিয়া যাইব। ও সকল পাপ কি আমাদের সহ্য—” তাহার চলিয়া গেল।

তৃতীয় পরিচ্ছেদ : শশুরবাড়ী যাওয়ার স্থপ

এমনও কি কখনও হয় ? এত বিপদ, এত দুঃখে কাহারও কখনও ঘটিয়াছে ? কোথায় প্রথম স্বামিসন্দর্শনে যাইতেছিলাম—সর্ব্বাঙ্গে রক্তাক্তকার পরিয়া, কত সাধে চুল বাঁধিয়া, সাধের সাজা পানে অকলুষিত ওষ্ঠাধর রঞ্জিত করিয়া, শূণ্যে এই কোমরপ্রফুল্ল দেহ আমোদিত করিয়া এই উনিশ বৎসর লইয়া, প্রথম স্বামিসন্দর্শনে যাইতেছিলাম, কি বলিয়া এই অমূল্য রত্ন তাঁহার পাদপদ্মে উপহার দিব, তাই ভাবিতে ভাবিতে যাইতেছিলাম,—অকস্মাৎ তাহাতে এ কি বজ্রাঘাত ! সর্ব্বালঙ্কার কাড়িয়া লইয়াছে,—লউক, জীর্ণ মলিন দুর্গন্ধ বস্ত্র পরাইয়াছে,— পরাক্ ; বাঘ-ভালুকের মুখে সমর্পণ করিয়া গিয়াছে,—যাক্ ; ক্ষুধাতৃষ্ণায় প্রাণ যাইতেছে,—তা যাক্—প্রাণ আর চাহি না, এখন গেলেই ভাল ; কিন্তু যদি প্রাণ না যায়, যদি বাঁচি, তবে কোথায় যাইব ? আর ত তাঁকে দেখা হইল না—বাপ-মাকেও বুঝি দেখিতে পাইব না ! কাঁদিলে ত কালা ফুরায় না।

তাই কাঁদিব না বলিয়া স্থির করিতেছিলাম । চক্ষুর জল কিছুতেই খামিতেছিল না, তবু চেষ্টা করিতেছিলাম—এমন সময়ে দূরে কি একটা বিকট গজ্জন হইল । মনে করিলাম, বাঘ । মনে একটু আহ্লাদ হইল । বাঘে খাইলে সকল জ্বালা জুড়ায় । হাড়গোড় ভাঙ্গিয়া, রক্ত শুষিয়া খাইবে, ভাবিলাম, তাও সহ্য করিব ; শরীরের কষ্ট বৈ ত না । মরিতে পাইব, সেই পরম সুখ । অতএব কান্না বন্ধ করিয়া, একটু প্রফুল্ল হইয়া, স্থিরভাবে রহিলাম, বাঘের প্রতীক্ষা করিতে লাগিলাম । পাতার যত বার ঘস্ ঘস্ শব্দ হয়, তত বার মনে করি, ঐ সর্ব্বভূতঃখহর প্রাণ-স্নিগ্ধকর বাঘ আসিতেছে । কিন্তু অনেক রাত্রি হইল, তবুও বাঘ আসিল না । হতাশ হইলাম । তখন মনে হইল—যেখানে বড় ঝোপ-জঙ্গল, সেইখানে সাপ থাকিতে পারে । সাপের ঘাড়ে পা দিবার আশায় সেই জঙ্গলের ভিতর প্রবেশ করিলাম, তাহার ভিতরে কত বেড়াইলাম । হায় ! মনুষ্য দেখিলে সকলেই পলায়—বনমধ্যে কত সর্ সর্ বাট্ পট্ শব্দ শুনিলাম, কিন্তু সাপের ঘাড়ে ত পা পড়িল না ; আমার পায়ে অনেক কাঁটা ফুটিল, অনেক বিছুটি লাগিল, কিন্তু কৈ ? সাপে ত কামড়াইল না । আবার হতাশ হইয়া ফিরিয়া আসিলাম, ক্ষুধা তৃষ্ণায় ক্লান্ত হইয়াছিলাম—আর বেড়াইতে পারিলাম না । একটা পরিষ্কার স্থান দেখিয়া বসিলাম । সহসা সম্মুখে এক ভল্লুক উপস্থিত হইল—মনে করিলাম, ভালুকের হাতেই মরিব । ভালুকটাকে তাড়া করিয়া মারিতে গেলাম । কিন্তু হায় ! ভালুকটা আমায় কিছু বলিল না । সে গিয়া এক বৃক্ষের উপর উঠিল । বৃক্ষের উপর হইতে কিছু পারে বন্ করিয়া সহস্র মক্ষিকার শব্দ হইল । বুঝিলাম, এই বৃক্ষে মৌচাক আছে, ভালুক জানিত ; মধু লুটিবার লোভে আমাকে ত্যাগ করিল ।

শেষ রাত্রিতে একটু নিদ্রা আসিল—বসিয়া বসিয়া গাছে হেলান দিয়া আমি ঘুমাইয়া পড়িলাম ।

চতুর্থ পরিচ্ছেদ : এখন যাই কোথায় ?

যখন আমার ঘুম ভাঙিল, তখন কাক কোকিল ডাকিতেছে—
বাঁশের পাতার ভিতর দিয়া ট্‌ক্‌রা ট্‌ক্‌রা রৌদ্র আসিয়া পৃথিবীকে
মনিমুক্তায় সাজাইয়াছে। আলোতে প্রথমেই দেখিলাম, আমার হাতে
কিছু নাই, দস্যুরা প্রকোষ্ঠালঙ্কার সকল কাড়িয়া লইয়া বিধবা
সাজাইয়াছে। বাঁ হাতে এক ট্‌ক্‌রা লোহা আছে—কিন্তু দাহিন হাতে
কিছু নাই। কাঁদিতে কাঁদিতে একটু লতা ছিঁড়িয়া দাহিন হাতে
বাঁধিলাম।

তার পর চারি দিক্‌ চাহিয়া দেখিতে দেখিতে, দেখিতে পাইলাম যে,
আমি যেখানে বসিয়া ছিলাম, তাহার নিকট অনেকগুলি গাছের ডাল
কাটা ; কোন গাছ সমূলে ছিন্ন, কেবল শিকড় পড়িয়া আছে।
ভাবিলাম, এখানে কাঠুরিয়ারা আসিয়া থাকে। তবে গ্রামে যাইবার
পথ আছে। দিবার আলোক দেখিয়া আবার বাঁচিবার ইচ্ছা হইয়াছিল—
আবার আশার উদয় হইয়াছিল ;—উনিশ বৎসর বৈ ত বয়স নয়।
সঙ্কান করিতে করিতে একটা অতি অস্পষ্ট পথের রেখা দেখিতে
পাইলাম। তাই ধরিয়া চলিলাম। যাইতে যাইতে পথের রেখা
আরও স্পষ্ট হইল। ভরসা হইল গ্রাম পাইব।

তখন আর এক বিপদ মনে হইল—গ্রামে যাওয়া হইবে না।
যে ছেঁড়া মুড়া কাপড়টুকু ডাকাইতেরা আমাকে পরাইয়া দিয়া গিয়াছিল,
তাহাতে কোন মতে কোমর হইতে হাঁটু পর্য্যন্ত ঢাকা পড়ে—আমার
বুকে কাপড় নাই। কেমন করিয়া লোকালয়ে কালামুখ দেখাইব ?
যাওয়া হইবে না—এইখানে মরিতে হইবে। ইহাই স্থির করিলাম।

কিন্তু পৃথিবীকে রবিরশ্মিপ্রভাসিত দেখিয়া, পক্ষিগণের কলকূজন
শুনিয়া, লতায় লতায় পুষ্পরাশি ছলিতে দেখিয়া আবার বাঁচিবার ইচ্ছা
প্রবল হইল। তখন গাছ হইতে কতকগুলি পাতা ছিঁড়িয়া ছোট্টা
দিয়া গাঁথিয়া, তাহা কোমরে ও গলায় ছোট্টা দিয়া বাঁধিলাম। এক

রকম লজ্জা নিবারণ হইল, কিন্তু পাগলের মত দেখাইতে লাগিল। তখন সেই পথ ধরিয়া চলিলাম। যাইতে যাইতে গরুর ডাক শুনিতে পাইলাম। বুঝিলাম, গ্রাম নিকট।

কিন্তু আর ত চলিতে পারি না। কখনও চলা অভ্যাস নাই। তার পর সমস্ত রাত্রি জাগরণ, রাত্রির সেই অসহ্য মানসিক ও শারীরিক কষ্ট; ক্ষুধা তৃষ্ণা। আমি অবসন্ন হইয়া পথিপার্শ্বস্থ এক বৃক্ষতলে শুইয়া পড়িলাম। শুইবা মাত্র নিদ্রাভিভূত হইলাম।

নিদ্রায় স্বপ্ন দেখিলাম যে, মেঘের উপর বসিয়া ইল্লালয়ে স্বপ্নবাবড়ী গিয়াছি। স্বয়ং রতিপতি যেন আমার স্বামী—রতিদেবী আমার সপত্নী—পারিজাত লইয়া তাহার সঙ্গে কোন্দল করিতেছি। এমন সময়ে কাহারও স্পর্শে ঘুম ভাঙিল। দেখিলাম, একজন যুবা পুরুষ, দেখিয়া বোধ হইল, ইতর অস্ত্রাজ জাতীয়, কুলী-মজুরের মত, আমার হাত ধরিয়া টানিতেছে। সৌভাগ্যক্রমে একখানা কাঠ সেখানে পড়িয়াছিল। তাহা তুলিয়া লইয়া যুরাইয়া সেই পাপিষ্ঠের মাথায় মারিলাম। কোথায় জোর পাইলাম জানি না, সে ব্যক্তি মাথায় হাত দিয়া উদ্ধ্বাসে পলাইল।

কাঠখানা আর ফেলিলাম না; তাহার উপর ভর করিয়া চলিলাম। অনেক পথ হাঁটিয়া, একজন বৃদ্ধা স্ত্রীলোকের সাক্ষাৎ পাইলাম। সে একটা গাই তাড়াইয়া লইয়া যাইতেছিল।

তাহাকে জিজ্ঞাসা করিলাম যে, মহেশপুর কোথায়? মনোহরপুরই বা কোথায়? প্রাচীনা বলিল, “মা, তুমি কে? অমম সুন্দর মেয়ে কি পথে ঘাটে একা বেরুতে আছে? আহা মরি, মরি, কি রূপ গা! তুমি আমার ঘরে আইস।” তাহার ঘরে গেলাম। সে আমাকে ক্ষুধাতুরা দেখিয়া গাইটি ছুইয়া একটু ছুখ খাইতে দিল। সে মহেশপুর চিনিত। তাহাকে আমি বলিলাম যে, তোমাকে টাকা দেওয়াইব—তুমি আমাকে সেখানে রাখিয়া আইস। তাহাতে সে কহিল যে, আমার ঘর-সংসার ফেলিয়া যাইব কি প্রকারে? তখন সে যে পথ বলিয়া দিল, আমি সে পথে গেলাম। সন্ধ্যা পর্য্যন্ত পথ হাঁটিলাম—

তাহাতে অত্যন্ত শ্রাস্তি বোধ হইল। একজন পথিককে জিজ্ঞাসা করিলাম, “হাঁ গা, মহেশপুর এখান হইতে কত দূর?” সে আমাকে দেখিয়া স্তম্ভিতের মত রহিল। অনেকক্ষণ চিন্তা করিয়া কহিল, “তুমি কোথা হইতে আসিয়াছ?” যে গ্রামে প্রাচীনা আমাকে পথ বলিয়া দিয়াছিল, আমি সেই গ্রামের নাম করিলাম। তাহাতে পথিক কহিল যে, “তুমি পথ ভুলিয়াছ, বরাবর উল্টা আসিয়াছ। মহেশপুর এখান হইতে এক দিনের পথ।”

আমার মাথা ঘুরিয়া গেল। আমি তাহাকে জিজ্ঞাসা করিলাম, “তুমি কোথায় যাইবে?” সে বলিল, আমি এই নিকটে গৌরীগ্রামে যাইব।” আমি অগত্যা তাহার পশ্চাৎ পশ্চাৎ চলিলাম।

গ্রামমধ্যে প্রবেশ করিয়া সে আমাকে জিজ্ঞাসা করিল, “তুমি এখানে কাহার বাড়ী যাইবে?”

আমি কহিলাম, “আমি এখানে কাহাকেও চিনি না। একটা গাছতলায় শয়ন করিয়া থাকিব।”

পথিক কহিল, “তুমি কি জাতি?”

আমি কহিলাম, “আমি কায়স্থ।”

সে কহিল, “আমি ব্রাহ্মণ। তুমি আমার সঙ্গে আইস। তোমার ময়লা মোটা কাপড় বটে, কিন্তু তুমি বড় ঘরের মেয়ে। ছোট ঘরে এমন কপ হয় না।”

ছাই রূপ! ঐ রূপ, রূপ শুনিয়া আমি জ্বালাতন হইয়া উঠিয়াছিলাম, কিন্তু এ ব্রাহ্মণ প্রাচীন, আমি তাঁহার সঙ্গে গেলাম।

আমি সে রাত্রে ব্রাহ্মণের গৃহে দুই দিনের পর একটু বিশ্রাম লাভ করিলাম। এই দয়ালু বৃদ্ধ ব্রাহ্মণ যাজক, পৌরোহিত্য করেন। আমার বস্ত্রের অবস্থা দেখিয়া বিস্মিত হইয়া জিজ্ঞাসা করিলেন, “মা, তোমার কাপড়ের এমন দশা কেন? তোমার কাপড় কি কেহ কাড়িয়া লইয়াছে?” আমি বলিলাম, “আজ্ঞা হাঁ।” তিনি যজমানদিগের নিকট অনেক কাপড় পাইতেন—ছুইখানা খাটো বহরের চোড়া রাজাপেড়ে সাড়ী আমাকে পরিতে দিলেন। শাঁখার কড়ও তাঁর ঘরে

ছিল, তাহাও চাহিয়া লইয়া পরিলাম ।

এ সকল কার্যা সমাধা করিলাম—অতি কষ্টে । শরীর ভাঙ্গিয়া পড়িতেছিল । ব্রাহ্মণ ঠাকুরাণী দু'টি ভাত দিলেন—খাইলাম । একটা নাছুর দিলেন, পাতিয়া শুইলাম । কিন্তু এত কষ্টেও ঘুমাইলাম না । আমি যে জন্মের মত গিয়াছি—আমার যে মরাই ভাল ছিল, কেবল তাহাই মনে পড়িতে লাগিল । ঘুম হইল না ।

প্রভাতে একটু ঘুম আসিল । আবার একটা স্বপ্ন দেখিলাম । দেখিলাম, সম্মুখে অন্ধকারময় যমমূর্তি, বিকট দংষ্ট্রারাশি প্রকটিত করিয়া হাসিতেছে । আর ঘুমাইলাম না । পরদিন প্রাতে উঠিয়া দেখিলাম যে, আমার অত্যন্ত গা বেদনা হইয়াছে । পা ফুলিয়া উঠিয়াছে, বসিবার শক্তি নাই ।

যত দিন না গায়ের বেদনা আরাম হইল, তত দিন আমাকে কাজে কাজেই ব্রাহ্মণের গৃহে থাকিতে হইল । ব্রাহ্মণ ও তাঁহার গৃহিণী আমাকে যত্ন করিয়া রাখিলেন । কিন্তু মহেশপুর যাইবার কোন উপায় দেখিলাম না । কোন স্ত্রীলোকই পথ চিনিত না, অথবা যাইতে স্ট্রীকার করিল না । পুরুষে অনেকেই স্বীকৃত হইল—কিন্তু তাহাদিগের সঙ্গে একাকিনী যাইতে ভয় করিতে লাগিল । ব্রাহ্মণও নিষেধ করিলেন, বলিলেন, “উহাদিগের চরিত্র ভাল নহে, উহাদিগের সঙ্গে যাইও না । উহাদের কি মতলব বলা যায় না । আমি ভদ্রসন্তান হইয়া তোমার গ্রাম সুন্দরীকে পুরুষের সঙ্গে কোথাও পাঠাইতে পারি না ।” সুতরাং আমি নিরস্ত হইলাম ।

এক দিন শুনিলাম যে, ঐ গ্রামের কৃষ্ণদাস বসু নামক একজন ভদ্রলোক সপরিবারে কলিকাতায় যাইবেন । শুনিয়া আমি উত্তম সুযোগ বিবেচনা করিলাম । কলিকাতা হইতে আমার পিত্রালয় ও খণ্ডুরালয় অনেক দূর বটে, কিন্তু সেখানে আমার জ্ঞাতি খুল্লভাত বিষয় কস্মীর্ণপলক্ষে বাস করিতেন । আমি ভাবিলাম যে, কলিকাতায় গেলে অবশ্য খুল্লভাতের সন্ধান পাইব । তনি অবশ্য আমাকে পিত্রালয়ে পাঠাইয়া দিবেন । না হয় আমার পিতাকে সংবাদ দিবেন ।

আমি এই কথা ব্রাহ্মণকে জানাইলাম। ব্রাহ্মণ বলিলেন, “এ উত্তম বিবেচনা করিয়াছ। কৃষ্ণদাসবাবু আমার যজমান। সঙ্গে করিয়া লইয়া বলিয়া দিয়া আসিব। তিনি প্রাচীন, আর বড় ভাল মানুষ।”

ব্রাহ্মণ আমাকে কৃষ্ণদাস বাবুর কাছে লইয়া গেলেন। ব্রাহ্মণ কহিলেন, “এটি ভঞ্জলোকের কছা, বিপাকে পড়িয়া পথ হারাইয়া এ দেশে আসিয়া পড়িয়াছেন। আপনি যদি ইহাকে সঙ্গে করিয়া কলিকাতায় লইয়া যান, তবে এ অনাথা আপন পিত্রালয়ে পঁছছিতে পারে।” কৃষ্ণদাসবাবু সম্মত হইলেন। আমি তাঁহার অন্তঃপুরে গেলাম। পরদিন তাঁহার পরিবারস্থ স্ত্রীলোকদিগের সঙ্গে, বসু মহাশয়ের পরিবার কর্তৃক অনাদৃত হইয়াও, কলিকাতায় যাত্রা করিলাম। প্রথম দিন, চারি পাঁচ ক্রোশ হাঁটিয়া গঙ্গাতীরে আসিতে হইল। পরদিন নৌকায় উঠিলাম।

পঞ্চম পরিচ্ছেদ : বাজিয়ে যাব মল

আমি গঙ্গা কখনও দেখি নাই। এখন গঙ্গা দেখিয়া, আছন্দে প্রাণ ভরিয়া গেল। আমার এত দুঃখ, মুহূর্ত্তজ্ঞান সব ভুলিলাম। গঙ্গার প্রশস্ত হৃদয়! তাহাতে ছোট ছোট ঢেউ—ছোট ছোট উপর রৌদ্রের চিকিমিকি—যত দূর চক্ষু যায়, তত দূর জল জ্বলিতে জ্বলিতে ছুটিয়াছে—তীরে কুঞ্জের মত সাজান বৃক্ষের অনন্ত শ্রেণী; জলে কত রকমের কত নৌকা; জলের উপর দাঁড়ের শব্দ, দাঁড়ি-মাঝির শব্দ, জলের উপর কোলাহল, তীরে ঘাটে ঘাটে কোলাহল; কত রকমের লোক, কত রকমে স্নান করিতেছে। আবার কোথাও সাদা মেঘের মত অসীম সৈকত তুমি—তাঁতে কত প্রকারের পক্ষী কত শব্দ করিতেছে। গঙ্গা যথার্থ পুণ্যময়ী। অতৃপ্ত নয়নে কয় দিন দেখিতে দেখিতে আসিলাম।

ষে দিন কলিকাতায় পৌঁছিব, তাহার পূর্বদিন, যক্ষ্মার কিছু পূর্বে জোয়ার আসিল। নৌকা আর গেল না। একখানা ভজ্র গ্রামের একটা

বাঁধা ঘাটের নিকট আমাদের নৌকা লাগাইয়া রাখিল। কত সুন্দর জিনিস দেখিলাম। জেলেরা মোচার খোলার মত ডিক্কাতে মাছ ধরিতেছে, দেখিলাম; ব্রাহ্মণ পণ্ডিত ঘাটের রাণায় বসিয়া শাস্ত্রীয় বিচার করিতেছেন, দেখিলাম। কত সুন্দরী, বেশভূষা করিয়া জল লইতে আসিল। কেহ জল ফেলে, কেহ কলসী পুরে, কেহ আবার ঢালে, আবার পুরে, আর হাসে, গল্প করে, আবার ফেলে, আবার কলসী ভরে। দেখিয়া আমার প্রাচীন গীতটি মনে পড়িল,

একা কাঁকে কুম্ভ করি, কলসীতে জল ভরি,
 জলের ভিতরে শ্রামরায়।
 কলসীতে দিতে চেউ, আর না দেখিলাম কেউ।
 পুন কাহ্নু জলেতে লুকায়।

সেই দিন সেইখানে দুইটি মেয়ে দেখিয়াছিলাম, তাহাদের কখন ভুলিব না। মেয়ে দুইটির বয়স সাত আট বৎসর। দেখিতে বেশ, তবে পরম সুন্দরীও নয়। কিন্তু সাজিয়াছিল ভাল। কানে ছল, হাতে আর গলায় একখানা গহনা। ফুল দিয়া খোঁপা বেড়িয়াছে। রঙ্গ করা, শিউলীফুলে ছোবান, দুইখানি কালপেড়ে কাপড় পরিয়াছে। পায়ে চারি গাছি করিয়া মল আছে। কাঁকালে ছোট ছোট দুইটি কলসী আছে। তাহারা ঘাটের রাণায় নামিবার সময়ে জোয়ারের জলের একটা গান গায়িতে গায়িতে নামিল। গানটি মনে আছে, মিষ্ট লাগিয়াছিল, তাই এখানে লিখিলাম। একজন এক পদ গায়, আর একজন দ্বিতীয় পদ গায়। তাহাদের নাম শুনিলাম, অমলা আর নিশ্বলা। প্রথমে গায়িল,—

অমলা
 বানের ক্ষেতে, চেউ উঠেছে,
 বাঁশ তলাতে জল।
 আয় আয় সই, জল আনিগে
 জল আনিগে চল ॥

নিশ্চল

ঘাটটি কুড়ে, গাছটি বেড়ে,
ফুটল ফুলের দল ।
আয় আয় সই, জল আনিগে,
জল আনিগে চল ॥
অমলা

বিনোদ বেশে মুচ্কে হেসে,
খুলব হাসির কল ।
কলসী ধ'রে, গরব ক'রে
বাজিয়ে যাব মল ।
আয় আয় সই, জল আনিগে,
জল আনিগে চল ॥
নিশ্চল

গহনা গায়ে, আলতা পায়ে,
ককাদার আঁচল ।
টিমে চালে, তালে তালে,
বাজিয়ে যাব মল ।
আয় আয় সই, জল আনিগে,
জল আনিগে চল ॥
অমলা

যত ছেলে, খেলা ফেলে,
ফিরচে দলে দল ।
কত বুড়ী, জুজুবুড়ী
ধরবে কত জল,
আমরা মুচকে হেসে, বিনোদ বেশে
বাজিয়ে যাব মল ।
আমরা বাজিয়ে যাব মল,
সই, বাজিয়ে যাব মল ॥

দুই জনে

আয় আয় সই, জল আনিগে,

জল আনিগে চল ।

বালিকাসিঞ্চিরসে, এ জীবন কিছু শীতল হইল আমি
মনোযোগপূর্বক এই গান শুনিতেছি, দেখিয়া বসুজ মহাশয়ের
সহধর্ম্মিনী আমাকে জিজ্ঞাসা করিলেন, “ও ছাই গান আবার হাঁ করিয়
শুনচ কেন ?” আমি বলিলাম, “ক্ষতি কি ?”

বসুজপত্নী । ছুঁড়ীদের মরণ আর কি ? মল নাজানর আবার
গান !

আমি । ষোল বছরের মেয়ের মুখে ভাল শুনাইত না বটে, সাত
বছরের মেয়ের মুখে বেশ শুনায় । জোয়ান মিন্সের হাতের চড় চাপড়
জিনিস ভাল নহে বটে, কিন্তু তিন বছরের ছেলের হাতের চড়-চাপড়
বড় মিষ্ট ।

বসুজপত্নী আর কিছু না বলিয়া, ভারি হইয়া বসিয়া রহিলেন
আমি ভাবিতে লাগিলাম । ভাবিলাম, এ প্রভেদ কেন হয় ? এক
জিনিস দুই রকম লাগে কেন ? যে দান দরিদ্রকে দিলে পুণ্য হয়, তাহা
বড়মানুষকে দিলে খোষামোদ বলিয়া গণ্য হয় কেন ? যে সত্য ধর্ম্মের
প্রধান, অবস্থা বিশেষ তাহা আত্মপ্রাণ বা পরনিন্দা পাপ হয় কেন
যে ক্ষমা পরধর্ম্ম, দুষ্কৃতকারীর প্রতি প্রযুক্ত হইল, তাহা মহাপাপ
কেন ? সত্য সত্যই কেহ স্ত্রীকে বনে দিয়া আসিলে লোকে তাহাকে
মহাপাপী বলে ; কিন্তু রামচন্দ্র সীতাকে বনে দিয়াছিলেন, তাঁহাকে
কেহ মহাপাপী বলে না কেন ?

ঠিক করিলাম, অবস্থাভেদে এ সকল হয় । কথাটা আমার মনে
রহিল । আমি ইহার পর এক দিন যে নিলর্জ্জ কাজের কথা বলিব,
তাহা এই কথা মনে করিয়া করিয়াছিলাম । তাই এ গানটা এখানে
লিখিলাম ।

নৌকাপথে কলিকাতা আসিতে দূর হইতে কলিকাতা দেখিয়া,
বিস্মিত ও ভীত হইলাম । অট্টালিকার পর অট্টালিকা, বাড়ীর গায়ে

বাড়ী, বাড়ীর পিঠে বাড়ী, তার পিঠে বাড়ী, অট্টালিকার সমুদ্র ; —তাহার অন্ত নাই, সংখ্যা নাই, সীমা নাই । জাহাজের মাস্তুলের অরণ্য দেখিয়া জ্ঞান বুদ্ধি বিপর্যাস্ত হইয়া গেল । নৌকার অসংখ্য, অনন্ত শ্রেণী দেখিয়া মনে হইল, এত নৌকা মানুষে গড়িল কি প্রকারে ?* নিকটে আসিয়া দেখিলাম, তীরবর্তী রাজপথে গাড়ি পার্কা পিপড়ের সারির মত চলিয়াছে—যাহারা হাঁটিয়া যাইতেছে, তাহাদের সংখ্যার ত কথাই নাই । তখন মনে হইল, ইহার ভিতর খুড়াকে খুঁজিয়া বাহির করিব কি প্রকারে ? নদীসৈকতের বালুকারাশির ভিতর হইতে, চেনা বালুকাকণাটি খুঁজিয়া বাহির করিব কি প্রকারে ?

ষষ্ঠ পরিচ্ছেদ : সুবো

কৃষ্ণদাসবাবু কলিকাতায় কালীঘাটে পূজা দিতে আসিয়াছিলেন ভবানীপুরে বাসা করিলেন । আমাকে জিজ্ঞাসা করিলেন, “তোমার খুড়ার বাড়ী কোথায় ? কলিকাতায় না ভবানীপুরে ?”

তাহা আমি জানিতাম না ।

জিজ্ঞাসা করিলেন, “কলিকাতায় কোন্ জায়গায় তাহার বাসা ?”

তাহা আমি কিছুই জানিতাম না—আমি জানিতাম, যেমন মহেশপুর একখানি গণ্ডগ্রাম, কলিকাতা তেমনই একখানি গণ্ডগ্রাম মাত্র । একজন ভদ্রলোকের নাম করিলেই লোকে বলিয়া দিবে । এখন দেখিলাম যে, কলিকাতা অনন্ত অট্টালিকার সমুদ্রবিশেষ । আমার জ্ঞাতি খুড়াকে সন্ধান করিবার কোন উপায় দেখিলাম না । কৃষ্ণদাসবাবু আমার হইয়া অনেক সন্ধান করিলেন, কিন্তু কলিকাতায় একজন সামান্য গ্রাম্য লোকের ওরূপ সন্ধান করিলে কি হইবে ?

কৃষ্ণদাসবাবু কালীর পূজা দিয়া কাশী যাইবেন, কল্পনা ছিল । পূজা দেওয়া হইল, এক্ষণে সপরিবারে কাশী যাইবার উছোগ করিতে

* কলিকাতায় এক্ষণে নৌকার সংখ্যা পুস্ৰ্কার শতাংশও নাই ।

লাগিলেন। আমি কাঁদিতে লাগিলাম। তাঁহার পত্নী কাঁহলেন, “তুমি আমার কথা শুন। এখন কাহারও বাড়ীতে দাসীপনা কর। আজ সুবী আসিবার কথা আছে, তাঁকে বলিয়া দিব, বাড়ীতে গেমার চাকরাণী রাখিবে।”

আমি শুনিয়া আছড়াইয়া পড়িয়া উচ্চৈশ্বরে কাঁদিতে লাগিলাম। “শেষে কি কপালে দাসীপনা ছিল!” আমার ঠোট কাটিয়া রক্ত পড়িতেছিল। কৃষ্ণদাসবাবুর দয়া হইল সন্দেহ নাই, কিন্তু তিনি বলিলেন, “আমি কি করিব?” সে কথা সত্য;—তিনি কি করিবেন? আমার কপাল!

আমি একটা ঘরের ভিতর গিয়া একটা কোণে পড়িয়া কাঁদিতে লাগিলাম। সন্ধ্যার অল্প পূর্বে কৃষ্ণদাসবাবুর গিন্নী আমাকে ডাকিলেন। আমি বাহির হইয়া তাঁহার কাছে গেলাম। তিনি বলিলেন, “এই সুবো এঃছে। তুমি যদি ওদের বাড়ী ঝি থাক, তবে বলিয়া দিই।”

ঝি থাকিব না, না খাইয়া মরিব, সে কথা ত স্থির করিয়াছি;—কিন্তু এখনকার কথার নহে—এখন একবার সুবোকে দেখিয়া লইলাম। “সুবো” শুনিয়া আমি ভাবিয়া রাখিয়াছিলাম যে, “সাহেব সুবো” দরের একটা কি জিনিস—আমি তখন পাড়ার্গেয়ে মেয়ে। দেখিলাম, তা নয়—একটি জ্বীলোক—দেখিবার মত সামগ্রী। অনেক দিন এমন ভাল সামগ্রী কিছু দেখি নাই। মানুষটি আমারই বয়সী হইবে। রঙ আমা অপেক্ষা যে ফরসা তাও নয়। বেশভূষা এমন কিছু নয়, কানে গোটাকতক মাকড়ি, হাতে বালা, গলায় চীক, একখানা কাল-পেড়ে কাপড় পরা। তাতেই দেখিবার সামগ্রী। এমন মুখ দেখি নাই। যেন পদ্মটি ফুটিয়া আছে—চারি দিক্ হইতে সাপের মত কোঁকড়া চুলগুলি ফণা তুলিয়া পদ্মটা ঘেরিয়াছে। খুব বড় বড় চোখ—কখন স্থির, কখন হাসিতেছে। ঠোট দুইখানি পাতলা রান্ধা টুকটুকে ফুলের পাপড়ির মত উল্টান, মুখখানি ছোট, সবশুদ্ধ যেন একটি ফুটন্ত ফুল। গড়ন-পিটন কি রকম, তাহা ধরিতে পারিলাম না। আম-গাছের যে ডাল কচিয়া যায়, সে ডাল যেমন বাতাসে খেলে, সেই

রকম তাহার সর্বাঙ্গ খেলিতে লাগিল—যেমন নদীতে চেউ খেলে, তাহার শরীরে তেমনই কি একটা খেলিতে লাগিল—আমি কিছু ধরিতে পারিলাম না, তার মুখে কি একটা যেন মাখান ছিল, তাহাতে আমাকে যাছ করিয়া ফেলিল। পাঠককে স্মরণ করিয়া দিতে হইবে না যে, আমি পুরুষ মানুষ নহি—মেয়ে মানুষ—নিজেও এক দিন একট সৌন্দর্য্যগর্বিবতা ছিলাম। সুবোর সঙ্গে একটি তিন বছরের ছেলে—সেটিও তেমনই একটি আধফুটন্ত ফুল। উঠিতেছে, পড়িতেছে, বসিতেছে, খেলিতেছে, হেলিতেছে, ছলিতেছে, নাচিতেছে, দৌড়াইতেছে, হাসিতেছে, বকিতেছে, মারিতেছে, সকলকে আদর করিতেছে।

আমি অনিমেষলোচনে সুবোকে ও তার ছেলেকে দেখিতেছি দেখিয়া, কৃষ্ণদাস বাবুর গৃহিণী চটিয়া উঠিয়া বলিলেন, “কথার উত্তর দাও না যে—ভাব কি?”

আমি জিজ্ঞাসা করিলাম, “উনি কে?”

গৃহিণী ঠাকুরাণী ধমকাইয়া বলিলেন, “তাও কি বলিয়া দিতে হইবে? ও সুবো, আর কে?”

তখন সুবো একটু হাসিয়া বলিল, “তা মাসীমা, একটু বলিয়া দিতে হইবে কি? উনি নূতন লোক, আমায় ত চেনেন না।” এই বলিয়া সুবো আমার মুখপানে চাহিয়া বলিল, “আমার নাম সুভাষিণী গো—ইনি আমার মাসীমা, আমাকে ছেলেবেলা থেকে ওঁরা সুবো বলেন।”

তার পর কথার সূত্রটা গৃহিণী নিজ হস্তে তুলিয়া গাইলেন। বলিলেন “কলিকাতার রামরাম দত্তের ছেলের সঙ্গে ওর বিয়ে হয়েছে। ওঁরা বড় মানুষ। ছেলেবেলা থেকে ও শ্বশুরবাড়ীই থাকে—আমরা কখন দেখিতে পাই না। আমি কালীঘাটে এসেছি শুনে আমাকে একবার দেখা দিতে এসেছে। ওঁরা বড় মানুষ। বড় মানুষের বাড়ী তুমি কাজকর্ম করিতে পারিবে ত?”

আমি হরমোহন দত্তের মেয়ে, টাকার গদিতে শুইতে চাহিয়াছিলাম—আমি বড় মানুষের বাড়ী কাজ করিতে পারিব ত? আমার চোখে জলও আসিল; মুখে হাসিও আসিল।

তাহা আর কেহ দেখিল না—সুভাষিনী দেখিল। গৃহিণীকে বলিল, “আমি একটু আড়াল সে সকল কথা শুঁকে বলি গে; যদি উনি রাজি হন, তবে সঙ্গে করিয়া লইয়া যাইব। এই বলিয়া সুভাষিনী আমার হাত ধরিয়া টানিয়া একটা ঘরের ভিতর লইয়া গেল। সেখানে কেহ ছিল না। কেবল ছেলেটি মার সঙ্গে সঙ্গে দৌড়াইয়া গেল একখানা তক্তপোষ পাতা ছিল। সুভাষিনী তাহাতে বসিল—আমাকে হাত ধরিয়া টানিয়া বসাইল। বলিল, “আমার নাম না জিজ্ঞাসা করিতে বলিয়াছি। তোমার নাম কি ভাই?”

‘ভাই!’ যদি দাসীপনা করিতে পারি, তবে ইহার কাছে পারি মনে মনে ইহা ভাবিয়াই উত্তর করিলাম, “আমার দুইটি নাম—একটি চলিত, একটি অপ্রচলিত। যেটি অপ্রচলিত তাহাই ই’হাদিগকে বলিয়াছি; কাজেই আপনার কাছে এখন তাহাই বলিব আমার নাম কুমুদিনী।”

ছেলে বলিল, “কুমুদিনী।”

সুভাষিনী বলিল “আর নাম এখন নাই শুনিলাম, জাতি কায়স্থ বটে?”

হাসিয়া বলিলাম, “আমরা কায়স্থ।”

সুভাষিনী বলিল, “কার মেয়ে, কার বউ, কোথায় বাড়ী তাহা এখন জিজ্ঞাসা করিব না। এখন যাহা বলিব, তাহা শুন। তুমি বড় মানুষের মেয়ে, তাহা আমি জানিতে পারিয়াছি—তোমার হাতে গলায়, গহনার কালি আঙিও রহিয়াছে তোমাকে দাসীপনা করিতে বলিব না—তুমি কিছু কিছু রীতিতে জান না কি?”

আমি বলিলাম, “জানি। রান্নায় আমি পিত্রালয়ে যশস্বিনী ছিলাম।”

সুভাষিনী বলিল, “আমাদের বাড়ীতে আমরা সকলেই রীতি (মাঝখান থেকে ছেলে বলিল, “মা, আমি দাঁদি”) তবু, কলিকাতার রেওয়াজমত একটা পাচিকাও আছে; সে মার্গীটা বাড়ী যাইবে। (ছেলে বলিল, “ত মা বাবী দাই”) এখন মাকে বলিয়া তোমাকে তার

জায়গায় রাখাইয়া দিব। তোমাকে রাঁধুনের মত রাঁধিতে হইবে না।
আমরা সকলেই রাঁধিব, কারই সঙ্গে তুমি ছুই এক দিন রাঁধিবে।
কেমন রাজি ?”

ছেলে বলিল, “আজি ? ও আজি ?”

মা বলিল, “তুই পাঞ্জি।”

ছেলে বলিল, “আমি বাবু, বাবা পাঞ্জি।”

“অমন কথা বলতে নেই বাবা!” এই কথা ছেলেকে বলিয়া
আমার মুখ পানে চাহিয়া হাসিয়া সুভাষিনী বলিল, “নিত্যই বলে।”
আমি বলিলাম, “আপনার কাছে আমি দাসীপনা করিতেও রাজি।”

“আপনি কেন বল ভাই ? বল ত মাকে বলিও। সেই মাকে
লইয়া একটু গোল আছে। তিনি একটু খিটখিটে—তাকে বশ করিয়া
লইতে হইবে। তা তুমি পারিবে—আমি মানুষ চিনি। কেমন
রাজি ?”

আমি বলিলাম, “রাজি না হইয়া কি করি ? আমার আর উপায়
নাই।” আমার চক্ষুতে আবার জল আসিল।

সে বলিল, “উপায় নাই কেন ? রও ভাই, আমি আসল কথা
ভুলিয়া গিয়াছি। আমি আসিতেছি।”

সুভাষিনী ভেঁা করিয়া ছুটিয়া মাসীর কাছে গেল—বলিল, “হাঁ গা,
ইনি তোমাদের কে গা ?”

ঐটুকু পর্য্যন্ত আমি শুনিতে পাইলাম। তাঁর মাসী কি বলিলেন,
তাহা শুনিতে পাইলাম না। বোধ হয়, তিনি যতটুকু জানিতেন,
তাহাই বলিলেন। বলা বাহুল্য, তিনি কিছুই জানিতেন না;
পুরোহিতের কাছে যতটুকু শুনিয়াছিলেন, ততটুকু পর্য্যন্ত। ছেলেটি
এবার মার সঙ্গে যায় নাই—আমার হাত লইয়া খেলা করিতেছিল।
আমি তাহার সঙ্গে কথা কহিতেছিলাম। সুভাষিনী ফিরিয়া আসিল।

ছেলে বলিল, “মা, আঙ্গা হাত দেখ্।”

সুভাষিনী হাসিয়া বলিল, “আমি তা অনেকক্ষণ দেখিয়াছি।”
আমাকে বলিল, “চল, গাড়ি তৈয়ার। না যাব, আমি খয়িয়া লইয়া

যাইব। কিন্তু যে কথাটা বলিয়াছি—মাকে বশ করিতে হইবে।”

সুভাষিনী আমাকে টানিয়া লইয়া গিয়া গাড়িতে তুলিল। পুরোহিত মহাশয়ের দেওয়া রাজাপেড়ে কাপড় ছইখানির মধ্যে একখানি আমি পরিয়াছিলাম—আর একখানি দড়িতে শুকাইতেছিল—তাহা লইয়া যাইতে সময় দিল না। তাহার পরিবর্তে আমি সুভাষিনীর পুত্রকে কোলে লইয়া মুখচুসন করিতে করিতে চলিলাম।

সপ্তম পরিচ্ছেদ : কালির বোতল

মা—সুভাষিনীর শাশুড়ী। তাঁহাকে বশ করিতে হইবে—সুতরাং গিয়াই তাঁহাকে প্রণাম করিয়া পায়ের ধূলা লইলাম, তার পর এক নজর দেখিয়া লইলাম, মানুষটা কি রকম। তিনি তখন ছাদের উপর অঙ্কারে, একটা পাটা পাতিয়া, তাকিয়া মাথায় দিয়া শুইয়া পড়িয়া আছেন, একটা ঝি পা টিপিয়া দিতেছে। আমার বোধ হইল, একটা লম্বা কালির বোতল গলায় গলায় কালি ভরা, পাটীর উপর কাত হইয়া পড়িয়া গিয়াছে। পাকা চুলগুলি বোতলটির টিনের ঢাকনির* মত শোভা পাইতেছে। অঙ্কারটা বাড়াইয়া তুলিতেছে।

আমাকে দেখিয়া গৃহিণী ঠাকুরাণী বধুকে জিজ্ঞাসা করিলেন, “এটি কে?”

বধু বলিল, “তুমি একটি রাধুনী খুঁজিতেছিলে, তাই একে নিয়ে এসেছি।”

গৃহিণী। কোথায় পেলো ?

বধু। মাসীমা দিয়াছেন।

গৃ। বামন না কায়েৎ ?

ব। কায়েৎ।

গৃ। আঃ, তোমার মাসীমার পোড়া কপাল! কায়েতের মেহে

নিয়ে কি হবে ? এক দিন বামনকে ভাত দিতে হলে কি দিব ?

* Capsule

ব। রোজ ত আর বামনকে ভাত দিতে হবে না—যে কয়দিন চল
চলুক—তার পর বামনী পেলে রাখা যাবে—তা বামনের মেয়ের ঠাণ্ডা
বড়—আমরা তাঁদের রান্নাঘরে গেলে হাঁড়িকুড়ি ফেলিয়া দেন—আবার
পাতের প্রসাদ নিতে আসেন! কেন, আমরা কি মুচি?

আমি মনে মনে সুভাষিনীকে ভূয়সী প্রশংসা করিলাম—কালিভরা
লম্বা বোতলটাকে সে মুঠোর ভিতর আনিতে জানে দেখিলাম। গৃহিণী
বলিলেন, “তা সত্যি বটে মা—ছোট লোকের এত অহঙ্কার সওয়া যায়
না। তা এখন দিন কতক কায়েতের মেয়েই রেখে দেখি। মাইনে
কত বলেছে?”

ব। তা আমার সঙ্গে কোন কথা হয় নাই।

গৃ। হায় রে, কলিকালের মেয়ে! লোক রাখতে নিয়ে এসেছ,
তার মাইনের কথা কও নাই?

আমাকে গৃহিণী জিজ্ঞাসা করিলেন, “কি নেবে তুমি?”

আমি বলিলাম, “যখন আপনাদের আশ্রয় নিতে এসেছি, তখন যা
দিবেন তাই নিব।”

গৃ। তা বামনের মেয়েকে কিছু বেশী দিতে হয় বটে, কিন্তু তুমি
কায়েতের মেয়ে—তোমার তিন টাকা মাসে আর খোরাক-পোষাক
দিব!

আমার একটু আশ্রয় পাইলেই যথেষ্ট—সুতরাং তাহাতে সম্মত
হইলাম। বলা বাহুল্য যে, মাহিয়ানা লইতে হইবে শুনিয়াই প্রাণ
কাঁদিয়া উঠিল। আমি বলিলাম, “তাই দিবেন।”

মনে করিলাম, গোল মিটিল—কিন্তু তাহা নহে। লম্বা বোতলটায়
কালি অনেক। তিনি বলিলেন, “তোমার বয়স কি গা? অঙ্ককারে
বয়স ঠাণ্ডর পাইতেছি না—কিন্তু গলাটা ছেলেমানুষের মত বোধ
হইতেছে।”

আমি বলিলাম, “বয়স এই উনিশ-কুড়ি।”

গৃহিণী। তবে বাছ, অশ্রুত কাজের চেষ্টা দেখ গিয়া যাও। আমি
সমস্ত লোক রাখি না।

সুভাষিনী মাঝে হইতে বলিল, “কেন মা, সমস্ত লোকে কি কাজ কন্ম পারে না ?

গৃ। দূর বেটী, পাগলের মেয়ে। সমস্ত লোক কি লোক ভাল হয় ?

সু। সে কি মা ! দেশশুদ্ধ সব সমস্ত লোক কি মন্দ ?

গৃ। তা নাই হলো—তবে ছোট লোক, যারা খেটে খায় তারা কি ভাল ?

এবার কান্না রাখিতে পারিলাম না। কাঁদিয়া উঠিয়া গেলাম। কালির বোতলটা পুত্রবধূকে জিজ্ঞাসা করিল, “ছুঁড়ী চললো না কি ?

সুভাষিনী বলিল, “বোধ হয়।”

গৃ। তা যাক্ গে।

সু। কিন্তু গৃহস্থ বাড়ী থেকে না খেয়ে যাবে ? উহাকে কিছু খাওয়াইয়া বিদায় করিতেছি।

এই বলিয়া সুভাষিনী আমার পিছু পিছু উঠিয়া আসিল। আমাকে ধরিয়া আপনার শয়নগৃহে লইয়া গেল। আমি বলিলাম, “আর আমায় ধরিয়া রাখিতেছ কেন ? পেটের দায়ে, কি প্রাণের দায়ে, আমি এমন সব কথা শুনিবার জ্ঞাত থাকিতে পারিব না।”

সুভাষিনী বলিল, “থাকিয়া কাজ নাই। কিন্তু আমার অনুরোধে আজিকার রাত্রিটা থাক।”

কোথায় যাইব ? কাজেই চক্ষু মুছিয়া সে রাত্রিটা থাকিতে সন্মত হইলাম। এ কথা ও কথার পর সুভাষিনী জিজ্ঞাসা করিল, “এখানে যদি না থাক, তবে যাবে কোথায় ?”

আমি বলিলাম, “গঙ্গায়।”

এবার সুভাষিনীও একটু চক্ষু মুছিল। বলিল, “গঙ্গায় যাইতে হইবে না, আমি কি করি তা একটুখানি বসিয়া দেখ। গোলযোগ উপস্থিত করিও না—আমার কথা শুনিও।”

এই বলিয়া সুভাষিনী হারানী বলিয়া ঝিকে ডাকিল। হারানী সুভাষিনীর খাস্ ঝি। হারানী আসিল। মোটা মোটা, কালো

কুচ্‌কুচে, চল্লিশ পার, হাসি মুখে ধরে না, সকলটাতেই হাসি। একটু তিরবিরে। সুভাষিণী বলিল, “একবার তাঁকে ডেকে পাঠা।”

হারাগী বলিল, এখন অসময়ে আসিবেন কি? আমি ডাকিয়া পাঠাই বা কি করিয়া?”

সুভাষিণী জভঙ্গ করিল, “যেমন করে পারিস—ডাক গে যা।”

হারাগী হাসিতে হাসিতে চলিয়া গেল। আমি সুভাষিণীকে জিজ্ঞাসা করিলাম, “ডাকিতে পাঠাইলে কাকে? তোমার স্বামীকে?”

সু। না ত কি পাড়ার মুদি মিনসেকে এই রাত্রে ডাকিতে পাঠাইব?

আমি বলিলাম, “বলি, আমায় উঠিয়া যাইতে হইবে কি না, তাই জিজ্ঞাসা করিতেছিলাম।”

সুভাষিণী বলিল, “না। এইখানে বসিয়া থাক।”

সুভাষিণীর স্বামী আসিলেন। বেশ সুন্দর পুরুষ। তিনি আসিয়াই বলিলেন, “তলব কেন?” তারপর আমাকে দেখিয়া বলিলেন, “ইনি কে?”

সুভাষিণী বলিল, “ওঁর জন্তই তোমাকে ডেকেছি। আমাদের হাঁধুর্ন বাড়ী যাবে, তাই ওঁকে তার জায়গায় রাখিবার জন্ত আমি মাসার কাছ হইতে এনেছি। কিন্তু মা ওঁকে রাখিতে চান না।”

তার স্বামী বলিলেন, “কেন চান না?”

সু। সমস্ত বয়স।

সুভার স্বামী একটু হাসিলেন। বলিলেন, “তা আমায় কি করিতে হইবে?”

সু। ওঁকে রাখিয়ে দিতে হবে।

স্বামী। কেন?

সুভাষিণী, তাঁহার নিকট গিয়া, আমি না শুনিতে পাই, এমন স্বরে বলিল, “আমার হুকুম।”

কিন্তু আমি শুনিতে পাইলাম। তাঁর স্বামীও তেমনই স্বরে বলিলেন, “যে আজ্ঞা।”

সুভা। কখন পারিবে ?

স্বামী। খাওয়ার সময়।

তিনি গেলে আমি বলিলাম, “উনি যেন রাখাইলেন, কিন্তু এমন কটু কথা সয়ে আমি থাকি কি প্রকারে ?”

সুভাষিনী। সে পরের কথা পরে হবে। গঙ্গা ত আর এক দিনে বুজিয়া যাইবে না।

রাত্রি নয়টার সময়, সুভাষিনীর স্বামী (তাঁর নাম রমণবাবু) আহার করিতে আসিলেন। তাঁর মা কাছে গিয়া বসিল। সুভাষিনী আমাকে টানিয়া লইয়া চলিল, বলিল, “কি হয় দেখি গে, চল।”

আমরা আড়াল হইতে দেখিলাম, নানাবিধ ব্যঞ্জন রান্না হইয়াছে, কিন্তু রমণবাবু একবার একটু করিয়া মুখে দিলেন, আর সরাইয়া রাখিলেন। কিছু খাইলেন না। তাঁর মা জিজ্ঞাসা করিলেন, “কিছুই ত খেলি না বাবা।”

পুত্র বলিল, “ও রান্না ভূত-শ্বেত খেতে পারে না। বামন ঠাকুরাণীর রান্না খেয়ে খেয়ে অকুচি জন্মে গেছে। মনে করেছি কাল থেকে পিসীমার বাড়ী গিয়ে খেয়ে আসব।”

তখন গৃহিণী ছোট হয়ে গেলেন। বলিলেন, “তা করতে হবে না, যাছ। আমি আর এক রাঁধুনী আনাইতেছি।”

বাবু হাত ধুইয়া উঠিয়া গেলেন। দেখিয়া সুভাষিনী বলিল, “আমাদের জন্ম ভাই গুঁর খাওয়া হইল না। তা না হোক—কাজটা হইলে হয়।”

আমি অপ্রতিভ হইয়া কি বলিতেছিলাম, এমন সময় হারানী আসিয়া সুভাষিনীকে বলিল, “তোমার শাশুড়ী ডাকিতেছেন।” এই বলিয়া সে খামকা আমার দিকে চাহিয়া একটু হাসিল। আমি বুকিয়াছিলাম, হাসি তার রোগ, সুভাষিনী শাশুড়ীর কাছে গেল, আমি আড়াল হইতে শুনিতে লাগিলাম।

সুভাষিনীর শাশুড়ী বলিতে লাগিল, “সে কায়েৎ ছুঁড়ীটে চ’লে গেছে কি ?”

সুভা। না—তার এখনতু খাওয়া হয় নাই বলিয়া, যাইতে দিই
মাই।

গৃহিণী বলিলেন, “সে রাঁধে কেমন ?”

সুভা। তা জানি না।

গৃ। আজ না হয় সে নাই গেল। কাল তাকে দিয়া ছুই একখানা
রাঁধিয়ে দেখিতে হইবে।

সুভা। তবে তাকে রাখি গে।

এই বলিয়া সুভাষিণী আমার কাছে আসিয়া জিজ্ঞাসা করিল,
“ভাই, তুমি রাঁধিতে জান ত ?”

আমি বলিলাম, “জানি। তা ত বলেছি।”

সুভা। ভাল রাঁধিতে পার ত ?

আমি। কাল খেয়ে দেখে বুঝিতে পারিবে।

সুভা। যদি অভ্যাস না থাকে তবে বল, আমি কাছে বসিয়া
শিখিয়ে দিব।

আমি হাসিলাম। বলিলাম, “পরের কথা পরে হবে।”

অষ্টম পরিচ্ছেদ : বিবি পাণ্ডব

পরদিন রাঁধিলাম। সুভাষিণী দেখাইয়া দিতে আসিয়াছিল, আমি
ইচ্ছা করিয়া সেই সময়ে লঙ্কা ফোড়ন দিলাম—সে কাশিতে কাশিতে
উঠিয়া গেল, বলিল, “মরণ আর কি !”

রান্না হইলে বালকবালিকারা প্রথমে খাইল। সুভাষিণীর ছেলে অন্ন
ব্যঞ্জন বড় খায় না, কিন্তু সুভাষিণীর পাঁচ বৎসরের একটি মেয়ে ছিল।
সুভাষিণী তাহাকে জিজ্ঞাসা করিল, “কেমন রান্না হয়েছে হেমা ?”

সে বলিল, “বেশ! বেশ গো বেশ!” মেয়েটি বড় শ্লোক
বলিতে ভালবাসিত, সে আবার বলিল, “বেশ গো বেশ,

রাঁধ বেশ, বাঁধ কেশ,

বকুল ফুলের মালা।

রাজা সাড়ী, হাতে হাঁড়ী
 রাঁধছে গোয়ালার বালা ॥
 এমন সময়, বাজল বাঁশী,
 কদম্বের তলে ।
 কাঁদিয়ে ছেলে, রান্না ফেলে,
 রাঁধুনি ছোটে জলে ॥”

মা ধমকাইল, ‘নে শ্লোক রাখ্ ।’ তখন মেয়ে চুপ করিল ।

তার পর রমণবাবু খাইতে বসিলেন । আড়াল হইতে দেখিতে লাগিলাম । দেখিলাম, তিনি সমস্ত ব্যঞ্জনগুলি কুড়াইয়া খাইলেন । গৃহিণীর মুখে হাসি ধরে না । রমণবাবু জিজ্ঞাসা করিলেন, “আজ কে রেঁধেছ, মা ?”

গৃহিণী বলিলেন, “একটি নূতন লোক আসিয়াছে ।”

রমণবাবু বলিলেন, “রাঁধে ভাল ।” এই বলিয়া তিনি হাত ধুইয়া উঠিয়া গেলেন ।

তার পর কর্তা খাইতে বসিলেন । সেখানে আমি যাইতে পারিলাম না—গৃহিণীর আদেশমত বুড়া বামন ঠাকুরাণী কর্তার ভাত লইয়া গেলেন । এখন বুঝিলাম, গৃহিণীর কোথায় ব্যথা, কেন তিনি সমর্থবয়স্কা স্ত্রীলোক রাখিতে পারেন না । প্রতিজ্ঞা করিলাম, যত দিন এখানে থাকি, সে দিক্ মাড়াইব না ।

আমি সময়ান্তরে লোকজনের কাছে সংবাদ লইয়াছিলাম, কর্তার কেমন চরিত্র । সকলেই জানিত, তিনি অতি ভদ্র লোক—জিতেশ্রিয় । তবে কালির বোতলটায় গলায় গলায় কালি ।

বামন ঠাকুরাণী ফিরিয়া আসিলে তাঁহাকে জিজ্ঞাসা করিলাম যে, “কর্তা রান্না খেয়ে কি বললেন ?”

বামনী চটিয়া লাল ; চোঁচাইয়া উঠিয়া বলিল, “ও গো, বেশ রেঁধেছ গো, বেশ রেঁধেছ । আমরাও রাঁধতে জানি ; তা বুড়ো হলে কি আর দর হয় ! এখন রাঁধিতে গেলে রুপ-যৌবন চাই ।”

বুঝিলাম, কর্তা খাইয়া ভাল বলিয়াছেন । কিন্তু বামনীকে নিয়া

একটু রঙ্গ করিতে সাধ হইল। বলিলাম, “তা রূপ-যৌবন চাই বই কি বামন দিদি!—বুড়ীকে দেখিলে কার খেতে রোচে?”

দাঁত বাহির করিয়া অতি কৰ্কশ কণ্ঠে বামনী বলিল, “তোমারই বুঝি রূপ-যৌবন থাকিবে? মুখে পোকা পড়বে না?”

এই বলিয়া রাগের মাথায় একটা হাঁড়ি চড়াইতে গিয়া পাচিকা; দেবী হাঁড়িটা ভাঙ্গিয়া ফেলিলেন। আমি বলিলাম, “দেখিলে, দিদি! রূপযৌবন না থাকিলে হাতের হাঁড়ি ফাটে।”

তখন ব্রাহ্মণী ঠাকুরাণী অর্ধনগ্নাবস্থায় বেড়ী নিয়া আমাকে তাড়া করিয়া মারিতে আসিলেন। বয়োদোষে কানে একটু খাট, বোধ হয় আমার সকল কথা শুনিতে পান নাই। বড় কদর্য প্রত্যুত্তর করিলেন। আমারও রঙ্গ চড়িল। আমি বলিলাম, “দিদি, থামো। বেড়ী হাতে থাকিলেই ভাল।”

এই সময়ে সুভাষিণী সেই ঘরের ভিতর প্রবেশ করিল। বামনী রাগে তাহাকে দেখিতে পাইল না। আমাকে আবার তাড়াইয়া আসিয়া বলিল, “হারামজাদী! যা মুখে আসে তাই বলিবি! বেড়ী আমার হাতে থাকিবে না ত কি পায়ে দেবে নাকি? আমি পাগল!”

তখন সুভাষিণী জ্বলজ্ব করিয়া তাহাকে বলিল, “আমি লোক এনেছি, তুমি হারামজাদী, বলবার কে? তুমি বেরোও আমার বাড়ী থেকে।”

তখন পাচিকা শব্দব্যস্তে বেড়ী ফেলিয়া দিয়া কাঁদ কাঁদ হইয়া বলিল, “ও মা সে কি কথা গো! আমি কখন হারামজাদী বল্লেম! এমন কথা আমি কখন মুখেও আনি নে। তোমরা আশ্চর্য করিলে মা।”

শুনিয়া সুভাষিণী খিল্ খিল্ করিয়া হাসিয়া উঠিল। বামন ঠাকুরাণী তখন ডাক ছাড়িয়া কাঁদিতে আরম্ভ করিলেন,—বলিলেন, “আমি যদি হারামজাদী বলে থাকি, তবে আমি যেন গোম্ভায় যাই—”

(আমি বলিলাম, “বলাই। যাট্!”)

“আমি যেন যমের বাড়ী যাই—”

(আমি । সে কি দিদি ; এত সকাল সকাল ! ছি দিদি । আর ছু'দিন থাক না ।)

“আমার যেন নরকেও ঠাই হয় না—”

এবার আমি বলিলাম, “ওটি বলিও না, দিদি ! নরকের লোক যদি তোমার রান্না না খেলে, তবে নরক আবার কি ?”

বুড়ী কাঁদিয়া সুভাষিণীর কাছে নালিশ করিল, “আমাকে যা মুখে আসিবে, তাই বলিবে, আর তুমি কিছু বলিবে না ? আমি চল্লম গিল্লীর কাছে ।”

সুভা । বাছা, তা হলে আমাকেও বলিতে হইবে, তুমি এ'কে হারামজাদী বলেছ ।

বুড়ী তখন গালে চড়াইতে আরম্ভ করিল, “আমি কখন হারামজাদী বল্লম ! (এক ঘা)—আমি কখন হারামজাদী বল্লম !! (দুই ঘা)—আমি কখন হারামজাদী বল্লম !!! (তিন ঘা) ইতি সমাপ্ত ।

তখন আমরা বুড়ীকে কিছু মিষ্টি কথা বলিতে আরম্ভ করিলাম । প্রথম আমি বলিলাম, “হা গা বো ঠাকুরাণ—হারামজাদী বলতে তুমি কখন শুনিলে ? উনি কখন এ কথা বললেন ? কই আমি ত শূনি নাই ।”

বুড়ী তখন বলিল, “এই শুনিলে, বো দিদি ! আমার মুখে কি অমন সব কথা বেরোয় !”

সুভাষিণী বলিল. “তা হবে—বাহিরে কে কা'কে বলিতেছিল, সেই কথাটা আমার কানে গিয়া থাকিবে । বামুন ঠাকুরাণী কি তেমন লোক ! ওঁর রান্না কাল খেয়েছিলে ত ? এ কলিকাতার ভিতর অমন কেউ র'াধতে পারে না ।”

বামনী আমার দিকে চাহিয়া বলিল, “শুনলে গা ?”

আমি বলিলাম, “তা ত সবাই বলে । আমি অমন রান্না কখনও খাই নাই ।”

বুড়ী এক গাল হাসিয়া বলিল, “তা তোমরা বলবে বৈ কি মা ! তোমরা হলে ভাল মানুষের মেয়ে, তোমরা ত রান্না চেন । আহা !

এমন মেয়েকে কি আমি গালি দিতে পারি—এ কোন বড় ঘরের মেয়ে। তা তুমি দিদি ভেবে না, আমি তোমাকে রান্নাবান্না শিখিয়ে দিয়ে তবে যাব।”

বুড়ীর সঙ্গে এইরূপে আপোষ হইয়া গেল। আমি অনেক দিন খরিয়া কেবল কাঁদিয়াছিলাম। অনেক দিনের পর আজ হাসিলাম। সে হাসি-তামাসা দরিদ্রের নিধির মত, বড় মিষ্ট লাগিয়াছিল। তাই বুড়ীর কথাটা এত সবিস্তারে লিখিলাম। সেই হাসি আমি এ জন্মে ভুলিব না। আর কখন হাসিয়া তেমন সুখ পাইব না।

তার পর গৃহিণী আহায়ে বসিলেন। বসিয়া থাকিয়া যত্নপূর্ব্বক তাঁহাকে ব্যঞ্জনগুলি খাওয়াইলাম। মাগী গিলিল অনেক। শেষে বলিল, “রাঁধ ভাল ত গা। কোথায় রান্না শিখিলে?”

আমি বলিলাম, “বাপের বাড়ী।”

গৃহি। তোমার বাপের বাড়ী কোথায় গা?

আমি একটা মিছে কথা বলিলাম। গৃহিণী বলিলেন, “এ ত বড় মানুষের ঘরের মত রান্না। তোমার বাপ কি বড় মানুষ ছিলেন?”

আমি। তা ছিলেন।

গৃহি। তবে তুমি রাঁধিতে এসেছ কেন?

আমি। ছরাদস্থায় পড়িয়াছি।

গৃহি। তা আমার কাছে থাক, বেশ থাকিবে। তুমি বড় মানুষের মেয়ে, আমার ঘরে তেমনই থাকিবে।

পরে সুভাষিণীকে ডাকিয়া বলিলেন, “বৌ মা, দেখো গো, এঁকে যেন কেউ কড়া কথা না বলে—আর তুমি ত বলবেই না, তুমি তেমন মানুষের মেয়ে নও।”

সুভাষিণীর ছেলে সেখানে বসিয়াছিল। ছেলে বলিল, “আমি কলা কতা বলব।”

আমি বলিলাম, “বল দেখি!”

সে বলিল, “কলা চাতু (চাটু) হাঁলি—আল কি মা?”

সুভাষিণী বলিল, “আর তোর শাশুড়ী।”

ছেলে বলিল, “কৈ ছাছুলী ?”

সুভাষিণীর মেয়ে আমাকে দেখাইয়া বলিল, “ঐ তোর শাশুড়ী ”
তখন ছেলে বলিতে লাগিল, “কুমুড়িনী ছাছুলী ! কুমুড়িনী
ছাছুলী !”

সুভাষিণী আমার সঙ্গে একটা সম্বন্ধ পাতাইবার জন্ত বেড়াইতেছিল
ছেলে-মেয়ের মুখের এই কথা শুনিয়া সে আমাকে বলিল, “তবে আজ
হইতে তুমি আমার বেহাইন হইলে ।”

তার পর সুভাষিণী খাইতে বসিল । আমি তারও কাছে ষাওয়াইতে
বসিলাম । খাইতে খাইতে সে জিজ্ঞাসা করিল, “তোমার কয়টি বিয়ে,
বেহান ?”

কথাটা বুঝিলাম । বলিলাম, “কেন, রাগাটা দ্রৌপদীর মত লাগিল
না কি ?”

সুভা । ও ইয়াস্ ! বিবি পাণ্ডব ফাষ্ট কেলাস বাবচি ছিল এখন
আমার শাশুড়ীকে বুঝিতে পারিলে ত ?

আমি বলিলাম, “বড় নয় । কাঙ্গালের আর বড় মানুষের মেয়ের
সঙ্গে সকলেই একটু প্রভেদ করে ।”

সুভাষিণী হাসিয়া উঠিল । বলিল, “মরণ আর কি তোমার ! এই
বুঝি বুঝিয়াছ ? তুমি বড় মানুষের মেয়ে বলে বুঝি তোমার আদর
করেছেন ?”

আমি বলিলাম, “তবে কি ?”

সুভা । ওঁর ছেলে পেট ভরে খাবে, তাই তোমার এত আদর
এখন যদি তুমি একটু কোট কর, তবে তোমার মাহিনা ডবল হইয়া
যায় ।

আমি বলিলাম, “আমি মাহিয়ানা চাই না । না লইলে যদি কোন
গোলযোগ উপস্থিত হয়, এজ্ঞ হাত পাতিয়া মাহিয়ানা লইব লইয়া
তোমার নিকট রাখিব, তুমি কাঙ্গাল গরীবকে দিও ! আমি আশ্রয়
পাইয়াছি, এই আমার যথেষ্ট ।”

নবম পরিচ্ছেদ : পাকাচুলের সুখ দুঃখ

আমি আশ্রয় পাইলাম। আর একটি অমূল্য রত্ন পাইলাম—একটি হিতৈষিণী সখী। দেখিতে লাগিলাম যে, সুভাষিণী আমাকে আন্তরিক ভালবাসিতে লাগিল—আপনার ভগিনীর সঙ্গে যেমন ব্যবহার করিতে হয়, আমার সঙ্গে তেমনই ব্যবহার করিত। তাঁর শাসনে দাস-দাসীরাও আমাকে অমাগ্ন করিত না। এদিকে রান্নাবান্না সম্বন্ধেও সুখ হইল। সেই বুড়ী ব্রাহ্মণঠাকুরাণী,—তাহার নাম সোণার মা—তিনি বাড়ী গেলেন না। মনে করিলেন, তিনি গেলে আর চাকরিটি পাইবেন না, আমি কায়েমী হইব। তিনি এই ভাবিয়া নানা ছুতা করিয়া বাড়ী গেলেন না। সুভাষিণীর সুপারিসে আমরা ছুই জনেই রহিলাম। তিনি শাস্ত্রীকে বুঝাইলেন যে, কুমুদিনী ভক্তলোকের মেয়ে, একা সব রান্না পারিয়া উঠিবে না—আর সোণার মা বুড়া মানুষই বা কোথায় যায় ? শাস্ত্রী বলিল, “ছুই জনকেই কি রাখিতে পারি ? এত টাকা যোগায় কে ?”

বধু বলিল, “তা এক জনকে রাখিতে হলে সোণার মাকে রাখিতে হয়। কুমু এত পারবে না।”

গৃহিণী বলিলেন, “না না। সোণার মার রান্না আমার ছেলে খেতে পারে না। তবে ছুই জনেই থাক।”

আমার কষ্টনিবারণ জন্ত সুভাষিণী এই কৌশলটুকু করিল। গিন্নী তার হাতে কলের পুতুল ; কেন না, সে রমণের বৌ—রমণের বৌর কথা ঠেলে কার সাধ্য ? তাতে আবার সুভাষিণীর বুদ্ধি যেমন প্রখর, স্বভাবও তেমনই সুন্দর ! এমন বন্ধু পাইয়া, আমার এ দুঃখের দিনে একটু সুখ হইল।

আমি মাছ-মাংস রাখি, বা ছুই একখানা ভাল ব্যঞ্জন রাখি—বাকি সময়টুকু সুভাষিণীর সঙ্গে গল্প করি—তার ছেলে-মেয়ের সঙ্গে গল্প করি ; হলো বা স্বয়ং গৃহিণীর সঙ্গে একটু ইয়ারকি করি। কিন্তু শেষ কাজটায়

একটা বড় গোলে পড়িয়া গেলাম গৃহিণীর বিশ্বাস, তাঁর বয়স কাঁচা, কেবল অদৃষ্টদোষে গাছগতক চুল পাকিয়াছে, তাহা তুলিয়া দিলেই তিনি আবার যুবতী হইতে পারেন। এই জন্য তিনি লোক পাইলেই এবং অবসর পাইলেই পাকা চুল তুলাইতে বসিতেন। এক দিন আমাকে এই কাজে বেগার ধরিলেন : আমি কিছু ক্ষিপ্রহস্ত, শীঘ্র শীঘ্র ভাদ্র মাসের উলু স্নেহে সাফ করিতেছিলাম। দূর হইতে দেখিতে পাইয়া সুভাষিণী আমাকে অঙ্গুলির ইঙ্গিতে ডাকিল। আমি গৃহিণীর কাছ হইতে ছুটি লইয়া বধূর কাছে গেলাম। সুভাষিণী বলিল, “এ কি কাণ্ড ! আমার শাশুড়ীকে নেড়া-মুড়া করিয়া দিতেছ কেন ?”

আমি বলিলাম, “ও পাপ একদিনে চুকানই ভাল।”

সুভা। তা হলে কি টেঁকতে পারবে ? যাবে কোথায় ?

আমি আমার হাত ধামে না যে

সুভা। মরণ আর কি ! তুই একগাছি তুলে চলে আসতে পার না !

আমি। তোমার শাশুড়ী যে ছাড়ে না

সুভা। বল গে যে, কই, পাকা চুল ত বেণী দেখিতে পাই না— এই ব'লে চ'লে এসো।

আমি হাসিয়া বলিলাম, “এমন দিনে ডাকাতি কি করা যায় ? লোকে বলবে কি ? এ যে আমার কালাদীঘির ডাকাতি।”

সুভা। কালাদীঘির ডাকাতি কি ?

সুভাষিণী সঙ্গ কথ্য কহিতে আমি একটু আত্মবিস্মৃত হইতাম— হঠাৎ কালাদীঘির কথা অসাবধানে মুখ দিয়া বাহির হইয়াছিল ! কথা চাপিয়া গেলাম বলিলাম, “সে গল্প আর একদিন করিব।”

সুভা। আমি যা বলিলাম, তা একবার বলিয়াই দেখ না ? আমার অনুবোধে।

হাসিতে হাসিতে আমি গিন্নীর কাছে গিয়া আবার পাকা চুল তুলিতে বসিলাম। তুই চারি গাছা তুলিয়া বলিলাম, “কৈ আর বড় পাকা দেখিতে পাই না। তুই এক গাছা রহিল, কাল তুলে দিব।”

মাগী এক গাল হাসিল। বলিল, “আবার বেটীরা বলে, সব চুলই পাকা।”

সে দিন আমার আদর বাড়িল। কিন্তু যাহাতে দিন দিন বসিয়া বসিয়া পাকা চুল তুলিতে না হয়, সে ব্যবস্থা করিব মনে মনে স্থির করিলাম। বেতনের টাকা পাইয়াছিলাম, তাহা হইতে একটা টাকা হারাণীর হাতে দিলাম। বলিলাম, “একটা টাকার এক শিশি কলপ কারও হাত দিয়া কিনিয়া আনিয়া দে।” হারাণী হাসিয়া কুটপাট। হাসি থামিলে বলিল, “কলপ নিয়ে কি করবে গা? কার চুলে দেবে?” আমি। বামন ঠাকুরাণীর।

এবার হারাণী হাসিতে হাসিতে বসিয়া পড়িল। এমন সময়ে বামন ঠাকুরাণী সেখানে আসিয়া পড়িল। তখন সে, হাসি থামাইবার জন্ত মুখে কাপড় গুঁজিয়া দিতে লাগিল। কিছুতেই থামাইতে না পারিয়া সেখান হইতে পলাইয়া গেল। বামন ঠাকুরাণী বলিলেন, “ও অত হাসিতেছে কেন?”

আমি বলিলাম, “ওর অস্ত্র কাজ ত দেখি না। এখন আমি বলিয়াছিলাম যে, বামন ঠাকুরাণীর চুলে কলপ দিয়া দিলে হয় না? তাই অমন করছিল।”

বামন ঠা। তা অত হাসি কিসের? দিলেই বা ক্ষতি কি? শোণের হুড়ি শোণের হুড়ি ব’লে ছেলেগুলো খেপায়, তা সে দায়ে ত বাঁচব!”

সুভাষিণীর মেয়ে হেমা অমনই আরম্ভ করিল,

“চলে বুড়ী, শোণের হুড়ী,
খোঁপায় ঘেঁট ফুল।
হাতে নড়ি, গলায় দড়ী,
কানে জোড়া ছল।”

হেমার ভাই বলিল, “জোলা ছম্!” তখন কাহারও উপর জোলা ছম্ পড়িবে আশঙ্কায় সুভাষিণী তাহাকে সরাইয়া লইয়া গেল।

বুঝিলাম, বামনীর কলপে বড় ইচ্ছা। বলিলাম, “আচ্ছা, আমি

কলপ দিয়া দিব।”

বামনী বলিল, “আচ্ছা, তাই দিও। তুমি বেঁচে থাক, তোমার সোণার গহনা হোক। তুমি খুব রাঁধতে শেখ।”

হারাণী হাসে, কিন্তু কাজের লোক। শীঘ্র এক শিশি উত্তম কলপ আনিয়া দিল। আমি তাহা হাতে করিয়া গিন্নীর পাকা চুল তুলিতে গেলাম। গিন্নী জিজ্ঞাসা করিলেন, “হাতে কি ও?”

আমি বলিলাম, “একটা আরক। এটা চুলে মাথাইলে সব পাকা চুল উঠিয়া আসে, কাঁচা চুল থাকে।”

গৃহিণী বলিলেন, “বটে, এমন আশ্চর্য আরক ত কখন শুনি নাই। ভাল, মাথাও দেখি। দেখিও কলপ দিও না যেন।”

আমি উত্তম করিয়া তাঁহার চুলে কলপ মাথাইয়া দিলাম। দিয়া “পাকা চুল আর নাই,” বলিয়া চলিয়া গেলাম। নিয়মিত সময় উত্তীর্ণ হইলে তাঁহার সমস্ত চুলগুলি কাল হইয়া গেল। দুর্ভাগ্যবশতঃ হারাণী ঘরঝাঁট দিতে দিতে দেখিতে পাইল। তখন সে ঝাঁটা ফেলিয়া দিয়া, মুখে কাপড় গুঁজিয়া হাসিতে হাসিতে সদর-বাড়ী চলিয়া গেল। সেখানে “কি কি? কি কি?” এই রকম একটা গোলযোগ হইলে, সে আবার ভিতর বাড়ীতে আসিয়া, মুখে কাপড় গুঁজিতে গুঁজিতে ছাদের উপর চলিয়া গেল। সেখানে সোণার মা চুল শুকাইতেছিল; সে জিজ্ঞাসা করিল, “কি হয়েছে?” হারাণী হাসির জ্বালায় কথা কহিতে পারিল না; কেবল হাত দিয়া মাথা দেখাইতে লাগিল। সোণার মা কিছু বুঝিতে না পারিয়া, নীচে আসিয়া দেখিল যে, গৃহিণীর মাথার চুল সব কালো—সে ফুকুরিয়া কাঁদিয়া উঠিল। বলিল, “ও মা! এ কি হলো গো! তোমার মাথার সব চুল কালো হয়ে গেছে গো! ওমা কে না জানি তোমায় ওষুধ করিল!”

এমন সময় সুভাষিনী আসিয়া আমাকে পাকড়াইল—হাসিতে হাসিতে বলিল, “পোড়ারমুখী ও করেছ কি, মার চুলে কলপ দিয়াছ?”
আমি। হঁ!

সুভা। তোমার মুখে আগুন! কি কাণ্ডখানা হয় দেখ!

আমি। তুমি নিশ্চিত থাক।

এমন সময়ে গৃহিণী স্বয়ং আমাকে তলব করিলেন। বলিলেন,

“হাঁ গা কুমো! তুমি কি আমার মাথায় কলপ দিয়াছ?”

দেখিলাম, গৃহিণীর মুখখানা বেশ প্রসন্ন। আমি বলিলাম, “অমন কথা কে বললে মা!”

গৃ। এই যে সোণার মা বলছে!

আমি। সোণার মার কি? ও কলপ নয় মা, আমার ওষুধ।

গৃ। তা বেশ ওষুধ বাছ। আরসি একখানা আন দেখি।

একখানা আরসি আনিয়া দিলাম। দেখিয়া গৃহিণী বলিলেন, “ও মা, সব চুল কালো হয়ে গেছে। আঃ, আবাগের বেটা, লোকে এখনই বলবে কলপ দিয়েছে।”

গৃহিণীর মুখে হাসি ধরে না। সে দিন সন্ধ্যার পর আমার রান্নার সুখ্যাতি করিয়া আমার বেতন বাড়াইয়া দিলেন। আর বলিলেন, “বাছ! কেবল কাচের চুড়ি হাতে দিয়া বেড়াও, দেখিয়া কষ্ট হয়।” এই বলিয়া তিনি নিজের বহুকালপরিত্যক্ত এক জোড়া সোণার বালা আমায় বখশিস করিলেন। লইতে, আমার মাথা কাটা গেল—চোখের জল সামলাইতে পারিলাম না। কাজেই “লইব না” কথাটা বলিবার অবসর পাইলাম না।

একটু অবসর পাইয়া বুড়ো বামন ঠাকুরাণী আমাকে ধরিল। বলিল, “ভাই, আর সে ওষুধ নেই কি?”

আমি। কোন্ ওষুধ? বামনীকে তার স্বামী বশ করবার জন্তে যা দিয়েছিলেন?

বামনী। দূর হ! একেই বলে ছেলে বুদ্ধি। আমার কি সে সামগ্রী আছে?

আমি। নেই? সে কি গো? একটাও না?

বামনী। তোদের বুঝি পাঁচটা করে থাকে?

আমি। তা নইলে আর অমন রাঁধি? জ্যোপদী না হলে ভাল রাঁধা যায়! গোটা পাঁচেক ঘোটাও না, রান্না খেয়ে লোকে অজ্ঞান

হবে ।

বামনী দীর্ঘনিশ্বাস ফেলিল । বলিল, “একটাই ঘোটে না, ভাই—তার আবার পাঁচটা ! মুসলমানের হয়, যত দোষ হিন্দুর মেয়ের । আর হবেই বা কিসে ? এই ত শোণের মুড়ী চুল ! তাই বলছিলাম, বলি সে ওষুট্টা আর আছে, যাতে চুল কালো হয় ?”

আমি । তাই বল ! আছে বৈ কি ।

আমি তখন কলপের শিশি বামন ঠাকুরাণীকে দিয়া গেলাম । ব্রাহ্মণ ঠাকুরাণী, রাত্রিতে জলযোগান্তে শয়নকালে, অন্ধকারে, তাহা চুলে মাখাইয়াছিলেন ; কতক চুলে লাগিয়াছিল, কতক চুলে লাগে নাই। কতক বা মুখে-চোখে লাগিয়াছিল । সকাল বেলা যখন তিনি দর্শন দিলেন, তখন চুলগুলি পাঁচরঙ্গা বেড়ালের লোমের মত, কিছু সাদা, কিছু রান্ধা, কিছু কালো ; আর মুখখানি কতক মুখপোড়া বাঁদরের মত, কতক মেনি বেড়ালের মত । দেখিবামাত্র পৌরবর্গ উচ্চৈঃস্বরে হাসিয়া উঠিল । সে হাসি আর থামে না । যে যখন পাটিকাকে দেখে, সে তখনই হাসিয়া উঠে । হারাণী হাসিতে হাসিতে বেদম হইয়া সুভাষিনীর পায়ে আছড়াইয়া পড়িয়া, হাঁপাইতে হাঁপাইতে বলিল, “বৌঠাকুরাণী, আমাকে জবাব দাও, আমি এমন হাসির বাড়ীতে থাকিতে পারিব না—কোন দিন দম বন্ধ হইয়া মরিয়া যাইব ।”

সুভাষিনীর মেয়েও বুড়ীকে জ্বালাইল, বলিল, “বুড়ী পিসী—সাক্ত সাজালে কে ?

“যম বলেছে, সোণার চাঁদ
এস আমার ঘরে ।

তাই ঘাটের সজ্জা সাজিয়ে দিলে
সিঁছরে গোবরে ।”

একদিন একটা বিড়াল হাঁড়ি হইতে মাছ খাইয়াছিল, তাহার মুখে কালি-ঝুলি লাগিয়াছিল । সুভাষিনীর ছেলে তাহা দেখিয়াছিল । সে বুড়ীকে দেখিয়া বলিল, “মা ! বুলা পিচী হাঁলি কেয়েসে ।”

অথচ বামন ঠাকুরাণীর কাছে, আমার ইঞ্জিতমত, কথাটা কেহ

ভাঙিল না। তিনি অকাতরে সেই বানরমাজ্জারবিমিশ্র কাণ্ডি সকলের সম্মুখে বিকশিত করিতে লাগিলেন হাসি দেখিয়া তিনি সকলকে জিজ্ঞাসা করিতে লাগিলেন, “তোমরা কেন হাসচ গা?”

সকলেই আমার ইঙ্গিতমত বলিল, “ঐ ছেলে কি বলচে শুনচো না? বলে, বুলী পিচী হালি কেয়ে? কাল রাতে কে তোমার হাঁড়িশালে হাঁড়ি খেয়ে গিয়েছে, তাই সবাই বলাবলি করচে, বলি সোণার মা কি বুড়া বয়সে এমন কাজ করবে?”

বুড়ী তখন গালির হড়া আরম্ভ করিল—“সর্বনাশীরা! শতেকজোয়ারীরা! আবাগীরা!”—ইত্যাদি ইত্যাদি মন্তোচ্চারণ-পূর্বক তাহাদিগকে এবং তাহাদিগের স্বামী-পুত্রকে গ্রহণ করিবার জন্ত যমকে অনেক বার তিনি আমন্ত্রণ করিলেন—কিন্তু যমরাজ সে বিষয়ে আপাততঃ কোন আগ্রহ প্রকাশ করিলেন না ঠাকুরাণীর চেহারাখানা সেই রকম রহিল তিনি সেই অবস্থায় রমণবাবুকে অন্ন দিতে গেলেন। রমণবাবু দেখিয়া হাসি চাপিতে গিয়া বিষম খাইলেন, আর তাহার খাওয়া হইল না। শুনিলাম, রামরাম দত্তকে অন্ন দিতে গেলে, কর্তা মহাশয় তাঁহাকে দূর দূর করিয়া তাড়াইয়া দিয়াছিলেন।

শেষে দয়া করিয়া সুভাষিনী বুড়ীকে বলিয়া দিল, “আমার ঘরে বড় আয়না আছে মুখ দেখ গিয়া।”

বুড়ী গিয়া মুখ দেখিল তখন সে উচ্চৈঃস্বরে কাঁদিতে লাগিল এবং আমাকে গালি পাড়িতে লাড়িল আমি বুঝাইতে চেষ্টা করিলাম যে, আমি চুলে মাখাইতে বলিয়াছিলাম, মুখে মাখাইতে বলি নাই। বুড়ী তাহা বুঝিল না। আমার মুণ্ডভোজনের জন্ত যম পুনঃ পুনঃ নিমন্ত্রিত হইতে লাগিলেন। শুনিয়া সুভাষিনীর মেয়ে শ্লোক পড়িল—

“যে ডাকে যমে।

তার পরমাই কমে।

তার মুখে পড়ুক ছাই।

বুড়ী মরে যা না ভাই।”

শেষে আমার সেই তিন বৎসর বয়সের জামাতা, একখানা রাঁধিবার

চেলা কাঠ লইয়া গিয়া বৃড়ীর পিঠে বসাইয়া দিল। বলিল, “আমাল্ চাচুলী।” তখন বৃড়ী আছাড়ায়া পড়িয়া উঠেঃস্বরে কাঁদিতে লাগিল। সে যত কাঁদে, আমার জামাই তত হাততালি দিয়া নাচে, আর বলে, “আমাল্ চাচুলী, আমাল্ চাচুলী!” আমি গিয়া তাঁকে কোলে নিয়া, তার মুখচুষন করিলে তবে থামিল।

দশম পরিচ্ছেদ : আশার প্রদীপ

সেই দিন বৈকালে সুভাষিণী আমার হাত ধরিয়া টানিয়া লইয়া গিয়া নিভৃত্তে বসাইল। বলিল, “বেহান! তুমি সেই কালাদীঘির ডাকাতির গল্পটি বলিবে বলিয়াছিলে—আজিও বল নাই। আজ বল না—শুনি।”

আমি অনেকক্ষণ ভাবিলাম। শেষে বলিলাম, “সে আমারই হতভাগ্যের কথা। আমার বাপ বড় মানুষ, এ কথা বলিয়াছি। তোমার স্বশুরও বড় মানুষ—কিন্তু তাঁহার তুলনায় কিছুই নহেন। আমার বাপ আজিও আছেন—তাঁহার সেই অতুল ঐশ্বর্য এখনও আছে, আজও তাঁহার হাতীশালে হাতী বাঁধা। আমি যে রাখিয়া খাইতেছি, কালাদীঘির ডাকাতিই তাহার কারণ।”

এই পর্য্যন্ত বলিয়া ছুই জনেই চুপ করিয়া রহিলাম। সুভাষিণী বলিল, “তোমার যদি বলিতে কষ্ট হয়, তবে নাই বলিলে। আমি না জানিয়াই শুনিতে চাহিয়াছিলাম।”

আমি বলিলাম, “সমস্তই বলিব। তুমি আমাকে যে স্নেহ কর, আমার যে উপকার করিয়াছ, তাহাতে তোমাকে বলিতে কোন কষ্ট নাই।”

আমি বাপের নাম বলিলাম না, বাপের বাড়ীর গ্রামের নাম বলিলাম না। স্বামীর বা স্বশুরের নাম বলিলাম না। স্বশুরবাড়ীর গ্রামের নাম বলিলাম না। আর সমস্ত বলিলাম, সুভাষিণীর সঙ্গে সাক্ষাৎ হওয়া পর্য্যন্ত বলিলাম। শুনিতে শুনিতে সুভাষিণী কাঁদিতে

লাগিল। আমিও যে বলিতে বলিতে মধ্যে মধ্যে কাঁদিয়া ফেলিয়া-
ছিলাম, তাহা বলা বাহুল্য।

সে দিন এই পর্য্যন্ত। পরদিন সুভাষিনী আমাকে আবার নিভূতে
লইয়া গেল। বলিল, “বাপের নাম বলিতে হইবে।”

তাহা বলিলাম।

“তাঁর বাড়ী যে গ্রামে, তাহাও বলিতে হইবে।”

তাও বলিলাম।

সু। ডাকঘরের নাম বল।

আ। ডাকঘর! ডাকঘরের নাম ডাকঘর।

সু। দূর পোড়ারমুখী! যে গ্রামে ডাকঘর, তার নাম।

আমি। তা ত জানি না। ডাকঘরই জানি।

সু। বলি, যে গ্রামে তোমাদের বাড়ী, সেই গ্রামেই ডাকঘর
আছে, না অগ্ন গ্রামে?

আমি। তা ত জানি না।

সুভাষিনী বিষণ্ণ লইল। আর কিছু বলিল না। পরদিন সেইরূপ
নিভূতে বলিল, “তুমি বড় ঘরের মেয়ে, কত কাল আর রাঁধিয়া খাইবে?
তুমি গেলে আমি বড় কাঁদিব—কিন্তু আমার সুখের জগ্ন তোমার
সুখের ক্ষতি করি, এমন পাপিষ্ঠা আমি নই। তাই আমরা পরামর্শ
করিয়াছি—”

কথা শেষ না হইতে হইতে আমি জিজ্ঞাসা করিলাম, “আমরা
কে কে?”

সু। আমি আর র-বাবু।

র-বাবু কি না রমণবাবু। এইরূপে সুভাষিনী আমার কাছে
স্বামী নাম ধরিত। তখন সে বলিতে লাগিল, “পরামর্শ করিয়াছি
যে, তোমার বাপকে পত্র লিখিব যে, তুমি এইখানে আছ, তাই কাল
ডাকঘরের কথা জিজ্ঞাসা করিতেছিলাম।”

আমি। তবে সকল কথা তাঁহাকে বলিয়াছ?

সু। বলিয়াছি—দোষ কি?

আমি। দোষ কিছু না। তার পর ?

সু। এখন মহেশপুরেই ডাকঘর আছে, বিবেচনা করিয়া পত্র লেখা হইল।

আমি। পত্র লেখা হইয়াছে না কি ?

সু। হাঁ।

আমি আহ্লাদে আটখানা হইলাম। দিন গণিতে লাগিলাম, কত দিনে পত্রের উত্তর আসিবে কিন্তু কোন উত্তর আসিল না। আমার কপাল পোড়া—মহেশপুরে কোন ডাকঘর ছিল না। তখন গ্রামে গ্রামে ডাকঘর হয় না। ভিন্ন গ্রামে ডাকঘর ছিল—আমি রাজার ঢুলালী—অত খবর রাখিতাম না। ডাকঘরের ঠিকানা না পাইয়া, কলিকাতার বড় ডাকঘরে রমণবাবুর চিঠি খুলিয়া ফেরত পাঠাইয়া দিয়াছিল।

আমি আবার কাঁদিতে আরম্ভ করিলাম। কিন্তু র-বাবু—নাছোড়। সুভাষিণী আসিয়া আমাকে বলিল, “এখন স্বামীর নাম বলিতে হইবে।”

আমি তখন লিখিতে শিখিয়াছিলাম স্বামীর নাম লিখিয়া দিলাম। পরে জিজ্ঞাসা হইল, “স্বস্তুরের নাম ?”

তাও লিখিলাম।

“গ্রামের নাম ?”

তাও বলিয়া দিলাম।

“ডাকঘরের নাম ?”

বলিলাম, “তা কি জানি ?”

শুনিলাম, রমণবাবু সেখানেও পত্র লিখিলেন। কিন্তু কোন উত্তর আসিল না। বড় বিষন্ন হইলাম কিন্তু একটা কথা তখন মনে পড়িল, আমি আশায় বিহ্বল হইয়া পত্র লিখিতে বারণ করি নাই। এখন আমার মনে পড়িল, ডাকাতে আমাকে কাড়িয়া লইয়া গিয়াছে ; আমার কি জ্ঞাতি আছে ? এই ভাবিয়া, স্বস্তুর-স্বামী আমাকে প্রত্যাখ্যান করিবেন সন্দেহ নাই। সে স্থলে, পত্র লেখা ভাল হয় নাই। এ কথা

শুনিয়া সুভাষিনী চুপ করিয়া রহিল ।

আমি এখন বুঝিলাম যে, আমার আর ভরসা নাই । আমি শয্যা
লইলাম ।

একাদশ পরিচ্ছেদ : একটা চোরা চাহনি

এক দিবস প্রাতে উঠিয়া দেখিলাম, কিছু ঘটার আয়োজন । রমণ
বাবু উকীল । তাঁহার একজন বড় মোয়াক্কেল ছিল । দুই দিন ধরিয়া
শুনিতেছিলাম, তিনি কলিকাতায় আসিয়াছেন । রমণবাবু ও তাঁহার
পিতা সর্বদা তাঁহার বাড়ীতে যাতায়াত করিতেছিলেন । তাঁহার পিতা
যাতায়াত করিয়াছিলেন, তাহার কারণ এই যে, তাঁহার সহিত কারবার-
ঘটিত কিছু সম্বন্ধ ছিল । আজ শুনিলাম, তাঁহাকে মধ্যাহ্নে আহ্বারের
নিমন্ত্রণ করা হইয়াছে । তাই পাকশালের কিছু বিশেষ আয়োজন
হইতেছে ।

রান্না ভাল চাই—অতএব পাকের ভারটা আমার উপর পড়িল ।
যত্ন করিয়া পাক করিলাম । আহ্বারের স্থান অস্তঃপুরেই হইল ।
রামরামবাবু, রমণবাবু ও নিমন্ত্রিত ব্যক্তি আহ্বারে বসিলেন । পরিবেশনের
ভার বুড়ীর উপর—আমি বাহিরের লোককে কখন পরিবেশন করি না ।

বুড়ী পরিবেশন করিতেছে—আমি রান্নাঘরে আছি—এমন সময়ে
একটা গোলযোগ উপস্থিত হইল । রমণবাবু বুড়ীকে বড় ধমকাইতে-
ছিলেন । সেই সময়ে এক জন রান্নাঘরের বি আসিয়া বলিল, “ইচ্ছা
করে লোককে অপ্ৰতিভ করা ।”

জিজ্ঞাসা করিলাম, “কি হয়েছে ?”

বি বলিল, “বুড়ী দাদাববুর বাটিতে (বুড়া বি, দাদাবাবু বলিত)
—বাটিতে ডাল দিতেছিল—তিনি তা দেখেও উচ্ছ । উচ্ছ । ক’রে হাত
বাড়িয়ে দিলেন—সব ডাল হাতে পড়িয়া গেল ।”

আমি এদিকে শুনিতেছিলাম, রমণবাবু বামনীকে ধমকাইতেছিলেন,
“পরিবেশন করিতে জান না ত এসো কেন ? আর কাকেও খাল দিতে

পার নি ৫”

রামরামবাবু বলিলেন, “তোমার কণ্ঠ নয়! কুমোকে পাঠাইয়া দাও গিয়া।”

গৃহিণী সেখানে নাই, বারণ করে কে? এদিকে খোদ কর্তার হুকুম—অমাগ্নই বা করি কি প্রকারে? গেলেই গিন্নী বড় রাগ করিবেন, তাও জানি। দুই চারিবার বুড়ীকে বুঝাইলাম—বলিলাম, “একটু সাবধান হ’য়ে দিও থুইও”—কিন্তু সে ভয়ে আর যাইতে স্মীকৃত হইল না। কাজেই, আমি হাত ধুইয়া, মুখ মুছিয়া, পরিষ্কার হইয়া, কাপড়খানা গুছাইয়া পরিয়া, একটু ঘোমটা টানিয়া, পরিবেশন করিতে গেলাম। কে জানে যে এমন কাণ্ড বাধিবে? আমি জানি যে, আমি বড় বুদ্ধিমতী—জানিতাম না যে, সুভাষিণী আমায় এক হাতে বেচিতে পারে, আর এক হাতে কিনিতে পারে।

আমি অবগুষ্ঠনবতী, কিন্তু ঘোমটায় স্ত্রীলোকের স্বভাব ঢাকা পড়ে না। ঘোমটার ভিতর হইতে একবার নিমস্ত্রিত বাবুটিকে দেখিয়া লইলাম।

দেখিলাম, তাঁহার বয়স ত্রিশ বৎসর বোধ হয়; তিনি গৌরবর্ণ এবং অত্যন্ত সুপুরুষ; তাঁহাকে দেখিয়াই রমণীমনোহর বলিয়া বোধ হইল। আমি বিদ্যুচ্চমকিতের স্থায় একটু অশ্রমনস্ক হইলাম। মাংসের পাত্র লইয়া একটু দাঁড়াইয়া রহিলাম, আমি ঘোমটার ভিতর হইতে তাঁহাকে দেখিতেছিলাম, এমত সময়ে তিনি মুখ তুলিলেন—দেখিতে পাইলেন যে, আমি ঘোমটার ভিতর হইতে তাঁহার প্রতি চাহিয়া আছি। আমি ত জানিয়া শুনিয়া ইচ্ছাপূর্বক তাঁহার প্রতি কোন প্রকার কুটিল কটাক্ষ করি নাই। তত পাপ এ হৃদয়ে ছিল না। তবে সাপও বৃষি, জানিয়া শুনিয়া, ইচ্ছা করিয়া ফণা ধরে না; ফণা ধরিবার সময় উপস্থিত হইলেই ফণা আপনি কাঁপিয়া উঠে। সাপেরও পাপহৃদয় না হইতে পারে। বৃষি সেইরূপ কিছু ঘটয়া থাকিবে। বৃষি তিনি একটা কুটিল কটাক্ষ দেখিয়া থাকিবেন। পুরুষ বলিয়া থাকেন যে, অন্ধকারে প্রদীপের মত, অবগুষ্ঠনমধ্যে রমণীর কটাক্ষ অধিকতর তীব্র দেখায়। বোধহয়,

ইনিও সেইরূপ দেখিয়া থাকিবেন। তিনি একটু মাত্র মুহূ হাসিয়া মুখ নত করিলেন। সে হাসি কেবল আমিই দেখিতে পাইলাম। আমি সমুদয় মাংস ঝাঁহার পাতে ফেলিয়া দিয়া চলিয়া আসিলাম।

আমি একটু লজ্জিতা, একটু অসুখী হইলাম। আমি সধবা হইয়াও জন্মবিধবা। বিবাহের সময়ে একবার মাত্র স্বামিদর্শন হইয়াছিল—সুতরাং যৌবনের প্রবৃত্তি সকল অপরিতৃপ্ত ছিল। এমন গভীর জলে ক্ষেপণীনিক্ষেপে বুঝি তরঙ্গ উঠিল ভাবিয়া বড় অপ্রফুল্ল হইলাম। মনে মনে নারীজন্মে সহস্র ধিকার দিলাম : মনে মনে আপনাকে সহস্র ধিকার দিলাম ; মনের ভিতর মরিয়া গেলাম।

পাকশালায় ফিরিয়া আসিয়া আমার যেন মনে হইল, আমি ইহাকে পূর্বের কোথাও দেখিয়াছি। সন্দেহভঞ্জনার্থ, আবার অন্তরাল হইতে ইহাকে দেখিতে গেলাম। বিশেষ করিয়া দেখিলাম। দেখিয়া মনে মনে বলিলাম, “চিনিয়াছি।”

এমন সময় রামরামবাবু, আবার অগ্ন্যাগ্ন খাত্ত লইয়া যাইতে ডাকিয়া বলিলেন। অনেক প্রকার মাংস পাক করিয়াছিলাম—লইয়া গেলাম। দেখিলাম, ইনি সেই কটাক্ষটি মনে করিয়া রাখিয়াছেন। রামরাম দত্তকে বলিলেন, “রামরামবাবু, আপনার পাচিকাকে বলুন যে, পাক অতি পরিপাটি হইয়াছে।”

রামরাম ভিতরের কিছু বুঝিলেন না, বলিলেন, “হাঁ, উনি রাখেন ভাল!”

আমি মনে মনে বলিলাম, “তোমার মাথামুণ্ড রাখি।”

নিমন্ত্রিত বাবু কহিলেন, “কিন্তু এ বড় আশ্চর্য্য যে, আপনাকে বাড়াইতে ছুই একখানা ব্যঞ্জন আমাদের দেশের মত পাক হইয়াছে।”

আমি মনে মনে ভাবিলাম, “চিনিয়াছি।” বস্তুতঃ ছুই একখানা ব্যঞ্জন আমাদের নিজদেশের প্রথামত পাক করিয়াছিলাম।

রামরাম বলিলেন, “তা হবে, ঔঁর বাড়ী এ দেশ নয়।”

ইনি এবার যো পাইলেন, একবারে আমার মুখ পানে চাহিয়া জিজ্ঞাসা করিয়া বলিলেন, “তোমাদের বাড়ী কোথায় গা ?”

আমার প্রথম সমস্যা, কথা কই কি না কই। স্থির করিলাম, কথা কহিব।

দ্বিতীয় সমস্যা, সত্য বলিব, না মিথ্যা বলিব। স্থির করিলাম, মিথ্যা বলিব। কেন এরূপ স্থির করিলাম, তাহা যিনি স্ত্রীলোকের হৃদয়কে চাতুৰ্য্যপ্রিয়, বক্রপথগামী করিয়াছেন, তিনিই জানেন। আমি ভাবিলাম, আবশ্যক হয়, সত্য কথা বলা আমার হাতেই রহিল, এখন আর একটা কথা বলিয়া দেখি। এই ভাবিয়া আমি উত্তর করিলাম, “আমাদের বাড়ী কালাদীঘি।”

তিনি চমকিয়া উঠিলেন। ক্ষণেক পরে মৃৎসরে কহিলেন, “কোন কালাদীঘি, ডাকাতে কালাদীঘি?”

আমি বলিলাম, “হাঁ।”

তিনি আর কিছু বলিলেন না।

আমি মাংসপাত্র হাতে করিয়া দাঁড়াইয়া রহিলাম। দাঁড়াইয়া থাকা আমার যে অকৰ্ত্তব্য, তাহা আমি ভুলিয়াই গিয়াছিলাম। এইমাত্র যে আপনাকে সহস্র ধিকার দিয়াছিলাম, তাহা ভুলিয়া গেলাম। দেখিলাম যে, তিনি আর ভাল করিয়া আহার করিতেছেন না। তাহা দেখিয়া রামরাম দত্ত বলিলেন, উপেন্দ্রবাবু, আহার করুন না।” ঐটি শুনিবার আমার বাকী ছিল। উপেন্দ্রবাবু! আমি নাম শুনিবার আগেই চিনিয়াছিলাম, ইনি আমার স্বামী।

আমি পাকশালায় গিয়া পাত্র ফেলিয়া একবার অনেক কালের পর আহ্লাদ করিতে বসিলাম। রামরাম দত্ত বলিলেন, “কি পড়িল? আমি মাংসের পাত্রখানা ছুঁড়িয়া ফেলিয়া দিয়াছিলাম।

ছাদশ পরিচ্ছেদ : হারাণীর হাসিবন্ধ

এখন হইতে এই ইতিবৃত্তমধ্যে পাঁচ শত বার আমার স্বামীর নাম করা আবশ্যক হইবে। এখন, তোমরা পাঁচ জন রসিকা মেয়ে একত্র কমিটিতে পরামর্শ করিয়া বলিয়া দাও, আমি কোন শব্দ ব্যবহার

করিয়। তাঁহার নাম করিব ? পাঁচশঃ বার “স্বামী” “স্বামী” করিয়া কাণ জ্বালাইয়া দিব ? না জামাই বারিকের দৃষ্টান্তানুসারে, স্বামীকে “উপেন্দ্র” বলিতে আরম্ভ করিব ? না, “প্রাণনাথ” “প্রাণকান্ত” “প্রাণেশ্বর” “প্রাণপতি” এবং “প্রাণাধিকে”র ছড়াছড়ি করিব ? যিনি আমাদের সর্বাপেক্ষা প্রিয় সন্থোথনের পাত্র, যঁহাকে পলকে পলকে ডাকিতে ইচ্ছা করে, তাঁহাকে যে কি বলিয়া ডাকিব, এমন কথা পোড়া দেশের ভাষায় নাই । আমার এক সখী, (দাসদাসীগণের অনুকরণ করিয়া) স্বামীকে “বাবু” বলিয়া ডাকিত—কিন্তু শুধু বাব বলিতে তাহার মিষ্ট লাগিল না—সে মনোহুখে স্বামীকে শেষে “বাবুরাম” বলিয়া ডাকিতে আরম্ভ করিল । আমারও ইচ্ছা করিতেছে, আমি তাই করি ।

মাংসপাত্র ছুঁড়িয়া ফেলিয়া দিয়া, মনে মনে স্থির করিলাম, “যদি বিধাতা হারাধন মিলাইয়াছে—তবে ছাড়া হইবে না । বালিকার মত লজ্জা করিয়া সব নষ্ট না করি ”

এই ভাবিয়া আমি এমত স্থানে দাঁড়াইলাম যে, ভোজনস্থান হইতে বহির্বাটাতে গমনকালে যে এদিক্ ওদিক্ চাহিতে চাহিতে যাইবে, সে দেখিতে পাইবে । আমি মনে মনে বলিলাম যে, “যদি ইনি এদিক্ ওদিক্ চাহিতে না যান, তবে আমি কুড়ি বৎসর বয়স পর্য্যন্ত পুরুষের চরিত্র কিছুই বুঝি নাই ।” আমি স্পষ্ট কথা বলি, তোমরা আমাকে মার্জ্জনা করিও—আমি মাথার কাপড় বড় খাটো করিয়া দিয়া দাঁড়াইয়াছিলাম । এখন লিখিতে লজ্জা করিতেছে, কিন্তু তখন আমার কি দায়, তাহা মনে করিয়া দেখ

অগ্রে অগ্রে রমণবাবু গেলেন : তিনি চারি দিক্ চাহিতে চাহিঃ গেলেন, যেন খবর লইতেছেন, কে কোথায় আছে । তার পর রামরাম দত্ত গেলেন—তিনি কোন দিকে চাহিলেন না । তার পর আমার স্বামী গেলেন—তাঁহার চক্ষু যেন চারি দিকে কাহার অনুসন্ধান করিতেছিল । আমি তাঁহার নয়নপথে পড়িলাম । তাঁহার চক্ষু আমারই অনুসন্ধান করিতেছিল, তাহা বিলক্ষণ জানিতাম । তিনি আমার প্রতি চাহিবামাত্র,

আমি ইচ্ছাপূর্বক—কি বলিব. বলিতে লজ্জা করিতেছে—সপের যেমন চক্রবস্তার স্বভাবসিদ্ধ, কটাফুও আমাদিগের তাই। যাঁহাকে আপনার স্বামী বলিয়া জানিয়াছিলাম, তাঁহার উপর একটু অধিক করিয়া বিষ ঢালিয়া না দিব কেন? বোধ হয়, “প্রাণনাথ” আহত হইয়া বাহিরে গেলেন।

আমি তখন হারাণীর শরণাগত হইব মনে করিলাম। নিভূতে ডাকিবামাত্র সে হাসিতে হাসিতে আসিল। সে উচ্চ হাস্য করিয়া বলিল, “পরিবেশনের সময় বামন ঠাকুরাণীর নাকালটা দেখিয়াছিলে?” উত্তরের অপেক্ষা না করিয়া সে আবার হাসির ফোয়ারা খুলিল।

আমি বলিলাম, “তা জানি, কিন্তু আমি তার জন্ত তোকে ডাকি নাই। আমার জন্মের শোধ একবার উপকার কর। ঐ বাবুটি কখন যাইবেন, আমাকে শীঘ্র খবর আনিয়া দে।”

হারাণী একেবারে হাসি বন্ধ করিল। এত হাসি, যেন ঘুঁয়ার অঙ্ককারে আঙুন ঢাকা পড়িল। হারাণী গম্ভীরভাবে বলিল, “ছি! দিদি ঠাকরনু! তোমার এ রোগ আছে, তা জানতাম না।”

আমি হাসিলাম। বলিলাম, “মানুষের সকল দিন সমান যায় না। এখন তুই গুরুমহাশয়গিরি রাখ—আমার এ উপকার করবি কি না বল।”

হারাণী বলিল, “কিছুতেই আমি হইতে এ কাজ হইবে না।”

আমি খালি হাতে হারাণীর কাছে আসি নাই। মাহিয়ানার টাকা ছিল; পাঁচটা তাহার হাতে দিলাম। বলিলাম, আমার মাথা খাস, এ কাজ তোকে করিতেই হইবে।”

হারাণী টাকা কয়টা ছুঁড়িয়া ফেলিয়া দিতে ছিল, কিন্তু তাহা না দিয়া, নিকটে উনান নিকাইবার এক বুড়ি মাটি ছিল, তাহার উপর রাখিয়া দিল। বলিল—অতি গম্ভীরভাবে, আর হাসি নাই—“তোমার টাকা ছুঁড়িয়া দিতেছিলাম, কিন্তু শব্দ হইলে একটা কেলেঙ্কারী হইবে, তাই আস্তে আস্তে এইখানে রাখিলাম—কুড়াইয়া লও। আর এ সকল কথা মুখে এনো না।”

আমি কাঁদিয়া ফেলিলাম। হারাণী বিশ্বাসী, আর সকলে অশ্বাসী।
আর কাহাকে ধরিব ? আমার কান্নার প্রকৃত তাৎপর্য্য সে জানিত না।
তথাপি তার দয়া হইল। সে বলিল, “কাঁদ কেন ? চেনা মানুষ না
কি ?”

আমি একবার মনে করিলাম, হারাণীকে সব খুলিয়া বলি। তার
পর ভাবিলাম, সে এত বিশ্বাস করিবে না, একটা গণ্ডগোল করিবে।
ভাবিয়া চিন্তিয়া, স্থির করিলাম, সুভাষিনী ভিন্ন আমার গতি নাই।
সেই আমার বুদ্ধি, সেই আমার রক্ষাকারিণী—তাহাকে সব খুলিয়া
বলিয়া পরামর্শ করি গিয়া। হারাণীকে বলিলাম, “চেনা মানুষ বটে—
বড় চেনা, সকল কথা শুনিলে তুই বিশ্বাস করিবি না, তাই তোকে
সকল কথা ভাঙ্গিয়া বলিলাম না। কিছু দোষ নাই।”

“কিছু দোষ নাই,” বলিয়া একটু ভাবিলাম। আমারই পক্ষে কিছু
দোষ নাই, কিন্তু হারাণীর পক্ষে ? দোষ আছে বটে। তবে তাকে
কাদা মাখাই কেন ? তখন সেই “বাজিয়ে যাব মল” মনে পড়িল।
কৃতকে মনকে বুঝাইলাম। যাহার হৃদয় ঘটে, সে উদ্ধারের জন্ম
কৃতক অবলম্বন করে। আমি হারাণীকে আবার বুঝাইলাম, “কিছু
দোষ নাই।”

হা তোমাকে কি তাঁর সঙ্গে দেখা করিতে হইবে ?

আমি। হা।

হা কখন ?

আমি। রাত্রে সবাই ঘুমাইলে।

হা একা ?

আমি। একা।

হা আমার বাপের সাধ্য নহে।

আমি। আর বৌ ঠাকুরাণী যদি হুকুম দেন ?

হা তুমি কি পাগল হয়েছ ? তিনি কুলের কুলবধু—সতী লক্ষ্মী,
তিনি কি এ সব কাজে হাত দেন !

আমি। যদি বারণ না করেন, যাবি ?

হারানী। যাব। তাঁর হুকুমে না পারি কি ?

আমি। যদি বারণ না করেন ?

হারানী। যাব, কিন্তু তোমার টাকা নিব না। তোমার টাকা
.তুমি নাও।

আমি। আচ্ছা, তোকে যেন সময়ে পাই।

আমি তখন চোখের জল মুছিয়া সুভাষিণীর সন্ধানে গেলাম।
তাহাকে নিভুতেই পাইলাম। আমাকে দেখিয়া সুভাষিণীর সেই সুন্দর
মুখখানি, যেন সকালের পদ্মের মত, যেন সন্ধ্যাবেলার গন্ধরাজের মত,
আহ্লাদে ফুটিয়া উঠিল—সর্ব্বাঙ্গ, যেন সকালবেলার সর্ব্বত্র পুষ্পিত
শেফালিকার মত, যেন চন্দ্রোদয়ে নদীশ্রোতের মত, আনন্দে প্রফুল্ল
হইল। হাসিয়া আমার কাণের কাছে মুখ আনিয়া সুভাষিণী জিজ্ঞাসা
করিল, “কেমন চিনিয়াছ ত ?”

আমি আকাশ থেকে পড়িলাম। বলিলাম, “সে কি ? তুমি কেমন
ক’রে জানলে ?” সুভাষিণী মুখ চোখ ঘুরাইয়া বলিল, “আহাঃ, তোমার
সোণার চাঁদ বুঝি আপনি এসে ধরা দিয়েছে ? আমরা যাই আকাশে
কাঁদ পাততে জানি, তাই তোমার আকাশের চাঁদ ধরে এনে দিয়েছি !”

আমি বলিলাম, “তোমরা কে ? তুমি আর র-বাবু ?”

সুভা। না ত আবার কে ? তুমি, তোমার স্বামী-স্বস্তুরের আর তাঁদের
গাঁয়ের নাম বলিয়া দিয়াছিলে, মনে আছে ? তাই শুনিয়াই র-বাবু
চিনিতে পারিলেন। তোমার উ-বাবুর একটা বড় মোকদ্দমা তাঁর হাতে
ছিল—তারই ছল করিয়া তোমার উ-বাবুকে কলিকাতায় আসিতে
লিখিলেন। তার পর নিমন্ত্রণ।

আমি। তার পর হাত পাতিয়া বুড়ীর দালটুকু নেওয়া।

সুভা। হাঁ, সেটাও আমাদের ষড়্‌যন্ত্র।

আমি। তা, আমার পরিচয় কিছু দেওয়া হয়েছে কি ?

সুভা। আ সর্ব্বনাশ ! তা কি দেওয়া যায় ? তোমাকে ডাকাতে
কেড়ে নিয়ে গিয়েছিল, তার পর কোথায় গিয়েছিলে, কি বৃত্তান্ত, তা কে
জ্ঞানে ? তোমার পরিচয় পেলে কি ঘরে নেবে ? বলবে একটা

গছিয়ে দিচ্ছে। র-বাবু বলেন, এখন তুমি নিজে যা করিতে পার।

আমি। আমি একবার কপাল ঠুকিয়া দেখিব—না হয় ডুবিয়া মরিব। কিন্তু আমার সঙ্গে দেখা না হইলে, কি করিব?

সুভা। কখন দেখা করবে, কোথায় বা দেখা করবে?

আমি। তোমরা যদি এত করিয়াছ, তবে এ বিষয়েও একটু সাহায্য কর। তাঁর বাসায় গেলে দেখা হইবে না,—কেই বা আমাকে নিয়ে যাবে, কেই বা দেখা করাইবে? এইখানেই দেখা করিতে হইবে।

সুভা। কখন?

আমি। রাত্রে, সবাই শুইলে।

সুভা। অভিসারিকে?

আমি। তা বৈ আর গতি কি? দোষই বা কি—স্বামী যে।

সুভা। না, দোষ নাই। কিন্তু তাহা হইলে তাঁকে রাত্রে আটকাইতে হয়। নিকটে তাঁর বাসা; তা ঘটিবে কি? দেখি একবার র-বাবুর সঙ্গে পরামর্শ করে।

সুভাষিণী রমণবাবুকে ডাকাইল। তাঁর সঙ্গে যে কথাবার্তা হইল, তাহা আমাকে আসিয়া বলিল। বলিল, “র-বাবু যাহা পারেন তাহা এই :—তিনি এখন মোকদ্দমার কাগজপত্র দেখিবেন না—একটা ওজর করিয়া রাখিবেন। কাগজ দেখিবার জন্ত সন্ধ্যার পর সময় অবধারণ করিবেন। সন্ধ্যার পর তোমার স্বামী আসিলে, কাগজপত্র দেখিবেন। কাগজপত্র দেখিতে দেখিতে একটু রাত্র করিবেন। রাত্র হইলে আহারের জন্ত অনুরোধ করিবেন। কিন্তু তার পর তোমার বিছায় যা থাকে তা করিও। রাত্রে থাকিতে আমরা কি বলিয়া অনুরোধ করিব?”

আমি বলিলাম, “সে অনুরোধ তোমাদের করিতে হইবে না। আমিই কবিব। আমার অনুরোধ যাহাতে শুনেন, তাহা করিয়া রাখিয়াছি। দুই একটা চাহনি ছুঁড়িয়া মারিয়াছিলাম, তিনি তাহা ফিরাইয়া দিয়াছেন। লোক ভাল নহেন। এখন আমার অনুরোধ তাঁহার কাছে পাঠাই কি প্রকারে? এক ছত্র লিখিয়া দিব। সেই কাগজটুকু কেহ তাঁর কাছে দিয়ে এলেই হয়।”

সুভা। কোন চাকরের হাতে পাঠাও না ?

আমি। যদি জন্ম-জন্মান্তরেও স্বামী না পাই, তবুও পুরুষ মানুষকে এ কথা বলিতে পারি না।

সুভা। তা বটে। কোন ঝি ?

আমি। ঝি বিশ্বাসী কে ? একটা গোলমাল ঝাড়াইবে, তখন সব খোঁয়াব।

সুভা। হারাণী বিশ্বাসী ?

আমি। হারাণীকে বলিয়াছিলাম। বিশ্বাসী বলিয়া সে নারাজ। তবে তোমার একটু ইঙ্গিত পাইলে সে যাইতে পারে। কিন্তু তোমায় এমন ইঙ্গিত করিতে কি প্রকারে বলিতে পারি ? মরি ত আমি একাই মরিব।—পোড়া চোখে আবার জল আসিল।

সুভা। হারাণী আমার কথা কি বলিয়াছে ?

আমি। তুমি যদি বারণ না কর, তবে সে যাইতে পারে।

সুভাষিণী অনেকক্ষণ ভাবিল। বলিল, “সন্ধ্যার পর তা’কে এই কথার জ্ঞাপন আসিতে বলিও।”

ত্রয়োদশ পরিচ্ছেদ : আমাকে একজামিন দিতে হইল

সন্ধ্যার পর আমার স্বামী কাগজপত্র লইয়া রমণবাবুর কাছে আসিলেন। সংবাদ পাইয়া, আমি আর একবার হারাণীর হাতে-পায়ে ধরিলাম। হারাণী সেই কথাই বলে, “বৌদিদি যদি বারণ না করে, তবে পারি। তবে জানিব, এতে দোষ নেই।” আমি বলিলাম, “যাহা হয় কর—আমার বড় জ্বালা।”

এই ইঙ্গিত পাইয়া হারাণী একটু হাসিতে হাসিতে সুভাষিণীর কাছে ছুটিল। আমি তাহার প্রতীক্ষা করিতে লাগিলাম। দেখিলাম যে, সে হাসির ফোয়ারা খুলিয়া দিয়া, আলু থালু কেশ-বেশ সামলাইতে সামলাইতে, হাঁপাইতে হাঁপাইতে, ছুটিয়া আসিল। আমি জিজ্ঞাসা করিলাম, “কি গো, এত হাসি কেন ?”

হারাগী। দিদি, এমন জায়গায়ও মানুষকে পাঠায়? প্রাণটা গিয়াছিল আর কি !

আমি। কেন গো ?

হারাগী। আমি জানি বৌদিদির ঘরে ঝাঁটা থাকে না, দরকারমত ঝাঁটা লইয়া গিয়া আমরা ঘর ঝাঁটাইয়া আসি। আজ দেখি যে, বৌদিদির হাতের কাছেই কে ঝাঁটা রাখিয়া আসিয়াছে। আমি যেমন গিয়া বলিলাম, “তা যাব কি ?” অমনি বৌদিদি সেই ঝাঁটা লইয়া আমাকে হাড়াইয়া মারিতে আসিল। ভাগ্যিস পালাতে জানি, তাই পালিয়ে বাচলোম। নহিলে খেজুরা খেয়ে প্রাণটা গিয়েছিল আর কি ? তবু এক ঘা বুঝি পিঠে পড়েছে ;—দেখ দেখি দাগ হয়েছে কি না ?

হারাগী হাসিতে হাসিতে আমাকে পিঠ দেখাইল। মিছে কথা—দাগ ছিল না। তখন সে বলিল, “এখন কি করতে হবে বল—ক’রে আসি !”

আমি। ঝাঁটা খেয়ে যাবি ?

হারাগী। ঝাঁটা মেরেছে—বারণ ত করে নি। আমি বলেছিলাম, বারণ না করে ত যাব।

আমি। ঝাঁটা কি বারণ না ?

হারাগী। হ্যাঁ, দেখ দিদিমণি, বৌদিদি যখন ঝাঁটা তোলে, তখন তার চোচের কোণে একটু হাসি দেখেছিলাম। তা কি করতে হবে, বল।

আমি তখন এক টুকরা কাগজে লিখিলাম,

“আমি আপনাকে মনঃপ্রাণ সমর্পণ করিয়াছি। গ্রহণ করিবেন কি ? যদি করেন, তবে আজ রাত্রিতে এই বাড়ীতে শয়ন করিবেন। ঘরের দ্বার যেন খোলা থাকে।

সেই পাটিকা।”

পত্র লিখিয়া, লজ্জায় ইচ্ছা করিতে লাগিল, পুকুরের জলে ডুবিয়া থাকি, কি অন্ধকারে লুকাইয়া থাকি। তা কি করিব ? বিধাতা যেমন ভাগ্য দিয়েছেন ! বুঝি আর কখন কোন কুলবতীর কপালে এমন হৃদশা ঘটে নাই।

কাগজটা মুড়িয়া সুড়িয়া হারানীকে দিলাম। বলিলাম, “একটু সবুর।” সুভাষিনীকে বলিলাম, “একবার দাদাবাবুকে ডাকিয় পাঠাও। যাহা হয় একটা কথা বলিয়া বিদায় দিও।” সুভাষিনী তাই করিল। রমণবাবু উঠিয়া আসিলে, হারানীকে বলিলাম, “এখন যা।” হারানী গেল, কিছু পরে কাগজটা ফেরত দিল। তার এক কোণে লেখা আছে, “আচ্ছা।” আমি তখন হারানীকে বলিলাম, “যদি এত করিলি, তবে আর একটু করিতে হইবে। ছুপুর রাতে আমাকে তাঁর শুইবার ঘরটা দেখাইয়া দিয়া আসিতে হইবে।”

হারানী। আচ্ছা, কোন দোষ নাই ত ?

আমি। কিছু না। উনি আর জন্মে আমার স্বামী ছিলেন।

হারানী। আর জন্মে, কি এ জন্মে, ঠিক বুদ্ধিতে পারিতেছি না।

আমি হাসিয়া বলিলাম, “চুপ।”

হারানী হাসিয়া বলিল, “যদি এ জন্মের হন, তবে আমি পাঁচ শত টাকা বখ্‌শিশ নিব ; নহিলে আমার বাঁটার যা ভাল হইবে না।”

আমি তখন সুভাষিনীর কাছে গিয়া এ সকল সংবাদ দিলাম। সুভাষিনী শাশুড়ীকে বলিয়া আসিল, “আজ কুমুদিনীর অসুখ হইয়াছে ; সে রাঁধিতে পারিবে না। সোনার মা-ই রাঁধুক।”

সোনার মা রাঁধিতে গেল—সুভাষিনী আমাকে লইয়া গিয়া ঘরে কবাট দিল। আমি জিজ্ঞাসা করিলাম, “এ কি, কয়েদ কেন ?” সুভাষিনী বলিল, “তোমায় সাজাইব।”

তখন আমার মুখ পরিষ্কার করিয়া মুছাইয়া দিল। চুলে সুগন্ধ তৈল মাখাইয়া, যত্নে খোঁপা বাঁধিয়া দিল ; বলিল, “এ খোঁপার হাজার টাকা মূল্য, দময় হইলে আমায় এ হাজার টাকা পাঠাইয়া দিস্।” তার পর আপনার একখানা পরিষ্কার, রমণীমনোহর বস্ত্র লইয়া জোর করিয়া পরাইতে লাগিল। সে যেরূপ টানাটানি করিল, বিবস্ত্রা হইবার ভয়ে আমি পরিতে বাধ্য হইলাম। তার পর আপনার অলঙ্কাররাশি আনিয়া পরাইতে আসিল। আমি বলিলাম, “এ আমি কিছুতেই পরিব না !”

তার জন্ম অনেক বিবাদ বচসা হইল—আমি কোন মতেই পরিলাম না দেখিয়া সে বলিল, “তবে, আর এক স্টুট আনিয়া রাখিয়াছি, তাই পর।”

এই বলিয়া সুভাষিণী একটা ফুলের জার্ডিনিয়র হইতে বাহির করিয়া মল্লিকা ফুলের অফুল্ল কোরকের বালা পরাইল, তাহার তালি, তাহারই বাজু, গলায় তারই দোনার মালা। তার পর এক জোড়া নুতন সোনার ইয়াররিং বাহির করিয়া বলিল, “এ আমি নিজের টাকায় র-বাবুকে দিয়া কিনিয়া আনাইয়াছি—তোমাকে দিবার জন্ম। তুমি যেখানে যখন থাক, এ পরিলে আমাকে তুমি মনে করিবে। কি জানি ভাই, আজ বৈ তোমার সঙ্গে যদি দেখা না হয়—ভগবান্ তাই করুন,—তাই তোমাকে আজ এ ইয়াররিং পরাইব। এতে আর না বলিও না।”

বলিতে বলিতে সুভাষিণী কাঁদিল। আমারও চক্ষে জল আসিল, আমি আর না বলিতে পারিলাম না। সুভাষিণী ইয়াররিং পরাইল।

সাজসজ্জা শেষ হইলে সুভাষিণীর ছেলেকে বি দিয়া গেল। ছেলেটিকে কোলে লইয়া তাহার সঙ্গে গল্প করিলাম। সে একটু গল্প শুনিয়া দুমাইয়া পড়িল। তার পর মনে একটা ছুঃখের কথা উদয় হইয়াছিল, তাও এ সুখের মাঝে সুভাষিণীকে না বলিয়া থাকিতে পারিলাম না। বলিলাম, “আমি আহ্লাদিত হইয়াছি, কিন্তু মনে মনে তাঁহাকে একটু নিন্দা করিতেছি। আমি চিনিয়াছি যে, তিনি আমার স্বামী, এই জন্ম আমি যাহা করিতেছি, তাহাতে আমার বিবেচনায়, দোষ নাই। কিন্তু তিনি যে আমাকে চিনিতে পারিয়াছেন, এমন কোন মতেই সম্ভবে না। আমি তাঁহাকে বয়ঃপ্রাপ্ত অবস্থায় দেখিয়াছিলাম। এজন্ম আমার প্রথমেই সন্দেহ হইয়াছিল। তিনি আমাকে একাদশ বৎসরের বালিকা দেখিয়াছিলেন মাত্র। তিনি আমাকে চিনিতে পারিয়াছেন, এমন কোন লক্ষণও দেখি নাই। অতএব তিনি আমাকে পরন্তী জানিয়া যে আমার প্রণয়াশায় লুক্ক হইলেন, শুনিয়া মনে মনে বড় নিন্দা করিতেছি। কিন্তু তিনি স্বামী, আমি স্ত্রী,—তাঁহাকে মন্দ ভাবা আমার অকর্তব্য বলিয়া সে কথার আর আলোচনা করিব না।

মনে মনে সঙ্কল্প করিলাম, যদি কখনও দিন পাই, তবে এ স্বভাব ত্যাগ করাইব।”

সুভাষিনী আমার কথা শুনিয়া বলিল, “তোমার মত বান্দর গাছে নেই, গুঁর যে স্ত্রী নেই।”

আমি। আমার কি স্বামী আছে না কি ?

সুভা। আ ম'লো ! মেয়ে মানুষে পুরুষ মানুষে সমান । তুই কমিসেরিয়েটের কাজ ক'রে টাকা নিয়ে আয় না দেখি ?

আমি। ওরা পেটে ছেলে ধরিয়া, প্রসব করিয়া, মানুষ ককক, আমি কমিসেরিয়েটে যাইব। যে যা পারে, সে তা করে পুরুষ মানুষের ইন্দ্রিয় দমন কি এতই শক্ত ?

সুভা। আচ্ছা, আগে শের ঘর হোক, তার পর তুই ঘাব আঙুন দিস্। ও সব কথা রাখ্। কেমন ক'রে স্বামীর মন ভুলাবি. তার একজামিন দে দেখি ? তা নইলে ত তোমার গতি নেই।

আমি একটু ভাবিত হইয়া বলিলাম, “সে বিজ্ঞা ত কখনও শিখি নাই।”

সু। তবে আমার কাছে শেখ্। আমি এ শাস্ত্রে পণ্ডিত, তা জানিস্ ?

আমি। তা ত দেখিতে পাই।

সু। তবে শেখ্। তুই যেন পুরুষ মানুষ। আমি কেমন করিয়া তোমার মন ভুলাই দেখ্।

এই বলিয়া পোড়ারমুখী, মাথায় একটু ঘোমটা টানিয়া, সমস্তে স্বহস্তে প্রস্তুত সুবাসিত একটি পান আনিয়া আমাকে খাইতে দিল। সে পান সে কেবল রমণবাবুর জন্ত রাখে, আর কাহাকেও দেয় না। এমন কি, আপনিও কখন খায় না। রমণবাবুর আলবোলাটা সেখানে ছিল, তাহাতে কল্লে বসান ; গুলের ছাই ছিল মাত্র ; তাই আমার সম্মুখে ধরিয়া দিয়া, ফুঁ দিয়া ধরান, সুভাষিনী নাটিত করিল। তার পর, ফুল দিয়া সান্দ্রান তালবৃন্তখানি হাতে লইয়া বাতাস করিতে লাগিল। হাতের বালাতে চুড়িতে বড় মিঠে মিঠে বাজিতে লাগিল।

আমি বলিলাম, “ভাই! এ ত দাসীপনা—দাসীপনায় আমার কতদূর বিছা, তারই পরিচয় দিবার জন্ত কি তাঁকে আজ ধরিয়ে রাখিলাম?”

সুভাষিনী বলিল, “আমরা দাসী না ত কি?”

আমি বলিলাম, “যখন তাঁর ভালবাসা জন্মিবে, তখন দাসীপনা চলিবে। তখন পাখা করিব, পা টিপিব, পান সাজিয়া দিব, তামাকু ধরাইয়া দিব। এখনকার ওসব নয়।”

তখন সুভাষিনী হাসিতে হাসিতে আমার কাছে আসিয়া বসিল। আমার হাতখানা আপনাত হাতের ভিতর তুলিয়া লইয়া, মিঠে মিঠে গল্প করিতে লাগিল। প্রথম প্রথম, হাসিতে হাসিতে, পান চিবাইতে চিবাইতে, কাণবালা দোলাইয়া, সে যে সং সাজিয়াছিল, তারই অল্পকপ কথা কহিতে লাগিল। কথায় কথায় সে ভাব ভুলিয়া গেল। সখীভাবেই কথা কহিতে লাগিল। আমি যে চলিয়া যাইব, সে কথা পাড়িল। চক্ষুতে তার এক বিন্দু জল চক চক করিতে লাগিল। তখন তাহাকে প্রফুল্ল করিবার জন্ত বলিলাম, “যা শিখাইলে, তা স্ত্রীলোকের অস্ত্র বটে, কিন্তু এখন উ-বাবুর উপর খাটিবে কি?”

সুভাষিনী তখন হাসিয়া বলিল, “তবে আমার ব্রহ্মাস্ত্র শিখে নে।”

এই বলিয়া, মাগী আমার গলা বেড়িয়া হাত দিয়া আমার মুখখানা তুলিয়া ধরিয়া, আমার মুখচুম্বন করিল। এক ফোঁটা চোখের জল, আমার গালে পড়িল।

ঢোক গিলিয়া আমার চোখের জল চাপিয়া, আমি বলিলাম, “এ যে ভাই সঙ্কল্প না হতে দক্ষিণা দেওয়া শিখাইতেছি।”

সুভাষিনী বলিল, “তোমার তবে বিছা হবে না। তুই কি জানিস, একজামিন দে দেখি। এই আমি যেন উ-বাবু” এই বলিয়া সে সোফার উপর জমকাইয়া বসিয়া,—হাসি রাখিতে না পারিয়া, মুখে কাপড় গুঁজিতে লাগিল। হাসি থামিলে, একবার আমার মুখপানে খট মট করিয়া চাহিল—আবার তখনই হাসিয়া লুটাইয়া পড়িল। সে হাসি থামিলে বলিল, “একজামিন দে।” তখন যে বিছার পরিচয়

পাঠক পশ্চাৎ পাইবেন, সুভাষিনীকেও তাহার কিছু পরিচয় দিলাম
সুভাষিনী আমাকে সোফা হইতে ঠেলিয়া ফেলিয়া দিল—বলিল, “দূর
হ পাপিষ্ঠা ! তুই আস্ত কেউটে !”

আমি বলিলাম, “কেন ভাই ?”

সুভাষিনী বলিল, “ও হাসি চাহনিতে পুরুষ মানুষ টিকে ? মরিয
ভুত হয় ।”

আমি । তবে একজামিন পাস ?

সু । খুব পাস—কমিসেরিয়েটের এক-শ উনসত্তর পুরুষেও এমন
হাসি চাহনি কখন দেখে নাই । মিন্সের মুণ্ডটা যদি ঘুরে যায়, ত
একটু বাদামের তেল দিস্ ।

আমি আচ্ছা । এখন সাড়া শব্দে বুঝিতে পরিতেছি, বাবুদের
খাওয়া হইয়া গেল । রমণাবুর ঘরে আসিবার সময় হইল, আমি
এখন বিদায় হই । যা শিখাইয়াছিলে, তার মধ্যে একটা বড় মিষ্ট
লাগিয়াছিল—সেই মুখচুশ্নট । এসো আর একবার শিখি ।

তখন সুভাষিনী আমার গলা ধরিল, আমি তার গলা ধরিলাম ।
গাঢ় আলিঙ্গনপূর্বক পরস্পরে মুখচুশ্ন করিয়া, গলা ধরাধরি করিয়া
ছুই জনে অনেকক্ষণ কাটিলাম । এমন ভালবাসা কি আর হয় ?
সুভাষিনীর মত আর কি কেহ ভালবাসিতে জানে ? মরিব, কিন্তু
সুভাষিনীকে ভুলিব না ।

চতুর্দশ পরিচ্ছেদ : আমার প্রাণত্যাগের প্রতিজ্ঞা

আমি হারানীকে সংক করিয়া দিয়া আপনার শয়নগৃহে গেলাম
বাবুদের আহালাদি হইয়া গিয়াছে । এমন সময়ে বড় গণ্ডগোল পড়িয়া
গেল কেহ ডাকে পাখা, কেহ ডাকে জল, কেহ ডাকে ঔষধ, কেহ
ডাকে ডাক্তার । এইরূপ হল-খুল । হারানী হাসিতে হাসিতে আসিল ।
আমি জিজ্ঞাসা করিলাম, “এত গণ্ডগোল কিসের ?”

হা । সেই বাবুটি মুচ্ছা গিয়াছিলেন ।

আমি তার পর ?

হা। এখন সামলেছেন।

আমি। তার পর ?

হা। এখন বড় অবসন্ন—বাসায় যাইতে পারিলেন না। এখানেই বড় বৈঠকখানার পাশের ঘরে শুইলেন।

বুঝিলাম, এ কৌশল। বলিলাম, “আলো সব নিবিলে, সবাই শুইলে আসিবে।”

হারাগী বলিল, “অসুখ যে গো।”

আমি বলিলাম, “অসুখ না তোর মুণ্ড। আর পাঁচ-শ খান বিবির মুণ্ড, যদি দিন পাই।”

হারাগী হাসিতে হাসিতে গেল। পরে আলো সব নিবিলে, সবাই শুইলে, হারাগী আমাকে সঙ্গে করিয়া লইয়া ঘর দেখাইয়া দিয়া আসিল। আমি ঘরের ভিতর প্রবেশ করিলাম। দেখিলাম, তিনি একাই শয়ন করিয়া আছেন। অবসন্ন কিছই না; ঘরে দুইটা বড় বড় আলো জ্বলিতেছে, তিনি নিজের কপরাশিতে সমস্ত আলো করিয়া আছেন। আমিও শরবিদ্ধ; আনন্দে শরীর আপ্ত হইল।

যৌবন প্রাপ্তির পর আমার এই প্রথম স্নানসম্ভাষণ। সে যে কি সুখ, তাহা কেমন করিয়া বলিব? আমি অত্যন্ত মুখরা—কিন্তু যখন প্রথম তাহার সঙ্গে কথা কহিতে গেলাম, কিছুতেই কথা ফুটিল না। কণ্ঠরোধ হইয়া আসিতে লাগিল। সর্ব্বাঙ্গ কাঁপিতে লাগিল। হৃদয়-মধ্যে ছপ্ ছপ্ শব্দ হইতে লাগিল। রসনা শুকাইতে লাগিল। কথা আসি না বলিয়া কাঁদিয়া ফেলিলাম।

সে অশ্রুজল তিনি বুঝিতে পারিলেন না। তিনি বলিলেন, “কাঁদিলে কেন? আমি ত তোমাকে ডাকি নাই—তুমি আপনি আসিয়াছ—তবে কাঁদ কেন?”

এই নিদারুণ বাক্যে বড় মর্শ্মপীড়া হইল। তিনি যে আমাকে কুলটা মনে করিতেছেন—ইহাতে চক্ষুর প্রবাহ আরও বাড়িল। মনে করিলাম, এখন পরিচয় দিই—এ যন্ত্রণা আর সহ্য হয় না, কিন্তু তখনই

মনে হইল যে, পরিচয় দিলে যদি ইনি না বিশ্বাস করেন, যদি মনে করেন যে, “ইহার বাড়ী কালাদীঘি, অবশ্য আমার স্ত্রীহরণের বৃত্তান্ত শুনিয়াছে, এক্ষণে ঐশ্বর্যলোভে আমার স্ত্রী বলিয়া মিথ্যা পরিচয় দিতেছে”—তাহা হইলে কি প্রকারে ইহার বিশ্বাস জন্মাইব? সুতরাং পরিচয় দিলাম না। দীর্ঘনিশ্বাস ত্যাগ করিয়া, চক্ষুর জল মুছিয়া, তাঁহার সঙ্গে কথোপকথনে প্রবৃত্ত হইলাম। অন্ত্য কথার পরে তিনি বলিলেন, “কালাদীঘি তোমার বাড়ী শুনিয়া আমি আশ্চর্য্য হইয়াছি। কালাদীঘিতে যে এমন সুন্দরী জন্মিয়াছে, তাহা আমি স্বপ্নেও জানিতাম না।”

তাঁর চক্ষুর প্রতি আমি লক্ষ্য করিতেছিলাম, তিনি বড় বিশ্বয়ের সহিত আমাকে দেখিতেছিলেন। তাঁর কথার উত্তরে আমি নেকা সাজিয়া বলিলাম, “আমি সুন্দরী না বান্দরী। আমাদের দেশের মধ্যে আপনার স্ত্রীরই সৌন্দর্য্যের গৌরব।” এই ছলক্রমে তাঁহার স্ত্রীর কথা পাড়িয়াই জিজ্ঞাসা করিলাম, “তাঁহার কি কোন সন্ধান পাওয়া গিয়াছে?”

উত্তর। না।—তুমি কত দিন দেশ হইতে আসিয়াছ?

আমি বলিলাম, “আমি সে সকল ব্যাপারের পরেই দেশ হইতে আসিয়াছি। তবে বোধ হয়, আপনি আবার বিবাহ করিয়াছেন।”

উত্তর। না।

বড় বড় কথায়, উত্তর দিবার তাঁহার অবকাশ দেখিলাম না। আমি উপযাচিকা, অভিসারিকা হইয়া আসিয়াছি,—আমাকে আদর করিবারও তাঁর অবসর নাই। তিনি সবিস্ময়ে আমার প্রতি চাহিয়া রহিলেন। একবারমাত্র বলিলেন, “এমন রূপ ত মানুষের দেখি নাই।”

সপত্নী হয় নাই, শুনিয়া বড় আহ্লাদ হইল। বলিলাম, “আপনারা যেমন বড়লোক, এটি তেমনই বিবেচনার কাজ হইয়াছে। নহিলে যদি এর পর আপনার স্ত্রীকে পাওয়া যায়, তবে দুই সতীনে ঠেকাঠকি বাঁধিবে।”

তিনি মুছ হাসিয়া বলিলেন, “সে ভয় নাই। সে স্ত্রীকে পাইলেও

আমি আর গ্রহণ করিব, এমন বোধ হয় না। তাহার আর জ্ঞাতি নাই বিবেচনা করিতে হইবে।”

আমার মাথায় বজ্রাঘাত হইল। এত আশা ভরসা সব নষ্ট হইল। তবে আমার পরিচয় পাইলে, আমাকে আপন স্ত্রী বলিয়া চিনিলেও, আমাকে গ্রহণ করিবেন না। আমার এবারকার নারীজন্ম বৃথা হইল।

সাহস করিয়া জিজ্ঞাসা করিলাম, “যদি এখন তাঁহার দেখা পান, তবে কি করিবেন?”

তিনি অগ্নানবদনে বলিলেন, “তাকে ত্যাগ করিব।”

কি নির্দয়! আমি স্তম্ভিত হইয়া রহিলাম। পৃথিবী আমার চক্ষে বুরিতে লাগিল।

সেই রাত্রিতে আমি স্বামিশয্যায় বসিয়া তাঁহার অনিন্দিত মোহন-মূর্ত্তি দেখিতে দেখিতে প্রতিজ্ঞা করিলাম, “ইনি আমায় স্ত্রী বলিয়া গ্রহণ করিবেন, নচেৎ আমি প্রাণত্যাগ করিব।”

পঞ্চদশ পরিচ্ছেদ : কুলের বাহিরে

তখন সে চিন্তিত ভাব আমার দূর হইল। ইতিপূর্বেই বুরিতে পারিয়া ছিলাম যে, তিনি আমার বশীভূত হইয়াছেন। মনে মনে কহিলাম, যদি গণ্ডারের খড়গ-প্রয়োগে পাপ না থাকে, যদি হস্তীর দস্ত-প্রয়োগে পাপ না থাকে, যদি ব্যাঘ্রের নখব্যবহারে পাপ না থাকে, যদি মহিষের শৃঙ্গাঘাতে পাপ না থাকে, তবে আমারও পাপ হইবে না। জগদীশ্বর আমাদিগকে যে সকল আয়ুধ দিয়াছেন, উভয়ের মঙ্গলার্থে তাহা প্রয়োগ করিব। যদি কখন “মল বাজিয়ে” যেতে হয়, তবে সে এখন। আমি তাঁহার নিকট হইতে দূরে আসিয়া বসিলাম। তাঁর সঙ্গে প্রফুল্ল হইয়া কথা কহিতে লাগিলাম। তিনি নিকটে আসিলেন, আমি তাঁহাকে কহিলাম, “আমার নিকটে আসিবেন না, আপনার একটি ভ্রম জন্মিয়াছে দেখিতেছি,” [হাসিতে হাসিতে আমি এই কথা বলিলাম এবং বলিতে বলিতে কবরীমোচনপূর্বক (সত্য কথা না বলিলে

কে এ ইতিহাস বুঝিতে পারিবে ?) আবার বাঁধিতে বসিলাম,]
 “আপনার একটি ভ্রম জন্মিয়াছে। আমি কুলটা নহি : আপনার
 নিকটে দেশের সংবাদ শুনিব বলিয়াই আসিয়াছি। অসৎ অভিপ্রায়
 কিছুই নাই।”

বোধ হয়, তিনি এ কথা বিশ্বাস করিলেন না। অগ্রসর হইয়া
 বসিলেন। আমি তখন হাসিতে হাসিতে বলিলাম, “তুমি কথা শুনিলে
 না, তবে আমি চলিলাম, তোমার সঙ্গে এই সাক্ষাৎ,” এই বলিয়া আমি
 যেমন করিয়া চাহিতে হয়, তেমনি করিয়া চাহিতে চাহিতে, আমার
 কৃষ্ণিত, মসৃণ, সুবাসিত অলকদামের প্রান্তভাগ, যেন অনবধানে, তাঁহার
 গণ্ড স্পর্শ করাইয়া সঙ্কার বাতাসে বসন্তের লতার মত একটু হেলিয়া
 গাত্রোস্থান করিলাম।

আমি সত্য সত্যই গাত্রোস্থান করিলাম দেখিয়া তিনি ক্ষুণ্ণ
 হইলেন, আসিয়া আমার হাত ধরিলেন। মল্লিকাকোরকের বালার
 উপর তাঁর হাত পড়িল। তিনি হাতথানা ধরিয়া রাখিয়া যেন
 বিশ্বিতের মত হাতের পানে চাহিয়া রহিলেন। আমি বলিলাম,
 “দেখিতেছ কি ?” তিনি উত্তর করিলেন, “এ কি ফুল ? এ ফুল ত
 মানায় নাই। ফুলটার অপেক্ষা মানুষটা সুন্দর। মল্লিকা ফুলের
 চেয়ে মানুষ সুন্দর এই প্রথম দেখিলাম।” আমি রাগ করিয়া হাত
 ছুঁড়িয়া ফেলিয়া দিলাম, কিন্তু হাসিলাম, বলিলাম, “তুমি ভাল মানুষ
 নও। আমাকে ছুঁইও না। আমাকে ছুঁচরিত্রা মনে করিও না।”

এই বলিয়া আমি দ্বারের দিকে অগ্রসর হইলাম। স্বামী—অত্যাপি
 সে কথা মনে পড়িলে দুঃখ হয়—তিনি হাতযোড় করিয়া ডাকিলেন,
 “আমার কথা রাখ, যাইও না। আমি তোমার রূপ দেখিয়া পাগল
 হইয়াছি। এমন রূপ আমি কখন দেখি নাই। আর একটু দেখি।
 এমন আর কখন দেখিব না।” আমি আবার ফিরিলাম—কিন্তু
 বসিলাম না—বলিলাম, “প্রাণাধিক ! আমি কোন্ দার, আমি যে
 তোমা হেন রত্ন ত্যাগ করিয়া যাইতেছি, ইহাতেই আমার মনের দুঃখ
 বুঝিও। কিন্তু কি করিব ? কন্দুই আমাদিগের একমাত্র প্রধান ধন—

এক দিনের সুখের জন্ত আমি ধর্ম ত্যাগ করিব না। আমি না বুঝিয়া, না ভাবিয়া, আপনাদের কাছে আসিয়াছি। না বুঝিয়া, না ভাবিয়া, আপনাকে পত্র লিখিয়াছিলাম। কিন্তু আমি একেবারে অধঃপাতে যাই নাই। এখনও আমার রক্ষার পথ খোলা আছে। আমার ভাগ্য যে, সে কথা এখন আমার মনে পড়িল! আমি চলিলাম।”

তিনি বলিলেন, “তোমার ধর্ম তুমি জান। আমায় এমন দশায় ফেলিয়াছ যে, আমার আর ধর্ম্যাধর্ম্য জ্ঞান নাই। আমি শপথ করিতেছি, তুমি চিরকাল আমার হৃদয়ে স্থায়ী হইয়া থাকিবে। এক দিনের জন্ত মনে করিও না।”

আমি হাসিয়া বলিলাম, “পুরুষের শপথে বিশ্বাস নাই। এক মুহূর্তের সাক্ষাতে কি এত হয়?” এই বলিয়া আবার চলিলাম—দ্বার পর্য্যন্ত আসিলাম। তখন আর ধৈর্য্যাবলম্বন করিতে না পারিয়া তিনি দুই হস্তে আমার দুই চরণ ধরিয়া পথরোধ করিলেন। বলিলেন, “আমি যে এমন আর কখন দেখি নাই।” তাহার মন্যভেদী দীর্ঘনিশ্বাস পড়িল। তাহার দশা দেখিয়া আমার দুঃখও হইল। বলিলাম, “তবে তোমার বাসায় চল—এখানে থাকিলে তুমি আমায় ত্যাগ করিয়া যাইবে।”

তিনি তৎক্ষণাৎ সম্মত হইলেন। তাহার বাসা সিমলায়, অল্প দূর। তাঁর গাড়িও হাজির ছিল, এবং দ্বারবানেরা নিদ্রিত। আমরা নিঃশব্দে দ্বার খুলিয়া গাড়িতে গিয়া উঠিলাম। তাঁর বাসায় গিয়া দেখিলাম, দুই মহল বাড়ী। একটি ঘরে আমি অগ্রে প্রবেশ করিলাম। প্রবেশ করিয়াই ভিতর হইতে দ্বার রুদ্ধ করিলাম। স্বামী বাহিরে পড়িয়া রহিলেন।

তিনি বাহির হইতে কাতরোক্তি করিতে লাগিলেন। আমি হাসিতে হাসিতে বলিলাম, “আমি এখন তোমারই দাসী হইলাম। কিন্তু দেখি, তোমার শ্রণয়ের বেগ কাল প্রাতঃকাল পর্য্যন্ত থাকে কি না থাকে। যদি কালও এমনি ভালবাসা দেখিতে পাই, তখন তোমার সঙ্গে আবার আলাপ করিব। আজ এই পর্য্যন্ত।”

আমি দ্বার খুলিলাম না; অগত্যা তিনি অস্থির গিয়া বিশ্রাম

করিলেন। জ্যৈষ্ঠ মাসের অসহ্য সম্ভাপে, দারুণ তৃষাপীড়িত রোগীকে স্বচ্ছ শীতল জলাশয়তীরে বসাইয়া দিয়া, মুখ বাঁধিয়া দাও, যেন সে জল পান করিতে না পারে—বল দেখি, তার জলে ভালবাসা বাড়িবে কি না ?

অনেক বেলা হইলে দ্বার খুলিলাম, দেখিলাম স্বামী দ্বারে আসিয়া দাঁড়াইয়া আছেন। আমি আপনার করে তাঁহার কর গ্রহণ করিয়া বলিলাম, “প্রাণনাথ, হয় আমাকে রামরাম দণ্ডের বাড়ী পাঠাইয়া দাও, নচেৎ অষ্টাহ আমায় সঙ্গে আলাপ করিও না। এই অষ্টাহ তোমার পরীক্ষা।” তিনি অষ্টাহ পরীক্ষা স্বীকার করিলেন।

ষোড়শ পরিচ্ছেদ : খুন করিয়া ফাঁসি গেলাম

পুরুষকে দণ্ড করিবার যে কোন উপায় বিধাতা স্ত্রীলোককে দিয়াছেন, সেই সকল উপায়ই অবলম্বন করিয়া আমি অষ্টাহ স্বামীকে জ্বালাতন করিলাম। আমি স্ত্রীলোক—কেমন করিয়া মুখ ফুটিয়া সে সকল কথা বলিব। আমি যদি আগুন জ্বালিতে না জানিতাম, তবে গত রাত্রিতে এত জ্বলিত না। কিন্তু কি প্রকারে আগুন জ্বালিলাম—কি প্রকারে ফুৎকার দিলাম—কি প্রকারে স্বামীর হৃদয় দণ্ড করিলাম. লজ্জায় তাহার কিছুই বলিতে পারি না। যদি আমার কোন পাঠিক। নরহত্যার ব্রত গ্রহণ করিয়া থাকেন, এবং সফল হইয়া থাকেন. তবে তিনিই বুঝিবেন। যদি কোন পাঠিক কখন এইরূপ নরঘাতিনীর হস্তে পড়িয়া থাকেন, তিনিই বুঝিবেন। বলিতে কি স্ত্রীলোকই পৃথিবীর কণ্ঠক। আমাদের জাতি হইতে পৃথিবীর যত অনিষ্ট ঘটে, পুরুষ হইতে তত ঘটে না। সৌভাগ্য এই যে, এই নরঘাতিনী বিঘ্না সকল স্ত্রীলোকে জানে না, তাহা হইলে এত দিনে পৃথিবী নিশ্চল হইত।

এই অষ্টাহ আমি সর্বদা স্বামীর কাছে কাছে থাকিতাম—আদর করিয়া কথা কহিতাম নীরস কথা একটি কহিতাম না। হাসি, চাহনি, অঙ্গভঙ্গী,—সে সকল ত ইতর স্ত্রীলোকের অঙ্গ। আমি প্রথম দিনে

আদর করিয়া কথা कहিলাম—দ্বিতীয় দিনে অনুরাগ লক্ষণ দেখাইলাম—তৃতীয় দিনে তাঁহার ঘরকরনার কাজ করিতে আরম্ভ করিলাম ; যাহাতে তাঁহার আহারের পারিপাট্য, শয়নের পারিপাট্য, স্নানের পারিপাট্য হয়, সর্ব্বাংশে যাহাতে ভাল থাকেন, তাহাই করিতে আরম্ভ করিলাম—সহস্বে পাক করিতাম, খড়িকাটি পর্য্যন্ত স্বয়ং প্রস্তুত করিয়া রাখিতাম। তাঁর এতটুকু অসুখ দেখিলে সমস্ত রাত্রি জাগিয়া সেবা করিতাম।

এখন যুক্তকরে আপনাদের নিকট নিবেদন যে, আপনারা না মনে করেন যে, এ সকলই কৃত্রিম। ইন্দিরার মনে এতটুকু গর্ব্ব আছে যে, কেবল ভরণপোষণের লোভে, অথবা স্বামীর ধনে ধনেশ্বরী হইব, এই লোভে, সে এই সকল করিতে পারে না। স্বামী পাইব এই লোভে, কৃত্রিম প্রণয় প্রকাশ করিতে পারিতাম না, ইন্দ্রের ইন্দ্রাণী হইব, এমন লোভেও পারিতাম না। স্বামীকে মোহিত করিব বলিয়া হাসি-চাহনির ঘট্টা ঘট্টাইতে পারি, কিন্তু স্বামীকে মোহিত করিব বলিয়া কৃত্রিম ভালবাসা ছড়াইতে পারি না। ভগবান্ সে মাটিতে ইন্দিরাকে গড়েন নাই। যে অভাগী এ কথাটা না বুঝিতে পারিবে,—যে নারকিণী আমায় বলিবে, “হাসি-চাহনির ফাঁদ পাতিতে পার, গোঁপা খুলিয়া আবার বাঁধিতে পার, কথার ছলে সুগন্ধি কুঞ্চিতালকগুলি হতভাগ্য মিন্‌সের গালে ঠেকাইয়া তাকে রোমাঞ্চিত করিতে পার—আর পার না তার পাখানি তুলিয়া লইয়া টিপিয়া দিতে, কিম্বা হুঁকার ছিলিমটায় ফুঁ দিতে!”—যে হতভাগী আমাকে এমন কথা বলিবে, সে পোড়ারমুখী আমার এই জীবনবৃত্তান্ত যেন পড়ে না।

তা, তোমরা পাঁচ রকমের পাঁচ জন মেয়ে আছ, পুরুষ পাঠকদিগের কথা আমি ধরি না—তাহারা এ শাস্ত্রের কথা কি বুঝিবে—তোমাদের আসল কথাটা বুঝাইয়া বলি। ইনি আমার স্বামী—পতিসেবাতেই আমার আনন্দ—তাই,—কৃত্রিম নহে—সমস্ত অন্তঃকরণের সহিত, আমি তাহা করিতেছিলাম। মনে মনে করিতেছিলাম যে, যদি আমাকে গ্রহণ নাই করেন, তবে আমার পক্ষে পৃথিবীর যে সার সুখ,—যাহা আর

কখনও ঘটে নাই, আর কখনও ঘটতে নাও পারে, তাহা অসম্ভব: এই কয় দিনের জ্ঞান প্রাণ ভরিয়া ভোগ করিয়া লই। তাই প্রাণ ভরিয়া পতিসেবা করিতেছিলাম। ইহাতে কি পরিমাণে সুখী হইতেছিলাম, তা তোমরা কেহ বুঝিবে, কেহ বুঝিবে না।

পুরুষ পাঠককে দয়া করিয়া কেবল হাসি-চাহনির তত্ত্বটা বুঝাইব। যে বুদ্ধি কেবল কালেজের পরীক্ষা দিলেই সীমাপ্রাপ্ত পৌছে, ওকালতিতে দশ টাকা আনিতে পারিলেই বিশ্ব-বিজয়িনী প্রতিভা বলিয়া স্বীকৃত হয়, যাহার অভাবই রাজদ্বারে সম্মানিত, সে বুদ্ধির ভিতর পতিভক্তিভঙ্গ প্রবেশ করান যাইতে পারে না। যাহারা বলে বিধবার বিবাহ দাও, খেড়ে মেয়ে নহিলে বিবাহ দিও না, মেয়েকে পুরুষ মানুষের মত নানা শাস্ত্রে পণ্ডিত কর, তাহারা প্রতিভক্তিভঙ্গ বুঝিবে কি? তবে হাসি-চাহনির তত্ত্বটা যে দয়া করিয়া বুঝাইব বলিয়াছি, তার কারণ, সেটা বড় মোটা কথা। যেমন মাল্লত অক্ষুণ্ণের দ্বারা হাতীকে বশ করে, কোচমান ঘোড়াকে চাবুকের দ্বারা বশ করে, রাখাল গোরুকে পাঁচনবাড়ির দ্বারা বশ করে, ইংরেজ যেমন চোখ রাজাইয়া বাবুর দল বশ করে, আমরা তেমনই হাসি-চাহনিতে তোমাদের বশ করি। আমরাদিগের পতিভক্তি আমাদের গুণ; আমরাদিগের যে হাসি-চাহনির কদর্য কলঙ্কে কলঙ্কিত হইতে হয়, সে তোমাদের দোষ।

তোমরা বলিবে, এ অত্যন্ত অহঙ্কারের কথা। তা বটে—আমরাও মাটির কলসী, ফুলের ঘায়ে ফাটিয়া যাই। আমার এ অহঙ্কারের ফল হাতে হাতে পাইতেছিলাম। যে ঠাকুরটির অঙ্গ নাই, অথচ ধনুর্বাণ আছে,—মা বাপ নাই*, অথচ স্ত্রী আছে—ফুলের বাণ, অথচ তাহাতে পর্বতও বিদীর্ণ হয়; সেই দেবতা স্ত্রীজাতির গর্ব্বথর্ব্বকারী। আমি আপনার হাসি-চাহনির কাঁদে পরকে ধরিতে গিয়া, পরকেও ধরিলাম আপনিও ধরা পড়িলাম। আগুন ছড়াইতে গিয়া, পরকেও পোড়াইলাম, আপনিও পুড়িলাম। হোলির দিনে আবীর খেলার মত, পরকে রাজা করিতে গিয়া, আপনি অল্পরাগে রাজা হইয়া গেলাম। আমি এখন

* আশ্রয়ান

করিতে গিয়া, আপনি ফাঁসি গেলাম । বলিয়াছি, তাঁহার কপ মনোহর
কপ—তাতে আবার জানিযাছি, যঁার এ কপরাশি, তিনি আমারই
সামগ্রী ;—

তাহারই সোহাগে আমি সোহাগিনী,

কপসী তাহারই কপে ।

তার পর এই আশ্বনের ছড়াছড়ি ! আমি হাসিতে জানি, হাসির
কি উতাব নাই ? আমি চাহিতে জানি, চাহনির কি পাল্টা চাহনি
নাই ? আমার আধরোষ্ঠ দূর হইতে চুষনাকাঙ্ক্ষায় ফুলিয়া থাকে,
ফুলর কুঁড়ি পাপড়ি পুলিয়া ফুটিয়া থাকে, তাহার প্রফুল্লরক্তপুষ্পতুল্য
কোমল অধরোষ্ঠ কি তেমনি করিয়া ফুটিয়া, উঠিয়া, পাপড়ি খুলিয়া
আমার দিকে ফিরিতে জানে না ? আমি যদি তাঁর হাসিতে, তাঁহার
চাহনিতে, তাঁর চুষনাকাঙ্ক্ষায়, এতটুকু ইন্দ্রিয়াকঙ্কার লক্ষণ দেখিতাম,
তবে আমিই জয়ী হইতাম । তাহা নহে । সে হাসি, সে চাহনি, সে
অধরোষ্ঠবিফুরণে, কেবল স্নেহ—অপরিমিত ভালবাসা । কাজেই আমিই
হারিলাম । হারিয়া স্তম্ভিত করিলাম যে, ইহাই পৃথিবীর ষোল আনা
সুখ । যে দেবতা, ইহার সঙ্গে দেহের সম্বন্ধ ঘটাইয়াছে, তাহার নিজের
দেহ যে ছাই হইয়া গিয়াছে, খুব হইয়াছে

পরীক্ষার কাল পূর্ণ হইয়া আসিল, কিন্তু আমি তাঁহার ভালবাসার
এমনই অধীন হইয়া পড়িয়াছিলাম যে, মনে মনে স্থির করিয়াছিলাম যে,
পরীক্ষার কাল অতীত হইলে তিনি আমাকে মারিয়া তাড়াইয়া দিলেও
যাইব না । পরিণামে যদি তিনি আমার পরিচয় পাইয়াও যদি আমাকে
স্ত্রী বলিয়া গ্রহণ না করেন, গণিকার মতও যদি তাঁহার কাছে থাকিতে
হয়, তাহাও থাকিবে, সম্মাকে পাইলে, লোকলজ্জাকে ভয় করিব না ।
কিন্তু যদি কপালে তাৎ না ঘটে, এই ভয়ে অবসর পাইলেই কাঁদিতে
বসিতাম ।

কিন্তু ইহাও বুঝিয়াছিলাম যে, প্রাণনাথের পক্ষচ্ছেদ হইয়াছে ।
আর উড়িবার শক্তি নাই । তাঁহার অনুরাগানলে অরিমিত বৃত্যছতি
পড়িতেছিল । তিনি এখন অনশ্রুকন্যা হইয়া কেবল আমার মুখ পানে

চাহিয়া থাকিতেন। আমি গৃহকর্ষ করিতাম—তিনি বালকের মত আমার সঙ্গে সঙ্গে বেড়াইতেন। তাঁহার চিত্তের তুর্দমনীয় বেগ প্রতি পদে দেখিতে পাইতাম, অথচ আমার ইচ্ছিতমাত্র স্থির হইতেন। কখন কখন আমার চরণস্পর্শ করিয়া রোদন করিতেন, বলিতেন, “আমি এ অষ্টাহ তোমার কথা পালন করিব—তুমি আমায় ত্যাগ করিয়া যাইও না।” ফলে আমি দেখিলাম যে, আমি তাঁহাকে ত্যাগ করিলে তাঁহার দশা বড় মন্দ হইবে।

পরীক্ষা কাঁসিয়া গেল। অষ্টাহ অর্থাৎ হইলে, বিনা বাক্যবয়ে উভয়ে উভয়ের অধীন হইলাম। তিনি আমায় কুলটা বলিয়া জানিলেন। তাহাও সহ করিলাম। কিন্তু আমি যাই হই, হাতীর পায়ে শিকল পরাইয়াছি, ইহা বুঝিলাম।

সম্বৎসর পরিচ্ছেদ : কাঁসির পর মোকদ্দমার তদারক

আমরা কলিকাতায় দিনকত সুখে-স্বচ্ছন্দে রহিলাম। তার পর দেখিলাম, স্বামী একদিন একখানা চিঠি হাতে করিয়া অত্যন্ত বিষণ্ণ ভাবে রহিয়াছেন। জিজ্ঞাসা করিলাম, “এত বিষণ্ণ কেন?”

তিনি বলিলেন, “বাড়ী হইতে চিঠি আসিয়াছে। বাড়ী যাইতে হইবে।”

আমি হঠাৎ বলিয়া ফেলিলাম, “আমি!” আমি দাঁড়াইয়াছিলাম—মাটিতে বসিয়া পড়িলাম। চক্ষু দিয়া দরবিগলিত ধারা পড়িতে লাগিল।

তিনি সন্মুখে হাত ধরিয়া আমায় তুলিয়া মুখচুম্বন করিয়া, অশ্রুজল মুছাইয়া দিলেন। বলিলেন, “সেই কথাই আমিও ভাবিতেছিলাম। তোমায় ছাড়িয়া যাইতে পারিব না।”

আমি। সেখানে আমাকে কি বলিয়া পরিচিত করিবে?—কি প্রকারে, কোথায় রাখিবে?

তিনি। তাই ভাবিতেছি। শহর নহে যে, আর একটা জায়গায়

রাখিব, কেহ বড় জানিতে পারিবে না। বাপ মার চক্ষের উপর,
তোমায় কোথায় রাখিব ?

আমি। না গেলেই কি নয় ?

তিনি। না গেলেই নয়।

আমি। কত দিনে ফিরিবে ? শীঘ্র ফের যদি, তবে আমাকে না
হয়, এইখানেই রাখিয়া যাও।

তিনি। শীঘ্র ফিরতে পারব, এমন ভরসা নাই। কলিকাতায়
আমরা কালেভদ্রে আসি।

আমি। তুমি যাও—আমি তোমার জঞ্জাল হইব না। (বিস্তর
কাঁদিতে কাঁদিতে এই কথা বলিলাম) আমার কপালে যা থাকে,
তাই ঘটবে।

তিনি। কিন্তু আমি যে তোমায় না দেখিলে পাগল হইব।

আমি। দেখ, আমি ত তোমার বিবাহিতা স্ত্রী নহি—(স্বামী
মহাশয় একটু নড়িয়া উঠিলেন)—তোমার উপর আমার কোন
অধিকার নাই। আমাকে তুমি এ সময় বিদায়—

তিনি আমাকে আর কথা কহিতে দিলেন না। বলিলেন, “আজ
আর এ কথায় কাজ নাই। আজ ভাবি। যা ভাবিয়া স্থির করিব,
কাল বলিব।”

বৈকালে তিনি রমণবাবুকে আসিতে লিখিলেন। লিখিলেন,
“গোপনীয় কথা আছে। এখানে না আসিলে বলা হইবে না।”

রমণবাবু আসিলেন। আমি কবাটের আড়াল হইতে শুনিতে
লাগিলাম, কি কথা হয়। স্বামী বলিলেন, “আপনাদিগের সেই
পাচিকাটি—যে অল্পবয়সী—তাহার নাম কি ?”

রমণ। কুমুদিনী।

উপেক্ষ। তাহার বাড়ী কোথায় ?

রমণ। এখন বলিতে পারি না।

উ। সধবা না বিধবা ?

র। সধবা।

- উ। তার স্বামী কে জানেন ?
- র। জানি।
- উ। কে ?
- র। এক্ষণে বলিবার আমার অধিকার নাই
- উ। কেন, কিছু গুপ্ত রহস্য আছে নাকি ?
- র। আছে।
- উ। আপনারা উহাকে কোথায় পাইলেন ?
- র। আমার স্ত্রী তাহার মাসীর কাছে উহাকে পাইয়াছেন
- উ। যাক্—এ সব বাজে কথা উহার চরিত্র কেমন ?
- র। অনিন্দনীয়। আমাদের বুড়ী বাঁধনীটাকে বড় ক্ষেপাইত
তা ছাড়া একটি দোষও নাই।
- উ। স্ত্রীলোকের চরিত্রদোষের কথা জিজ্ঞাসা করিতেছি।
- র। এমন উৎকৃষ্ট চরিত্র দেখা যায় না
- উ। উহার বাড়ী কোথায়, কেন বলিতেছেন না ?
- র। বলিবার অধিকার নাই।
- উ। স্বামীর বাড়ী কোথায় ?
- র। ঐ উত্তর।
- উ। স্বামী জীবিত আছে ?
- র। আছে।
- উ। আপনি তাহাকে চেনেন ?
- র। চিনি।
- উ। ঐ স্ত্রীলোকটি এখন কোথায় ?
- র। আপনার এই বাড়ীতে।
- স্বামী মহাশয় চমকিয়া উঠিলেন। বিস্মিত হইয়া জিজ্ঞাসা
করিলেন, “আপনি কি প্রকারে জানিলেন ?”
- র। আমার বলিবার অধিকার নাই! আপনার জেরা কি
ফুরাইল ?
- উ। ফুরাইল। কিন্তু আপনি ত জিজ্ঞাসা করিলেন না যে,

আমি কেন আপনাকে এ সকল কথা জিজ্ঞাসা করিলাম ?

র। দুই কারণে জিজ্ঞাসা করিলাম না। একটি এই যে, জিজ্ঞাসা করিলে, আপনি বলিবেন না। সত্য কি না ?

উ। সত্য। দ্বিতীয় কারণটি কি ?

র। আমি জানি, যে জগৎ জিজ্ঞাসা করিতেছেন।

উ। তাও জানেন ? কি বলুন দেখি ?

র। তা বলিব না।

উ। আচ্ছা, আপনি ত সব জানেন দেখিতেছি। বলুন দেখি, আমি যে অভিসন্ধি করিতেছি, তাহা ঘটিতে পারে কি না ?

র। খুব ঘটিতে পারে। আপনি কুমুদিনীকে জিজ্ঞাসা করিবেন।

উ। আর একটা কথা। আপনি কুমুদিনীর সম্বন্ধে যাহা জানেন, তাহা সব একটা কাগজে লিখিয়া দিয়া দস্তখত করিয়া দিতে পারেন ?

র। পারি—এক সৰ্ভে। আমি লিখিয়া পুলিন্দায় সীল করিয়া কুমুদিনীর কাছে দিয়া যাইব। আপনি এক্ষণে তাহা পড়িতে পারিবেন না। দেশে গিয়া পড়িবেন। রাজি ?

স্বামী মহাশয় অনেক ভাবিয়া বলিলেন, “রাজি। আমার অভিপ্রায়ের পোষাক হইবে ত ?”

র। হইবে।

অগ্ৰাণ্য কথার পর রমণ বাবু উঠিয়া গেলেন। উ-বাবু আমার নিকট আসিলেন।

আমি জিজ্ঞাসা করিলাম, “এ সব কথা হইতেছিল কেন ?”

তিনি বলিলেন, “সব শুনিয়াছ না কি ?”

আমি। হাঁ শুনিয়াছি। ভাবিতেছিলাম, আমি ত তোমায় খুন করিয়া, ফাঁসি গিয়াছি। ফাঁসির পর আর তদারক কেন ?

তিনি। এখনকার আইনে তা হইতে পারে।

অষ্টাদশ পরিচ্ছেদ : ভাবি জুয়াচুরির বন্দোবস্ত

সে দিন, দিবারাত্রি, আমার স্বামী, অশ্রুমনে ভাবিতে লাগিলেন । আমার সঙ্গে বড় কথাবার্তা কহিলেন না—আমাকে দেখিলেই আমার মুখ পানে চাহিয়া থাকিতেন । তাঁহার আপেক্ষা আমার চিন্তার বিষয় বেশী , কিন্তু তাঁকে চিন্তিত দেখিয়া, আমার প্রাণের ভিতর বড় যন্ত্রণা হইতে লাগিল । আমি আপনার দুঃখ চাপিয়া রাখিয়া, তাঁহাকে প্রফুল্ল করিবার চেষ্টা করিতে লাগিলাম । নানা প্রকার গঠনের ফুলের মালা, ফুলের তোড়া, ফুলের জিনিসপত্র গড়িয়া উপহার দিলাম, পানগুলি নানা রকমের সাজিলাম, নানা রকমের সুখান্ন প্রস্তুত করিলাম, আপনি কাঁদিতেছি, তবু নানা রসের রসভরা গল্পের অবতারণা করিলাম । আমার স্বামী বিষয়ী লোক—সর্বাপেক্ষা বিষয়কর্ম ভালবাসেন ; তাহা বিচার করিয়া বিষয়কর্মের কথা পাড়িলাম , আমি হরমোহন দত্তের কন্যা, বিষয়কর্ম না বুদ্ধিতাম, এমন নহে । কিছুতেই কিছু হইল না । আমার কান্নার উপর আরও কান্না বাড়িল ।

পরদিন প্রাতে, স্নানাহ্নিকের পর জলযোগ করিয়া, তিনি আমাকে নিকটে বসাইয়া বলিলেন, “বোধ করি, যা জিজ্ঞাসা করিব, সকল কথার প্রকৃত উত্তর দিবে ?”

তখন রমণবাবুকে জেরা করার কথাটা মনে পড়িল । বলিলাম, “যাহা বলিব, সত্যই বলিব । কিন্তু সকল কথার উত্তর না দিতে পারি ।”

তিনি জিজ্ঞাসা করিলেন, “তোমার স্বামী জঁাবিত আছেন, শুনিলাম । তাঁর নান ধর্ম প্রকাশ করিবে ?”

আমি । এখন না । দিন কত যাক্ ।

তিনি । তিনি এখন কোথায় আছেন বলিবে ?

আমি । এই কলিকাতায় ।

তিনি । (একটু চমকিত হইয়া) তুমি কলিকাতায়, তোমার

স্বামী বলিকাতায়, তবে তুমি তাঁর কাছে থাক না কেন ?

আমি। তাঁর সঙ্গে আমার পরিচয় নাই।

পাঠক দেখিও, আমি সব সত্য বলিতেছি। আমার স্বামী এই উক্তর
শুনিয়া বিস্মিত হইয়া কহিলেন, “স্ত্রী-পুরুষে পরিচয় নাই ? এ ত বড়
আশ্চর্য্য কথা !”

আমি। সকলের কি থাকে ? তোমার কি আছে ?

একটু অপ্রতিভ হইয়া তিনি বলিলেন, “সে ত কতকগুলো হৃদেঁবে
ঘটিয়াছে।”

আমি। হৃদেঁব সর্বত্র আছে।

তিনি। যাক্—তিনি ভবিষ্যতে তোমার উপর কোন দাবি-দাওয়া
করিবার সম্ভাবনা আছে কি ?

আমি। সে আমার হাত। আমি যদি তাঁর কাছে আব্রুপরিচয়
দিই, তবে কি হয় বলা যায় না।

তিনি। তবে তোমাকে সকল কথা ভাঙ্গিয়া বলি, তুমি খুব
দক্ষিমর্তী, তাহা বুঝিয়াছি। তুমি কি পরামর্শ দাও শুনি।

আমি। বল দেখি।

তিনি। আমাকে বাড়ী যাইতে হইবে।

আমি। বুঝিলাম।

তিনি। বাড়ী গেলে শীঘ্র ফিরিতে পারিব না।

আমি। তাও শুনিতেছি।

তিনি। তোমাকে ফেলিয়া যাইতেও পারিব না। তা হ'লে মরিয়া
যাইব।

প্রাণ আমার কণ্ঠাগত, তবু আমি এক রাশি হাসি হাসিয়া বলিলাম;
“পোড়া কপাল। তাত ছড়াইলে কাকের অভাব কি ?”

তিনি। কোকিলের ছঃখ কাকে যায় না। আমি তোমাকে লইয়াই
যাইব।

আমি। কোথায় রাখিবে ? কি পরিচয়ে রাখিবে ?

তিনি। একটা ভারি জুয়াচুরি করিব। তাই কাল সমস্ত দিন

ভাবিয়াছি । তোমার সঙ্গে কথা কহি নাই ।

আমি । বলিবে যে, এই ইন্দিরা—রামরাম দস্তের বাড়ীতে খুঁজিয়া পাইয়াছি ।

তিনি । আ সর্বনাশ ! তুমি কে ?

স্বামী মহাশয়, নিস্পন্দ হইয়া, দুই চক্ষের তারা উপর দিকে তুলিয়া, আমার মুখ পানে চাহিয়া রহিলেন । আমি জিজ্ঞাসা করিলাম, “কেন কি হইয়াছে ?”

তিনি । ইন্দিরা নাম জানিলে কি প্রকারে ? আর আমার মনের গুপ্ত অভিপ্রায়ই বা জানিলে কি প্রকারে ? তুমি মানুষ, না কোন মায়াবিনী ?

আমি । সে পরিচয় পশ্চাৎ দিব । এখন আমি তেমাকে পাল্টা জেরা করিব, স্বরূপ উত্তর দাও ।

তিনি । (সত্যে) বল ।

আমি । সেদিন তুমি আমাকে বলিয়াছিলে যে, তোমার স্ত্রীকে পাওয়া গেলেও তুমি গ্রহণ করিবে না ; কেন না, তাহাকে ডাকাতে কাড়িয়া লইয়া গিয়াছে ; তোমার জাতি যাইবে । আমাকে ইন্দিরা বলিয়া ঘরে লইয়া গেলে সে ভয় নাই কেন ?-

তিনি । সে ভয় নাই ? খুবই আছে । তবে তাহাতে আমার প্রাণের দায় ছিল না—এখন আমার প্রাণ যায়—জাতি বড়, না প্রাণ বড় ? আর সেটাও তেমন বিষম সঙ্কট নয় । ইন্দিরা যে জাতিভ্রষ্ট হইয়াছিল, এমন কথা কেহ বলে না । কালানুগিতে যাহারা ডাকাতি করিয়াছিল, তাহারা ধরা পড়িয়াছে । তাহারা একরার করিয়াছে । একরারে বলিয়াছে, ইন্দিরার গহনাগাঁটি মাত্র কাড়িয়া লইয়া তাহাকে ছাড়িয়া দিয়াছে । কেবল এখন সে কোথায় আছে, কি হইয়াছে, তাই কেহ জানে না ; পাওয়া গেলে একটা কলঙ্কশূন্য বৃত্তান্ত অনায়াসেই তৈয়ার করিয়া বলা যাইতে পারে । ভরসা করি, রমণবাবু যাহা লিখিয়া দিবেন, তাহাতে তাহার পোষকতা করিবে । তা'তেও যদি কোন কথা উঠে, গ্রামে কিছু সামাজিক দিলেই গোল মিটিবে । আমাদের টাকা

আছে—টাকায় সবাইকে বশীভূত করা যায় ।

আমি । যদি সে আপত্তি কাটে, তবে আর আপত্তি কি ?

তিনি । গোল তোমাকে জইয়া তুমি জাল ইন্দিরা, যদি ধরা পড় ?

আমি । তোমাদের বাড়িতে আমাকেও কেহ চেনে না, আসল ইন্দিরাকেও কেহ চেনে না, কেন না, কেবল একবার বালিকাবয়সে তাহাকে তোমরা দেখিয়াছিলে, তবে ধরা পড়িব কেন ?

তিনি । কথায় নূতন লোক গিয়া জানা লোক সাজিলে সহজে কথায় ধরা পড়ে ।

আমি । তুমি না হয়, আমাকে সব শিখাইয়া পড়াইয়া রাখিবে ।

তিনি । তা ত মনে করিয়াছি কিন্তু সব কথা ত শিখান যায় না । মনে কর, যদি সে কথা শিখাইতে মনে হয় নাই, এমন কথা পড়ে, তবে ধরা পড়িবে মনে কব, যদি কখন আসল ইন্দিরা আসিয়া উপস্থিত হয়, উভয়ের মধ্যে বিচারকালে, পূর্বকথা জিজ্ঞাসাবাদ হইলে তুমিই ধরা পড়িবে

আমি একটু হাসিলাম এমন অবস্থায় হাসিটা আপনি আসে । কিন্তু এখন আমার প্রকৃত পরিচয় দিবার সময় হয় নাই । আমি হাসিয়া বলিলাম, “আমায় কেহ ঠকাইতে পারে না ? তুমি এইমাত্র আমায় জিজ্ঞাসা করিতেছিলে যে, আমি মানুষী না মায়াবিনী ! আমি মানুষী নহি ; (তিনি শুনিয়া শিহরিয়া উঠিলেন) আমি কি, তাহা পরে বলিব । এখন ইহাই বলিব যে, আমাকে কেহ ঠকাইতে পারে না ।”

স্বামী মহাশয় স্তম্ভিত হইলেন তিনি বুদ্ধিমান্ কন্ঠ লোক । নহিলে এত অল্প দিনে এত টাকা রোজগার করিতে পারিতেন না । মানুষটা বাহিরে একট নীরস,—কাঠকাঠ রকম, পাঠক তাহা বুঝিয়া থাকিবেন—কিন্তু ভিতর বড় মধুর, বড় কোমল, বড় স্নেহশালী ;—কিন্তু রমণবাবুর মত, এখনকার ছেলোদের মত, “উচ্চ শিক্ষায়” শিক্ষিত, নহেন । তিনি ঠাকুর দেবতা খুব মানিতেন । নানা দেশে ভ্রমণ করিয়া ভূত-প্রেত, ডাকিনী-যোগিনী, যোগী-মায়াবিনী প্রভৃতির গল্প শুনিয়া—

ছিলেন। সে সকল একটু বিশ্বাস করিতেন। তিনি আমার দ্বারা
 যেরূপ মুগ্ধ হইয়াছিলেন, তাহাও তাঁহার এই সময়ে স্মরণ হইল;
 যাহাকে আমার অসাধারণ বুদ্ধি বলিতেন, তাহাও স্মরণ হইল; যাহা
 বুদ্ধিতে পারেন নাই, তাহাও স্মরণ হইল। অতএব আমি যে বলিলাম,
 আমি মানুষী নহি, তাহাতে তাঁহার একটু বিশ্বাস হইল। তিনি কিছু
 কাল স্তম্ভিত ও ভীত হইয়া রহিলেন। কিন্তু তার পর নিজ বুদ্ধিনলে,
 সে বিশ্বাসটুকু দূর করিয়া বলিলেন. “আচ্ছা, তুমি কেমন মায়াবিনী,
 আমি যা জিজ্ঞাসা করি, বল দেখি?”

আমি। জিজ্ঞাসা কর।

তিনি। আমার স্ত্রীর নাম ইন্দिरা, জান। তার বাপের নাম কি?

আমি। হরমোহন দত্ত।

তিনি। তাঁর বাড়ী কোথায়?

আমি। মহেশপুর।

তিনি। তুমি কে!!!

আমি। তা ত বলিয়াছি যে, পরে বলিব। মানুষ নই।

তিনি। তুমি বলিয়াছিলে, তোমার বাপের বাড়ী কালাদীঘি।
 কালাদীঘির লোক, এ সকল জানিলে জানিতে পারে। এইবার বল—
 হরমোহন দত্তের বাড়ীর সদর দরওয়াজা কোন মুখ?

আমি। দক্ষিণমুখ। একটা বড় ফটকে দুই পাশে দুইটা সিংহী।

তিনি। তাঁর কয় ছেলে?

আমি। এক।

তিনি। নাম কি?

আমি। বসন্তকুমার।

তিনি। তাঁর কয় ভগিনী?

আমি। আপনার বিবাহের সময় দুইটি ছিল।

তিনি। নাম কি?

আমি। ইন্দिरা আর কামিনী?

তিনি। তাঁর বাড়ীর নিকট কোন পুকুর আছে?

আমি । আছে । নাম দেবীদিঘী । তাতে খুব পদ্ম ফুটে ।

তিনি । হাঁ, তা দেখিয়াছিলাম । তুমি কখন মহেশপুরে ছিলে ?
তার বিচিত্র কি ? তাই এত জান । আর গোটা কতক কথা বল
দেখি । ইন্দিরার বিবাহে সম্প্রদান কোথায় হয় ?

আমি । পূজার দালানের উত্তর-পশ্চিম কোণে ।

তিনি । কে সম্প্রদান করে ?

আমি । ইন্দিরার খুড়া কৃষ্ণমোহন দত্ত ।

তিনি । স্ত্রী আচারকালে এক জন আমার বড় জোরে কাণ খুলিয়া
দিয়াছিল । তার নাম আমার মনে আছে । বল দেখি তার নাম ?

আমি । বিন্দু ঠাকুরাণী—বড় বড় চোখ, রাক্ষা রাক্ষা ঠোঁট । নাকে
কাঁদি নথ ।

তিনি । ঠিক । বোধ হয়, তুমি বিবাহের দিন উপস্থিত ছিলে ।
তাদের কুটুম্ব নও ত ?

আমি । কুটুম্বের মেয়ে, চাকরাণী, কি রাঁধুনীর মেয়ের জানা
সম্ভব নয়, এমন ছুই একটা কথা জিজ্ঞাসা কর না ।

তিনি । ইন্দিরার বিবাহ কবে হইয়াছিল ?

আমি । —সালে বৈশাখ মাসের ২৭ তারিখে শুক্রপক্ষের
ত্রয়োদশীতে ।

তিনি চুপ করিয়া ভাবিলেন । তার পর বলিলেন, “আমায় অভয়
দাও, আমি আর ছুইটা কথা জিজ্ঞাসা করিব ?”

আমি । অভয় দিতেছি । বল ।

তিনি । বাসরঘরে সকলে উঠিয়া গেলে, আমি ইন্দিরাকে নিজ্জনে
একটি কথা বলিয়াছিলাম, সে তাহার উত্তর দিয়াছিল । কি কথা সে,
বল দেখি ?

বলিতে আমার একটু বিলম্ব হইল । কারণ, সে কথাটা মনে
করিতে আমার চক্ষু জল আসিতেছিল, আমি তাহা সামলাইতেছিলাম ।
তিনি বলিলেন, “এইবার বোধ হয় ঠকিলে ! বাঁচিলাম—তুমি
মায়াবিনী নয় ।” আমি চক্ষুর জল চক্ষুর ভিতর ফেরত দিয়া

বলিলাম, “তুমি ইন্দিরাকে জিজ্ঞাসা করিলে, ‘বল দেখি, আজ তোমার সঙ্গে আমার কি সম্বন্ধ হইল?’ ইন্দির। বলিল, ‘আজ হইতে তুমি আমার দেবতা হইলে, আমি তোমার দাস’ হইলাম।’ এই ত গেল একটা প্রশ্ন। আর একটা কি?”

তিনি। আর জিজ্ঞাসা করিতে ভয় কবিতোছে। আমি বৃদ্ধি বৃদ্ধি হারাইলাম। তবু বল। ফুলশয্যার দিন ইন্দির। তামাসা করিয়া আমাকে গালি দিয়াছিল, আমিও তার কিছু সাজা দিয়াছিলাম। বল দেখি, সে কথাগুলি কি?

আমি। তুমি ইন্দিরার হাত এক হাতে ধরিয়া, আর হাত তার কাধে দিয়া জিজ্ঞাসা করিয়াছিলে, ‘ইন্দিরে, বল দেখি, আমি তোমার কে?’ তাতে ইন্দির। উত্তর করিয়াছিল, ‘শুনিয়াছি, তুমি আমার ননদের বর।’ তুমি দণ্ডস্বরূপ তার গালে একটা ঠোনা মারিয়া, তা’কে একটু অপ্ৰতিভ দেখিয়া পরিশেষে মুখচুম্বন করিয়াছিলে। বলিতে বলিতে আমার শরীর অপূর্ব আনন্দরসে আপ্ত হইল—সেই আমার জীবনের প্রথম মুখচুম্বন। তার পর সুভাষিণীকৃত সেই সুধারষ্টি। ইহার মধ্যে ঘোরতর অনারষ্টি গিয়াছে হৃদয় শুকাইয়া মাঠ-ফাটা হইয়াছিল।

এই কথা ভাবিতেছিলাম, দেখিলাম, স্বামী ধীরে ধীরে বালিসের উপর মাথা রাখিয়া চক্ষু বুজিলেন। আমি বলিলাম, “আর কিছু জিজ্ঞাসা করিবে?”

তিনি বলিলেন, “না। তবু তুমি ‘স্বয়ং’ ইন্দির।, নয় কোন মায়াবিনী।”

উনবিংশ পরিচ্ছেদ : বিজ্ঞাধর

দেখিলাম, এক্ষণে অনায়াসে আত্মপরিচয় দিতে পারি। আমার স্বামীর নিজ মুখ হইতে আমার পরিচয় ব্যক্ত হইয়াছে। কিন্তু কিছুমাত্র সন্দেহ থাকিতে, আমি পরিচয় দিব না, স্থিয় করিয়াছিলাম। তাই

বলিলাম, “এখন আত্মপরিচয় দিব। কামরূপে আমার অধিষ্ঠান। আমি আত্মশক্তির মহামন্দিরে তাঁহার পাশে থাকি। লোকে আমাদিগকে ডাকিনী বলে, কিন্তু আমরা ডাকিনী নই। আমরা বিদ্বাধরী। আমি মহামায়ার নিকট কোন অপরাধ করিয়াছিলাম, সেই জন্ত অভিসম্পাতগ্রস্ত হইয়া এই মানবীরূপ ধারণ করিয়াছি। পাচিকারুত্তি এবং কুলটারুত্তিও ভগবৎগীর শাপের ভিতর। তাই এই সকলও অদৃষ্টে ঘটিয়াছে। এক্ষণে আমার শাপ হইতে মুক্ত হইবার সময় উপস্থিত হইয়াছে। আমি জগন্মাতাকে স্তবে প্রসন্ন করিণে, তিনি আশ্রয় করিয়াছেন যে, মহাভৈরবীদর্শন করিবামাত্র আমি মুক্তিলাভ করিব।”

তিনি জিজ্ঞাসা করিলেন, “সে কোথায়?”

আমি বলিলাম, “মহাভৈরবীর মন্দির মহেশপুরে তোমার শঙ্কর-বাড়ীর উত্তরে। সে তাঁদেরই ঠাকুরবাড়ী, বাড়ীর গায়ে, খিড়কি দিয়া যাতায়াতের পথ আছে। চল, মহেশপুরে যাই।”

তিনি ভাবিয়া বলিলেন, “তুমি বুঝি আমার ইন্দিরাই হইবে। কুমুদিনী যদি ইন্দিরা, তাহা হইলে কি সুখ। পৃথিবীতে তাহা হইলে আমার মত সুখী কে?”

আমি। যেই হই, মহেশপুর গেলেই সব গোল মিটিবে।

তিনি। তবে চল, কাল এখন হইতে যাত্রা করি। আমি তোমাকে কালাদীঘি পার করিয়া দিয়া মহেশপুরে পাঠাইয়া দিয়া, নিজে আপাততঃ বাড়ী যাইব। দুই একদিন সেখানে থাকিয়া আমি মহেশপুর যাইব। যোড়হাতে তোমার কাছে এই ভিক্ষা করি যে, তুমি ইন্দিরাই হও, আর কুমুদিনীই হও, আর বিদ্বাধরীই হও, আমাকে তাগ করিও না।

আমি। না। আমার শাপান্ত হইলেও দেবীর কুপায় আবার তোমায় পাইতে পারিব। তুমি আমার প্রাণাধিক প্রিয় বস্তু।

“এ কথাটা ত ডাকিনীর মত নহে।” এই বলিয়া তিনি সদরে গেলেন। সেখানে লোক আসিয়াছিল। লোক আর কেহ নহে,

রমণবাবু। রমণবাবু আমার স্বামীর সঙ্গে অন্তঃপুরে আসিয়া আমাকে সীল-করা পুলিন্দা দিয়া গেলেন। আমার স্বামীকে সে সম্বন্ধে যে উপদেশ দিয়াছিলেন, আমাকেও সেই উপদেশ দিলেন। শেষ বলিলেন, “সুভাষিণীকে কি বলিব?”...

আমি বলিলাম, “বলিবেন, কাল আমি মহেশপুরে যাইব। গেলেই আমি শাপ হইতে মুক্ত হইব।”

স্বামী বলিলেন, “আপনাদের এ সব জানা আছে না কি?”

চতুর রমণবাবু বলিলেন, “আমি সব জানি না, কিন্তু আমার স্ত্রী সুভাষিণী সব জানেন।”

বাহিরে আসিয়া স্বামী মহাশয় রমণ বাবুকে জিজ্ঞাসা করিলেন “আপনি ভাকিনী যোগিনী বিদ্বাধরী প্রভৃতি বিশ্বাস করেন?”

রমণবাবু রহস্যখানা কতক বুঝিয়াছিলেন, বলিলেন, “করি সুভাষিণী বলেন, কুমুদিনী শাপগ্রস্ত বিদ্বাধরী।”

স্বামী বলিলেন, “কুমুদিনী কি ইন্দ্রিয়া, আপনার স্ত্রীকে ভাল করিয়া জিজ্ঞাসা করিবেন।”

রমণবাবু আর দাঁড়াইলেন না। হাসিতে হাসিতে চলিয়া গেলেন।

বিংশ পরিচ্ছেদ : বিদ্বাধরীর অন্তর্দ্বান

এইকপ কথাবার্তা হইলে পর আমরা যথাকালে উভয়ে কলিকাতা হইতে যাত্রা করিলাম। তিনি আমাকে কালাদীঘি নামক সেই হৃতভাগ্য দীঘি পার করিয়া দিয়া নিজালয়ের অভিমুখে যাত্রা করিলেন।

সন্দের লোকজন আমাকে মহেশপুর লইয়া গেল। গ্রামের বাহিরে বাহক ও রক্ষকদিগকে অবস্থিতি করিতে বলিয়া দিয়া আমি পদব্রজে গ্রামের মধ্যে প্রবেশ করিলাম। পিতার গৃহ সম্মুখে দেখিয়া, এক নিজন স্থানে বসিয়া অনেক রোদন করিলাম। তাহার পর গৃহমধ্যে প্রবেশ করিলাম। সম্মুখেই পিতাকে দেখিয়া প্রণাম করিলাম। তিনি

আমাকে চিনিতে পারিয়া আছলামে বিবশ হইলেন। সে সকল কথা এখানে বলিবার অবসর নাই।

আমি এত দিন কোথায় ছিলাম, কি প্রকারে আসিলাম—তাহা কিছুই বলিলাম না। পিতা-মাতা জিজ্ঞাসা করিলে বলিলাম, “এর পরে বলিব।”

সময়ান্তরে স্কুল কথা তাঁহাদিগকে বলিলাম, কিন্তু সব কথা নহে। এতটুকু বৃত্তিতে দিলাম যে, পরিশেষে আমি স্বামীর নিকটেই ছিলাম এবং স্বামীর নিকট হইতেই আসিয়াছি। এবং তিনিও দুই একদিনের মধ্যে এখানে আসিবেন। সব কথা ভাঙ্কিয়া-চুরিয়া কামিনীকে বলিলাম। কামিনী আমার অপেক্ষা দুই বৎসরের ছোট। বড় রঙ্গ ভালবাসে। সে বলিল, “দিদি! যখন মিত্রজা এত বড় গোবরগণেশ, তাকে নিয়া একটু রঙ্গ করিলে হয় না?” আমি বলিলাম, “আমারও সেই ইচ্ছা।” তখন দুই বহিনে পরামর্শ আঁটিলাম। সকলকে শিখাইয়া ঠিক করিলাম। বাপ-মাকেও একটু শিখাইতে হইল। কামিনী তাঁহাদিগকে বুঝাইল যে, প্রকাশে গ্রহণ করাটা এখনও হয় নাই। সেটা এইখানে হইবে। আমরাই তাহা করিয়া লইব। তবে আমি যে এখানে আসিয়াছি, এই কথাটা তাঁহারা জামাতা আসিলে তাঁহার সাক্ষাতে প্রকাশ না করেন।

পরদিন, সে জামাতা আসিলেন। পিতা-মাতা তাঁহাকে যথেষ্ট আদর-অপেক্ষা করিলেন। আমি আসিয়াছি, এ কথা বাহিরে কাহারও মুখে তিনি শুনিলেন না। কাহাকেও জিজ্ঞাসা করিতে পারিলেন না। যখন অন্তঃপুরে জলযোগ করিতে আসিলেন, তখন বড় বিষণ্ণবদন।

জলযোগের সময়, আমি সম্মুখে রহিলাম না। কামিনী বসিল, আর দুই চারি জন জ্ঞাতি ভগিনী ভাইজ বসিল। তখন সন্ধ্যাকাল উদ্ভীর্ণ হইয়াছে। কামিনী অনেক কথা জিজ্ঞাসা করিতে লাগিল। তিনি যেন কলে উত্তর দিতে লাগিলেন। আমি আড়ালে দাঁড়াইয়া সব শুনিতে দেখিতে লাগিলাম। পরিশেষে তিনি কামিনীকে জিজ্ঞাসা করিলেন, “তোমার দিদি কোথায়?”

কামিনী খুব একটা দীর্ঘনিশ্বাস ফেলিয়া বলিল, “কি জানি কোথায়? কালাদীঘিতে সেই যে সর্বনাশটা হইয়া গেল, তার পর ত আর কোন খবর পাওয়া যায় নাই।”

তঁার মুখখানা বড় লম্বা হইয়া গেল। কথা আর কহিতে পারেন না। বৃষি কুমুদিনীকে হারাইলাম, এ কথা মনে করিয়া থাকিবেন; কেন না, তঁার চক্ষু দিয়া দরবিগলিত ধারা বহিতে লাগিল।

চক্ষের জল সামলাইয়া তিনি জিজ্ঞাসা করিলেন, “কুমুদিনী” বলিয়া কোন স্ত্রীলোক আসিয়াছিল কি?”

কামিনী বলিল, “কুমুদিনী কি কে, তাহা বলিতে পারি না, একটা স্ত্রীলোক পরশু দিন পাশ্চী করিয়া আসিয়াছিল বটে। সে বরাবর মহাভৈরবীর মন্দিরে গিয়া উঠিয়া দেবীকে প্রণাম করিল। অমনিই একটা আশ্চর্য ব্যাপার উপস্থিত হইল। হঠাৎ মেঘ অন্ধকার হইয়া ঝড়বৃষ্টি হইল। সেই স্ত্রীলোকটা সেই সময় ত্রিশূল হাতে করিয়া জ্বলিতে জ্বলিতে আকাশে উঠিয়া কোথায় চলিয়া গেল।”

প্রাণনাথ জলযোগ ত্যাগ করিলেন। হাত ধুইয়া মাথায় হাত দিয়া অনেকক্ষণ বসিয়া রহিলেন; অনেকক্ষণ পর বলিলেন, “যে স্থান হইতে কুমুদিনী অন্তর্দান করিয়াছে, তাহা দেখিতে পাই না?”

কামিনী বলিল, “পাও বৈ কি? অন্ধকার হয়েছে—আলো নিয়ে আসি।”

এই বলিয়া কামিনী আমাকে ইঙ্গিত করিয়া গেল—“আগে তুই যা। তার পর আলো নিয়ে উপেন্দ্র বাবুকে লইয়া যাইব।” আমি আগে মন্দিরে গিয়া বারেণ্ডায় বসিয়া রহিলাম।

সেইখানে আলো ধরিয়া (খিড়কী দিয়া পথ আছে বলিয়াছি) কামিনী আমার স্বামীকে আমার কাছে লইয়া আসিল। তিনি আসিয়া আমার পদপ্রান্তে আছাড়িয়া পড়িলেন। ডাকিলেন, “কুমুদিনী, কুমুদিনী! যদি আসিয়াছ—ত আর আমায় ত্যাগ করিও না।”

তিনি বার দুই চারি এই কথা বলার পর, কামিনী চটিয়া উঠিয়া বলিল, “আয় দিদি! উঠে আয়! ও মিন্সে কুমুদিনী চেনে, তোকে

চেনে না।”

তিনি ব্যগ্র হইয়া জিজ্ঞাসা করিলেন, “দিদি! দিদি কে?”

কামিনী রাগ করিয়া বলিল, “আমার দিদি—ইন্দিরে। কখনও নাম শোননি?”

এই বলিয়া ছুষ্ঠা কামিনী আলোটা নিবাইয়া দিয়া আমার হাত ধরিয়া টানিয়া লইয়া আসিল। আমরা খুব ছুটিয়া আসিলাম। তিনি একটু প্রকৃতিস্থ হইলেই আমাদের পিছু পিছু ছুটিলেন। কিন্তু অন্ধকার—পথ অচেনা : একটা চৌকাট বাধিয়া একটা ছোট রকম আছাড় খাইলেন। আমরা নিকটেই ছিলাম, দুই জনে দুই দিক্ হইতে হাত ধরিয়া তুলিলাম। কামিনী চুপি চুপি বলিল, “আমরা বিদ্বাধরী—তোমার রক্ষার জন্ত সজে সজে বেড়াইতেছি।”

এই বলিয়া, তাকে টানিয়া আনিয়া আমার শয়্যাগৃহে উপস্থিত করিলাম। সেখানে আলো ছিল। তিনি আমাদের দেখিয়া বলিলেন, “এ কি? এ ত কামিনী, আর এ ত কুমুদিনী।” কামিনী রাগে দশখানা হইয়া বলিল, ‘আঃ পোড়া কপাল!’ এই বুদ্ধিতে টাকা রোজগার করেছ? বোদাল পাড় নাকি? কুমুদিনী না,—ইন্দিরে—ইন্দিরে—ইন্দিরে!!! তোমার পরিবার? আপনার পরিবার চিনতে পার না?”

তখন স্বামী মহাশয় আহ্লাদে অজ্ঞান হইয়া আমাকে কোলে টানিয়া লইতে গিয়া কামিনীকেই কোলে টানিয়া লইলেন। সে তাঁর গালে এক চড় মারিয়া হাসিতে হাসিতে চলিয়া গেল।

সেদিনের আহ্লাদের কথা বলিয়া উঠিতে পারি না। বাড়ীতে খুব উৎসাহ বাধিল। সেই রাত্রে কামিনীতে আর উ-বাবুতে প্রায় এক শত বার বাগযুদ্ধ হইল। সকল বারই প্রাণনাথ হারিলেন।

একবিংশতিতম পরিচ্ছেদ : সেকালে যেমন ছিল

কালাদীঘির ডাকাইতির পর আমার অদৃষ্টে যাহা ঘটয়াছিল, স্বামী মহাশয় এক্ষণে আমার কাছে সব শুনিলেন। রমণবাবু ও সুভাষিনী যেরূপ ঘড়্যন্ত্র করিয়া তাঁহাকে কলিকাতায় লইয়া গিয়াছিল, তাহাও শুনিলেন। একটু-রাগও করিলেন। বলিলেন, “আমাকে এত ঘুরাইবার ফিরাইবার প্রয়োজনটা কি ছিল ?” প্রয়োজনটা কি ছিল, তাহাও বুঝাইলাম। তিনি সন্তুষ্ট হইলেন। কিন্তু কামিনী সন্তুষ্ট হইল না। কামিনী বলিল, “তোমায় ঘানিগাছে ঘুরায় নাই, অমনি ছাড়িয়াছে। এইটুকু দিদির দোষ। আবার আব্দার নিলেন কি না, গ্রহণ করব না। আরে মিন্‌সে, যখন আমাদের আত্মতা-পরা শ্রীপাদপদ্মখানি ভিন্ন তোমার জেতের গতিমুক্তি নাই, তখন অত বড়াই কেন ?”

উ-বাবু এবার একটা উত্তোর মারিলেন, বলিলেন, “তখন চিনিতে পারি নে যে! তোমাদের কি চিনতে জোওয়ায় ?”

কামিনী বলিল, “তুমি যে চিনিবে, বিধাতা তা কপালে লিখে নাই। যাত্রায় শোন নি? বলে,

“ধবলী বলিল শ্যাম, কে চেনে তোমারে।

চিনি শুধু কাঁচা ঘাস যমুনার ধারে ॥

পদচিহ্ন খঁজি তব, বংশী শুনে কাণে।

ধবলবজ্রাঙ্কুশ তায়, গোরু কি তা জানে ?”

আমি আর হাসি রাখিতে পারিলাম না। উ-বাবু অপ্রতিভ হইয়া কামিনীকে বলিলেন, “যা ভাই, আর জ্বালাস্‌নে! যাত্রা করলি, তার জন্ত এই পানের খিলিটা প্যালা নিয়ে যা।”

কামিনী বলিল, “ও দিদি! মিত্রজার একটু বুদ্ধিও আছে দেখিতে পাই।”

আমি। কি বুদ্ধি দেখিলি ?

কামিনী। বাবু পানের ঠিলিটা রেখে খিলিটা দিয়েছেন, বুদ্ধি

নয় ? তা তুই এক কাজ করিস ; মধ্যে মধ্যে তোর পায়ে হাত দিতে দিস্—তা হলে হাত দরাজ হবে ।

আমি । আমি কি ঔঁকে পায়ে হাত দিতে, দিতে পারি ? উনি হলেন আমার পতিদেবতা ।

কামিনী । দেবতা কবে হলেন ? পতি যদি দেবতা, তবে এত দিন ত তোমার কাছে উনি উপদেবতাই ছিলেন ।

আমি । দেবতা হয়েছেন, যবে তাঁর বিদ্বাধরী গিয়েছে ।

কামিনী । আহা, বিদ্বাকে ধরি ধরি করেও ধরতে পারলেন না ! তা দেখ মিত্র মহাশয়, তোমার যে বিদ্বা, তাহার সঙ্গে ধরাধরি না থাকিলেই ভাল । সে বিদ্বা বড় বিদ্বা যদি না পড়ে ধরা ।

আমি । কামিনী, তুই বড় বাড়ালি ! শেষে চুরি-চামারি পর্য্যন্ত যাড়ে ফেলিতেছিস্ ?

কামিনী । অপরাধ আমার ? যখন মিত্র মহাশয় কমিসেরিয়েটের কাজ করেছেন, তখন চুরি ত করেছেন । আর চামারি ;—তা যখন রসদ যুগিয়েছেন, তখন চামারিও করেছেন ।

উ-বাবু বলিলেন, “বলুক গে—ছেলেমানুষ । অমৃতং বালভাষিতং ।”

কামিনী । কাজেই । তুমি যখন বিদ্বাধরী শাসিতং, তখন তোমার বুদ্ধি নাশিতং । আমি তবে আসিতং—মা ডাকিতং ।

বাস্তবিক মা ডাকিতেছিলেন ।

কামিনী মার কাছ হইতে ফিরিয়া আসিয়া বলিল, “জান, কেন মা ডাকিতং ? তোমরা আর ছুদিন থাকিতং—যদি না থাকিতং, তবে জোর ক’রে রাখিতং ।”

আমরা পরস্পরের মুখ পানে চাহিলাম ।

কামিনী বলিল, “কেন পরস্পর তাকিতং ?”

উ-বাবু বলিলেন, “ভাবিতং ।”

কামিনী বলিল, “বাড়ী গিয়া ভাবিতং । এখন ছুই দিন এখানে খাবিতং, দাবিতং, হাসিতং খুসিতং, খেলিতং, ধূলিতং হেলিতং, ছলিতং, নাচিতং, গায়িতং—”

উ-বাবু বলিলেন, “কামিনী তুই নাচবি ?”

কামিনী । দূর, আমি কেন ? আমি যে শিকল কিনে রেখেছি—
তুমি নাচবে ।

উ-বাবু । আমাকে ত আসা পর্য্যন্ত নাচাচ্চ ; আর কত নাচাবে—
আজ তুমি একটু নাচবে ।

কামিনী । তা হলে থাকিবে ?

উ-বাবু । থাকিব ।

কামিনীর নাচ দেখিবার প্রত্যাশায় নহে, আমার পিতা-মাতার
অনুরোধে উ-বাবু আর একদিন থাকিতে সম্মত হইলেন । সে দিনও
বড় আনন্দ গেল । দলে দলে পাড়ার মেয়েরা আসিয়া, সন্ধ্যার পর
আমার স্বামীকে ঘেরিয়া লইয়া, মজলিস করিয়া বসিল । সেই প্রকাণ্ড
পুরীর একটা কোণের ঘরে মেয়েদের মজলিস হইল ।

কত মেয়ে আসিল, তার সংখ্যা নাই । কত বড় বড় পটোল-চেরা
ভ্রমর-ভারা চোখ, সারি বাঁধিয়া, স্বচ্ছ সরোবরে সফরীর মত খেলিতে
লাগিল ; কত কালো কালো কুণ্ডলীকরা ফণাধরা অলকরাশি বর্ষাকালে
বনের লতার মত ঘুরিয়া ঘুরিয়া, ফুলিয়া ফুলিয়া, ছলিয়া উঠিতে লাগিল।
—যেন কালিয়দমনে কালনাগিনীর দল, নিত্রস্ত হইয়া যমুনার জলে
ঘুরিতে-ফিরিতেছে—কত কাণ, কাণবালা, চৌদান, মাকড়ি, বুঝকা,
ইয়াররিং, ছল—মেঘ-মেঘে বিছাভের মত, কত মেঘের কত চুলের রাশির
ভিতর হইতে খেলিতে লাগিল,—কত রাক্ষা ঠোঁটের ভিতর হইতে কত
মুক্তাপংক্তির মত দন্তশ্রেণীতে কত সুগন্ধি-তম্বুল চর্কণে কত রকম অধর-
লালার তরঙ্গ উঠিতে লাগিল ;—কত শ্রোতার ফাঁদিনথের ফাঁদে কন্দর্প-
ঠাকুর ধরা পড়িয়া, তাঁরন্দাজিতে জবাব দিয়া নিষ্কৃতি পাইলেন—কত
অলঙ্কাররাশিভূষিত সুগোল বাহুর উৎক্ষেপনিক্ষেপে বায়ুসস্তাড়িত
পুষ্পিত লতাপূর্ণ উদ্ভানের মত সেই কক্ষ একটা অলৌকিক চঞ্চল
শোভায় শোভিত হইতে লাগিল, রুণু রুণু বুহু বুহু শিঞ্জিতে ভ্রমরগুঞ্জন
অনুকৃত হইতে লাগিল ; কত চিকে চিক্ চিক্ ; হারে বাহার চন্দ্রহারে
চন্দ্রের হার ; মলের বলমলে চরণ টলমল ! কত বানারসী, বালুচরী-

মুজাপুরী, ঢাকাই, শাস্তিপুরে, সিমলা, ফরাসডাঙ্গা,—চেঙ্গি, গরদ, সূতা,
—রঙ্গকরা, রঙ্গভরা, ডুরে, ফুরফুরে, ঝুরঝুরে, বাঁছুরে—তা'তে কারও
ঘোমটা, কারও আড়ঘোমটা, কারও আধঘোমটা,—কারও কেবল
কবরীপ্রাপ্তে মাত্র বসনসংস্পর্শ—কারও তা'তেও ভুল। আমার প্রাণনাথ
অনেক গোরার পলটন ফেটে করিয়া ঘরে ঢাকা লইয়া আসিয়াছেন—
অনেক কর্ণেল, জ্ঞানরেলের বুদ্ধিব্রংশ করিয়া, লাভের অংশ ঘরে লইয়া
আসিয়াছেন—কিন্তু এই সুন্দরীর পলটন দেখিয়া, তিনি বিশুদ্ধ—বিত্তস্ত।
তোপের আগুনের স্থানে নয়নবহির স্মৃতি-কামানের, কালকরালকুণ্ডলী-
কৃত ধূমপুঞ্জের পরিবর্তে এই কালকরালকুণ্ডলীকৃত কমনীয় কেশকাদম্বিনী,
বেওনেটের ঠনঠনির পরিবর্তে এই অলঙ্কারের রুণরুণি, জয়চাকের
বাছের পরিবর্তে আলতা-পরা পায়ে মলের কম্বামি ! যে পুরুষ চিলিয়ান-
ওয়ালা দেখিয়াছে—সেও হতাস। এ ঘোর রণক্ষেত্রে তাঁহাকে রক্ষা
করিবার জ্ঞান, তিনি আমাকে দ্বারদেশে দেখিতে পাইয়া ইঞ্জিতে
ডাকিলেন—কিন্তু আমিও শিখ সেনাপা'র মত, বিশ্বাসঘাতকতা করিলাম
—এ রণে তাঁহার সাহায্য করিলাম না।

স্কুল কথা, এই সকল মজলিস্‌গুলায় অনেক নিল্লজ্জ ব্যাপার ঘটয়া
থাকে জানিতাম। তাই কামিনী আর আমি গেলাম না—বাহিরে
রহিলাম দ্বার হইতে মধে মধে উঁকি মারিতে লাগিলাম। যদি বল,
যাহাতে নিল্লজ্জ ব্যাপার ঘটে, তুমি তাহার বর্ণনায় কেন প্রবৃত্ত,
তাহাতে আমার এই উত্তর এই যে, আমি হিন্দুর মেয়ে, আমার রুচিতে
এই সকল ব্যাপার নিল্লজ্জ ব্যাপার। কিন্তু এখনকার প্রচলিত রুচি
ইংরেজি রুচি ; ইংরেজি রুচির বিধানমতে বিচার করিলে ইহাতে নিল্লজ্জ
ব্যাপার কিছুই পাওয়া যাইবে না।

বলিয়াছি, আমি ও কামিনী দুই জনে একবার উঁকি মারিলাম।
দেখি, পাড়ার যমুনাঠাকুরাণী সভাপত্নী হইয়া জমকাইয়া বসিয়া আছেন।
তাঁর বয়স পঁয়তাল্লিশ ছাড়াইয়াছে ; রঙটা মিঠে রকম কালো ;
চোখ দুইটা ছোট ছোট, কিন্তু একটু ঢুলু ঢুলু, ঠোঁট দুইখানা পুরু, কিন্তু
রসে ভরা ভরা ! বস্ত্রালঙ্কারের বাহার—পায়ে আলতার বাহার,

কালোতেই রাজা, যেন যমুনাতেই জবা,—মাথায় ছেঁড়া চুলের বাহার। শরীরের ব্যাস ও পরিধি অসাধারণ দেখিয়া, আমার স্বামী তাঁহাকে “নদীরূপা মহিষী” বলিয়া ব্যঙ্গ করিতেছেন। মথুরাবাসীরা যমুনা নদীকে কৃষ্ণের নদীরূপা মহিষী বলিয়া থাকে, সেই কথা লক্ষ্য করিয়া উ-নাবু এই রসিকতা করিলেন। এখন আমার যমুনা দিদি কখনও মথুরা যান নাই, এত খবরও জানেন না, এবং মহিষী শব্দের অর্থটা জানেন না। তিনি মহিষী অর্থে কেবল মাদি মতিষই বুঝিয়াছিলেন এবং সেই জন্তুর সহিত আপনার শরীরের সাদৃশ্য লক্ষ্য করিয়া রাগে গর গর করিতেছিলেন। প্রতিশোধার্থ তিনি আমার স্বামীর সম্মুখে আমাকে প্রকারান্তরে “গাই” বলিলেন, এমন সময়ে আমি দ্বার হইতে মুখ বাড়াইয়া জিজ্ঞাসা করিলাম, “যমুনা দিদি! কি গা?”

যমুনা দিদি বলিলেন, “একটা গাই ভাই।”

আমি জিজ্ঞাসা করিলাম, “গাই কেন গা?”

কামিনী আমার পাশ হইতে বলিল, “ডেকে ডেকে যমুনা দিদির গলা কাঠ হইয়া গিয়াছে। একবার পিওবে।”

হাসির চোটে সভাপত্নী মহাশয় নিবিয়া গেলেন, কামিনীর উপর গরম হইয়া বলিলেন, “একরত্তি মেয়ে, তুই সকল ঠাণ্ডিতে কাটি দিস্ কেন্ লো কামিনী?”

কামিনী বলিল, “আর ত কেউ তোমার ভুসি কলাই সিদ্ধ করতে জানে না।”

এই বলিয়া কামিনী পলাইল, আমিও পলাইলাম। আবার একবার গিয়া উঁকি মারিলাম, দেখি পিয়ারী ঠান্দিদি, জাতিতে বৈষ্ণব—বয়স পঞ্চাষষ্টি বৎসর, তার মধ্যে পঞ্চবিংশতি বৎসর বৈধব্যে কাটিয়াছে—তিনি সর্ব্বাঙ্গে অলঙ্কার পরিয়া ঘাঘরা পরিয়া, রাধিকা সাজিয়া আসিয়াছেন। আমার স্বামীকে লক্ষ্য করিয়া, কৃষ্ণ কৈ? কৃষ্ণ কৈ? বলিয়া সেই কামিনীকুণ্ডলন পরিভ্রমণ করিতেছেন।

আমি জিজ্ঞাসা করিলাম, “কি খোঁজ ঠান্দিদি?”

তিনি বলিলেন, “আমি কৃষ্ণকে খুঁজি।”

কামিনী বলিল, “গোয়ালাবাড়ী যাও—এ কায়েতের বাড়ী।”

রসিকতাপ্রবীণা বলিল, কায়েতের বাড়ীই আমার কৃষ্ণ মিলিবে।”

কামিনী বলিল, “ঠান্দিদি, সকল জাতেই জাত দিয়াছ নাকি?”

এখন, পিয়ারী ঠাকুরাণীর এককালে তেলি অপবাদ ছিল এই কথায়, তিনি তেলে-বেগুনে জ্বলিয়া উঠিয়া কামিনীকে ব্যঙ্গচ্ছন্দে গালি পাড়িতে আরম্ভ করিলেন। আমি তাঁকে থামাইবার ভয়, যমুনা দিদিকে দেখাইয়া বলিলাম, “রাগ কর কেন? তোমার কৃষ্ণ ঐ যমুনায় ঝাঁপ দিয়াছেন। এসো—তোমায় আমায় পুলিনে লাড়াইয়া একটু কাঁদি।”

যমুনা ঠাকুরাণী “মহিষী” শব্দের অর্থবোধে পণ্ডিতা। “পুলিন” শব্দের অর্থবোধেও সেই রূপ। তিনি ভাবিলেন, আমি বৃন্দী কোন পুলিনবিহারীর কথার ইঙ্গিত করিয়া তাঁহার অকলঙ্কিত সন্তানের— (অকলঙ্কিত তাঁহার রূপের প্রভাবে)—প্রতি কোন প্রকার ইঙ্গিত করিয়াছি। তিনি সক্রোধে বলিলেন, “এর ভিতর পুলিন কে লো?”

কাজেই আমারও একটু রঙ্গ চড়াইতে ইচ্ছা হইল। আমি বলিলাম, “যার গায়ে পড়িয়া যমুনা রাত্রিদিন তরঙ্গভঙ্গ করে, বৃন্দা তাকে পুলিন বলে।”

আবার তরঙ্গভঙ্গে সর্বনাশ করিল,—যমুনা দিদি ত কিছু বুঝিল না, রাগিয়া বলিল, “তোর তরঙ্গ-ফরঙ্গকেও চিনি নে, তোর পুলিনকেও চিনি নে, তোর বেন্দাবনকে চিনি নে। তুই বৃন্দী ডাকাতের কাছে এত সব রঙ্গরসের নাম শিখে এসেছিস?”

মজলিসের ভিতর রঙ্গময়ী বলিয়া আমার একজন সমবয়স্কা ছিল। সে বলিল, “অত ক্ষেপ কেন যমুনা দিদি! পুলিন বলে নদীর ধারের চড়াকে। তোমার দুধারে কি চড়া আছে?”

চঞ্চলা নামে যমুনা দিদির ভাইজ, ঘোমটা দিয়া পিছনে বসিয়াছিল, সে ঘোমটার ভিতর হইতে মূহু মধুর স্বরে বলিল, “চড়া থাকিলেও বাঁচিলাম। একটু ফরসা কিছু দেখিতে পাইলাম। কেবল কালো জলের কাগিন্দী কল্ কল্ করিতেছে।”

কামিনী বলিল, “আমার যমুনা দিদিকে কেন তোরা অমন করে চড়ার মাঝখানে ফেলে দিতেছিস্‌।”

চঞ্চলা বলিল, “বালাই ! বাট ! ঠাকুরঝিকে চড়ার মাঝখানে ফেলে দেবে কেন ? গুঁর ভাইয়ের পায়ে ধ’রে বলব, যেন ঠাকুরঝিকে মেঠো শ্মশানে দেন ।”

রঙ্গময়ী বলিল, “তুটোতে তফাৎ কি বো ?”

চঞ্চলা বলিল, “শ্মশানে শিয়াল কুকুরের উপকার ;—চড়ায় গোব মহিষ চরে—তাদের কি উপকার ?” মহিষ কথাটা বলিবার সময়ে, বো একবার ঘোমটা তুলিয়া ননদের উপর সহাস্যে কটাক্ষ করিল ।

যমুনা বলিল, “নে, আর এক-শ বার সেই কথা ভাল লাগে না । যাদের মোষ ভাল লাগে, তারাই এক-শ বার মোষ মোষ করুক গে ।”

পিয়রী ঠান্দিদি কথাটায় বড় কাণ দেন নাই—তিনি জিজ্ঞাসা করিলেন, “মোষের কথা কি গা ?”

কামিনী বলিল, “কোন তেলিদের বাড়ী মোষে ঘানি টানে সেই কথা হচ্ছে ।”

এই বলিয়া কামিনী পলাইল । বার বার সেই তেলি কথাটা মনে করিয়া দেওয়াটা ভাল হয় নাই—কিন্তু কামিনী কুচরিত্রা লোক দেখিতে পারিত না । পিয়রী ঠান্দিদি, রাগে অঙ্ককার দেখিয়া আর কথা না কহিয়া, উ-বাবুর কাছে গিয়া বসিল । আমি তখন কামিনীকে ডাকিয়া বলিলাম, “কামিনী ! দেখ্‌সে আয় লো ! এইবার পিয়রী কৃষ্ণ পেয়েছেন ।”

কামিনী দূর হত্বেই বলিল, “অনেক দিন সময় হয়েছে ।”

তারপর একটা সোরগোল শুনিলাম । আমার স্বামীর আওয়াজ শুনিতে পাইলাম—তিনি একজনকে হিন্দিতে ধমক-ধামক করিতেছেন । আমরা দেখিতে গেলাম । দেখিলাম, এক জন দাড়িওয়াল মোগল ঘরের ভিতর প্রবেশ করিয়াছে ; উ-বাবু তাহাকে তাড়াইবার জন্য ধমক-ধামক করিতেছেন, মোগল যাইতেছে না । কামিনী তখন দ্বার হইতে ডাকিয়া বলিল, “মিত্র মহাশয় ! গায়ে কি জোর নেই ?”

মিত্র মহাশয় বলিলেন, “আছে বই কি ?”

কামিনী বলিল, “তবে মোগল মিন্‌সেকে গলা ধাক্কা দিয়া ঠেলিয়া দাও না।”

এই বলিবা মাত্র মোগল উর্দুখাসে পলায়ন করিল। পলায়ন করিবার সময় আমি তাহার দাড়ি ধরিলাম—পরচূলা খসিয়া আসিল। মোগল বলিল, “মরণ আর কি ! তা এ বোকাটি নিয়ে ঘর করিবি কি প্রকারে ?” এই বলিয়া সে পলাইল। আমি দাড়িটা ছুঁড়িয়া ফেলিয়া যমুনা দিগিকে উপহার দিলাম। উ-বাবু জিজ্ঞাসা করিলেন, “ব্যাপার কি ?”

কামিনী বলিল, “ব্যাপার আর কি ? তুমিই দাড়িটা পরিয়া চাচি পাহে ঘাসবনে চরিতে আরম্ভ কর।”

উ-বাবু বলিলেন, “কেন মোগল কি জাল ?”

কামিনী। কার সাধা এমন কথা বলে ! শ্রীমতী অনঙ্গমোহিনী দাসী কি জাল মোগল হইতে পারে ! আসল দিল্লীর আমদানি।

একটা ভারী হাসি পড়িয়া গেল। আমি একটু মনঃক্ষুণ্ণ হইয়া চলিয়া আসিতেছিলাম, এমন সময়ে পাড়ার ব্রজসুন্দরী দাসী একখানি জীর্ণ বস্ত্র পরিয়া একটি ছেলে কোলে করিয়া উ-বাবুর কাছে গিয়া দুঃখের কান্না কাঁদিতে লাগিল। “আমি বড় গরীব ; খেতে পাই না ; ছেলেটি মানুষ করিতে পারি না।” উ-বাবু তাহাকে কিছু দিলেন। আমরা দুই জনে দ্বারের দুই পাশে। সে যখন দ্বার পার হয়, কামিনী তাহাকে বলিল, “ভাই ভিখারিণী ! জান ত বড় মানুষের কাছে ভিক্ষা কিছু পাইলে দ্বারবান্দের কিছু ঘুস দিয়ে যেতে হয় ?”

ব্রজসুন্দরী বলিল, “দ্বারবান্ কে ?”

কামিনী। আমরা দুই জন।

ব্রজ। কত ভাগ চাও ?

কামিনী। পেয়েছ কি ?

ব্রজ। দশটি টাকা।

কা। তবে, আমাদের আট টাকা আট টাকা ষোল টাকা দিয়

যাও ।

ব্রজ । লাভ মন্দ নয় ।

কা । তা বড় মানুষের বাড়ীর ভিক্ষায় লাভালাভ ধরিতে গেলে চলিবে কেন ? সময়ে অসময়ে ঘর থেকেও কিছু দিতে হয় ।

ব্রজসুন্দরী বড় মানুষের স্ত্রী । ধাঁ করিয়া ষোল টাকা বাহির করিয়া দিল । আমরা সেই ষোল টাকা যমুনা ঠাকুরাণীকে দিলাম, বলিলাম, “তোমরা এই টাকায় সন্দেশ খাইও ।”

স্বামী বলিলেন, “ব্যাপার কি ?”

ততক্ষণে ব্রজসুন্দরী ছেলে পাঠাইয়া, বানারসী পরিয়া আসিয়া বসিলেন । আবার একটা হাসির ঘটনা পড়িয়া গেল ।

উ-বাবু বলিলেন, “এ কি যাত্রা নাকি ?”

যমুনা বলিল, “তা না ত কি ? দেখিতেছ না, কাহারও কালিয়-দমনের পালা, কারও কলঙ্কভঞ্জনের পালা, কারও মাথুর মিলন,—কারও শুধু পালাই পালাই পালা ।”

উ-বাবু । শুধু পালাই পালাই পালা কার ?”

যমুনা । কেন কামিনীর ! কেবল পালাই পালাই তার পালা ।

কামিনী কথায় সকলকে জ্বালাইতে লাগিল ; পান, পুষ্প, আতর বিলাইয়া সকলকে তুষ্ট করিতেছিল । তখন সকলে মিলিয়া তাহাকে ধরিল, বলিল, “তুই যে বড় পালিয়ে পালিয়ে বেড়াচ্ছিস লা ?”

কামিনী বলিল, “পালাব না ত কি তোমাদের ভয় করি না কি ?”

মিত্র মহাশয় বলিলেন, “কামিনী ! ভাই, তোমার সঙ্গে কি কথা ছিল ?”

কামিনী । কি কথা ছিল, মিত্র মহাশয় ?

উ-বাবু । তুমি নচিবে ।

কা । আমি ত নেচেছি ।

উ । কখন নাচলে ?

কা । ছপুর্বেলা ।

উ । কোথায় নাচলি লো ?

ক। আমার ঘবের ভিতর, দোর বন্ধ ক'রে।

ট। কে দেখেছে ?

ক। কেউ না।

উ। তেমনতর ত কথা ছিল না।

ক। এমন কথাও ছিল না যে, তোমাদের সম্মুখে আসিয়া পেশ ওয়াজ পরিয়া নাচিব। নাচিব স্বীকার করিয়াছিলাম, তা নাচিয়াছি আমার কথা রাখিয়াছি। তোমরা দেখিতে পাইলে না, তোমাদের অদৃষ্টের দোষ। এখন আমি যে শিকল কিনিয়া রাখিয়াছি তার কি হবে :

কামিনী যদি নাচের দায়ে এড়াইল, তবে আমার স্বামী গানের জন্ত ধরা পড়িলেন। মজলিস হইতে ছুকুম হইল তোমাকে গায়িতে হইবে। তিনি পশ্চিমাঞ্চলে রীতিমত গীতবিদ্যা শিখিয়াছিলেন। তিনি সনদী খিয়াল গায়িলেন। শুনিয়া সে অস্পরোমগুলী হাসিল। ফরমায়েস করিল, “বদন অধিকারী কি দাশু রায়।” তাতে উ-বাবু অপট স্ততরাঃ অস্পরোগগ সন্তুষ্ট হইল না।

এইকপে ছুই প্রহর রাত্রি কাটিল। এ পরিচ্ছেদটা না লিখিলেও লিখিতে পারিতাম। তবে এ দেশের গ্রাম্য স্ত্রীদিগের জীবনের এই ভাগটুকু এখন লোপ পাইয়াছে বলিয়া আমার বিশ্বাস। লোপ পাইয়াছে, ভালই হইয়াছে ; কেন না, ইহার সঙ্গে অশ্লীলতা, নিল্লজ্জতা, কদাচিত্ত বা দুর্নীতি, আসিয়া মিশ্রিত। কিন্তু যাহা লোপ পাইয়াছে, তাহার একটা চিত্র দিবার বাসনায় এই পরিচ্ছেদটা লিখিলাম। তবে জানি না, অনেক স্থানে এ কুরীতি লোপ না পাইয়াও থাকিতে পারে যদি তাহা হয়, তবে যাহারা জামাই দেখিতে পৌরস্ত্রীদিগকে যাইতে নিষেধ করেন না, তাঁহাদের চোখ কান ফুটাইয়া দেওয়া প্রয়োজনীয় তাই, ধরি মাছ, না ছুই পানি করিয়া তাঁহাদের ইঙ্গিত করিলাম।

দ্বাবিংশতিতম পরিচ্ছেদ : উপসংহার

আমি পরদিন স্বামী'র সঙ্গে শিবিকারোহণে শ্বশুরবাড়ী গেলাম । স্বামী'র সঙ্গে যাইতেছি, সে একটা সুখ বটে : কিন্তু সে বার যে যাইতেছিলাম, সে আর এক প্রকারের সুখ । যাহা কখন পাই নাই, তাই পাইবার আশায় যাইতেছিলাম ; এখন, যাহা পাইয়াছিলাম, তাই আঁচলে বাঁধিয়া লইয়া যাইতেছিলাম । একটা কবির কাব্য, অপরটা ধনী'র ধন । ধনী'র ধন কবির কাব্যের সমান কি ? যাহারা ধনোপার্জন করিয়া বুড়া হইয়াছে, কাব্য হারাইয়াছে, তাহারাও এ কথা বলে না । তাহারা বলে, ফুল যতক্ষণ গাছে ফুটে, ততক্ষণই সুন্দর ; তুলিলে আর তেমন সুন্দর থাকে না । স্বপ্ন যেমন সুখের, স্বপ্নের সফলতা কি তত সুখের হয় ? আকাশ যেমন বস্তুতঃ নীল নয়, আমরা দেখি মাত্র, ধন তেমনিই । ধন সুখের নয়, আমরা সুখের বলিয়া মনে করি । কাব্যই সুখ । কেন না, কাব্য আশা, ধন ভোগমাত্র । তাও সকলের কপালে নয় । অনেক ধনী লোক কেবল ধনাগারের প্রহরী মাত্র । আমার একজন কুটুম্ব বলেন, “ত্রেজুরি গার্ড ।”

তবু সুখে সুখেই শ্বশুরবাড়ী চলিলাম । সেখানে, এবার নির্বিঘ্নে পৌঁছিলাম । স্বামী মহাশয়, মাতাপিতার সমীপে সমস্ত কথা সবিশেষ নিবেদন করিলেন । রমণবাবুর পুলিন্দা খোলা হইল । তাঁহার কথার সঙ্গে আমার সকল মিলিল । আমার শ্বশুর শাশুড়ী সন্তুষ্ট হইলেন । সমাজের লোকেও সবিশেষ বৃত্তান্ত জানিতে পারিয়া, কোন কথা তুলিল না ।

আমি সকল ঘটনা বিবৃত করিয়া, সুভাষিনীকে পত্র লিখিলাম । সুভাষিনীর জ্ঞান সর্বদা আমার প্রাণ কাঁদিত । আমাব স্বামী আমার অনুরোধে রমণবাবুর নিকট হারাগীর জ্ঞান পাঁচ শত টাকা পাঠাইয়া দিলেন । শীঘ্রই সুভাষিনীর উত্তর পাইলাম । উত্তর আনন্দ-পরিপূর্ণ । সুভাষিনী র-বাবুর হস্তাক্ষরে পত্র লিখিয়াছিল । কিন্তু কথাগুলি

সুভাষিণীর নিজের, তাহা কথার রকমেই বুঝা গেল। সে সকলেরই সংবাদ লিখিয়াছিল। তুই একটা সংবাদ উদ্ধৃত করিতেছি সে লিখিতেছে,

“হারাগী প্রথমে কিছুতেই টাকা লইবে না। বলে আমার লোভ বাড়িয়া যাইবে। এটা যেন ভাল কাজই করিয়াছিলাম, কিন্তু এ রকম কাজ এ মন্দই হয় আমি যদি লোভে পড়িয়া মন্দেই রাজি হই ? আমি পোড়ারমুখীকে বুঝাইলাম যে, আমার ঝাঁটা না খাইলে কি তুই এ কাজ করিতিসু ? সবার বেলাই কি তুই আমার হাতের ঝাঁটা খেতে পারি ? মন্দ কাজের বেলা কি আমি তোকে তেমনই তোর স্বপ্ন মুখে ঝাটা খাওয়াইব ? ছোটো গালাগালিও খাবি না কি ? ভাল কাজ করেছিলি, বখশিশ নে। এইরূপ অনেক বুঝান-পড়ানতে সে টাকা নিযাছে। এখন নানা রকম ত্রুত-নিয়ম করিবার ফর্দ করিতেছে। যত দিন না তোমার এই সংবাদ পাওয়া গিয়াছিল, তত দিন সে আর হাসে নাই, কিন্তু এখন তার হাসিব জ্বালায় বাড়ীর লোক অস্থির হইয়াছে।”

পাচিকা ব্রাহ্মণ ঠাকুরাণীর সংবাদ সুভাষিণী এইরূপ লিখিল, “যে অবধি তুমি তোমার স্বামীর সঙ্গে গোপনে চলিয়া গিয়াছ, সে অবধি বুড়ী বড় আফালন করিত, বলিত, ‘আমি বরাবর জানি, সে মানুষ ভাল নয়। তার রকম-সকম ভাল নয়। কত বার বলেছি যে, এমন কুচরিত্র মানুষ তোমরা রেখ বা। তা, কাজালের কথা কে গ্রাহ্য করে ? সবাই কুমুদিনী কুমুদিনী ক’রে অজ্ঞান।’ এমনই এমনই আরও কথা। তার পর যখন শুনিল যে, তুমি কাহারও সঙ্গে যাও নাই, আপনার স্বামীর সঙ্গে গিয়াছ, তুমি বড় মানুষের মেয়ে, বড় মানুষের বো—এখন আপনার ঘর বর পাইয়াছ, তখন বলিল, ‘আমি ত বরাবর বলছি মা যে, সে বড় ঘরের মেয়ে, ছোট ঘরে কি তার এমন স্বভাব-চরিত্র হয় ? যেমন রূপ, তেমনই গুণ, যেন লক্ষ্মী ! সে ভাল থাকুক, মা ! ভাল থাকুক ! তা, হা দেখ বৌদিদি ! আমাকে কিছু পাঠাইয়া দিতে বলো।’”

গৃহিণী সম্বন্ধে সুভাষিণী লিখিল, “তিনি তোমার এই সকল সংবাদ

পাইয়া আঙ্কাদ প্রকাশ করিয়াছেন, কিন্তু আমাকে ও র-বাবুকে কিছু ভৎসনা করিয়াছেন। বলিয়াছেন, 'সে যে এত বড় ধরের মেয়ে, তোর, আমাকে আগে বলিস্ নে কেন? আমি তাকে খুব যত্নে রাখিতাম।' আর, তোমার স্বামীরও কিছু নিন্দা করিয়াছেন, বলিয়াছেন. 'হোক তাঁর পরিবার, আমার অমন রাঁধুনীটা নিয়ে যাওয়া তাঁর কিছু ভাল হয় নাই'।"

কর্তা রামরাম দত্তের কথা সুভাষিনীর নিজ হাতের হিজিবিজি, কষ্টে পড়িলাম যে, কর্তা গৃহিণীকে কৃত্রিম কোপের সহিত তিরস্কার করিয়া বলিয়াছিলেন, "তুমি ছল ছুতা করিয়া সুন্দর রাঁধুনীটাকে বিদায় করিয়া দিয়াছ" গৃহিণী বলিলেন, "খুব করিয়াছি, তুমি সুন্দরী নিয়ে ক' ধুইয়া খাইতে? কর্তা বলিলেন, "তা কি বলিতে পারি। ও কালে, রূপ আর রাত দিন ধ্যান করিতে পারা যায় না।" গৃহিণী সেই হইতে শয্যা লইলেন, আর সেদিন উঠিলেন না। কর্তা যে তাঁহাকে ক্ষেপাইয়াছেন, তাহা তিনি কিছুতেই বুঝিলেন না।

এলা বাহুল্য যে, ব্রাহ্মণ ঠাকুরাণী ও অগ্ন্যাগ্ন ভৃত্যবর্গের জগ্ন কিছু কিছু পাঠাইয়া দিলাম।

তার পর সুভাষিনীর সঙ্গে আর একবার মাত্র দেখা হইয়াছিল। তার কন্যার বিবাহের সময়ে বিশেষ অনুরোধে, স্বামী মহাশয় আমাকে লইয়া গিয়াছিলেন। সুভাষিনীর কন্যাকে অলঙ্কার দিয়া সাজাইলাম— গৃহিণীকে উপযুক্ত উপহার দিলাম—যে যাহার যোগ্য, তাহাকে সেইরূপ দান ও সন্তোষ করিলাম। কিন্তু দেখিলাম, গৃহিণী আমার প্রতি ও আমার স্বামীর প্রতি অপ্রসন্ন। তাঁর ছেলের ভাল খাওয়া হয় না, কথাট: আমায় অনেকবার শুনাইলেন। আমিও রমণবাবুকে কিছু রাঁধিয়া খাওয়াইলাম। কিন্তু আর কখন গেলাম না। রাঁধিবার ভয়ে নয়; গৃহিণীর মনোহুঃখের ভয়ে।

গৃহিণী ও রামরাম দত্ত অনেক দিন হইল স্বর্গারোহণ করিয়াছেন। কিন্তু আর যাওয়া ঘটে নাই। আমি সুভাষিনীকে ভুলি নাই। ইহজগৎ ভুলিব না। সুভাষিনীর মত এ সংসারে আর কিছু দেখিলাম না।